


ଆଦିପୁରୁଷ-
ସିଂହା

সোভিয়েতের মেয়ে

কল্যাণী রায়



ইন্টারন্যাশনাল পাবলিশিং হাউস
৮৭, চৌবঙ্গী রোড কলিকাতা

গ্রন্থকর্তা কতৃক সর্বস্বত্ত্ব সংরক্ষিত

প্রকাশক

ঋষ মিত্র

ইন্টারন্যাশনাল পাবলিশিং হাউস

৮৭, চৌরঙ্গী রোড, কলিকাতা

মুদ্রাকর

সুধাংশুরঞ্জন সেন

টুথ প্রেস, ৩, নন্দন রোড

কলিকাতা

প্রচ্ছদপট ও বর্ণলিপি

দেবব্রত ঘোষ

ব্লক-নির্মাণ

রিপ্রোডাকশন সিকিউটি

প্রচ্ছদপট মুদ্রণ

ভারত ফটোটাইপ স্টুডিও

বাঁধিয়েছেন

বাসন্তী বাইণ্ডিং ওয়ার্কস্

কলিকাতা

দাম এক টাকা আট আনা

প্রথম সংস্করণ ২৬শে জুন ১৯৪৬ ১১ই আষাঢ় ১৩৫৩

চট্টগ্রামের বীরকন্যা .
শ্রদ্ধেয়া কল্পনা দত্ত-কে

প্রকাশকের কথা

বাংলা দেশের মেয়েদের কাছে এই বইখানি পৌঁছে দেয়ার সঙ্গে সঙ্গে কয়েকটি জরুরী কথা জানিয়ে রাখার আবশ্যকতা রয়েছে ; রয়েছে এই কারণে যে সোভিয়েটের মেয়েদের সম্বন্ধে এ রকম তথ্যবহুল ও চিন্তাপূর্ণ বই আমাদের সাহিত্যে ইতিপূর্বে প্রকাশিত হয় নি। এই সর্বপ্রথম বিভিন্ন ইংরেজী প্রামাণ্য গ্রন্থ ঘেঁটে সোভিয়েটের নারীসমাজের নানামুখী রূপকে চিত্রিত করতে প্রয়াস পেয়েছেন শ্রীমতি কল্যাণী রায়। প্রথম প্রচেষ্টা বলে কারো কারো কাছে বইখানি সাংবাদিক আড়ম্বর দোষে দুষ্ট বলে মনে হতে পারে কিন্তু সোভিয়েটের অগ্রসর নারী আন্দোলনের যে গতি ও প্রাণস্পন্দন লেখার মধ্যে রেখান্নিত হয়ে উঠেছে সেই গতি ও প্রাণস্পন্দনই আমাদেরকে ত্রিশ বছরের এক নতুন সভ্যতাকে বুঝতে সাহায্য করবে।

আরেকটা কথা, কারো কারো মনে হতে পারে যে ভারতবর্ষের মেয়েরা থাকতে, আরও অন্যান্য দেশের মেয়েরা থাকতে, সোভিয়েটের মেয়েদের প্রতি আমরা এতোটা মনোযোগ দিতে যাবো কেন ? সত্যিই, সোভিয়েটের মেয়েরা কেন ? একজন দুজনকে নয়, আমাদের দেশের হাজার হাজার মানুষকে এই প্রশ্ন ভাবিয়ে তুলেছে। কারণ পৃথিবীতে এতো দেশ রয়েছে যেখানকার মানুষ জাগছে, সংগ্রাম করছে, আত্মপ্রতিষ্ঠা লাভ করছে—অথচ সে সব দেশ ছেড়ে ‘পৃথিবীর এক ষষ্ঠমাংশ দেশ’ নিয়ে এতো আগ্রহের আতিশয্য কেন ?

আপাত দৃষ্টিতে এই প্রশ্ন অত্যন্ত জটিল মনে হতে পারে ; মনে হতে পারে ভূঁইফোড় আন্তর্জাতিকতা থেকে এর সৃষ্টি.. স্বাদেশিকতা ও জাতীয়তার সঙ্গে যার কোনো যোগ নেই। কিন্তু আসলে সোভিয়েটের প্রতি জনসাধারণের এই অসাধারণ কোতুহল কি সত্যিই এ থেকে জন্ম নিয়েছে ? এ কথা আজ গভীর চিন্তার অপেক্ষা রাখে।

এই জটিল কেন-র উত্তর অনেকে পেয়েছে। যারা পেয়েছে তারা বুঝেছে যে আমাদের দেশের খাতিরেই আমাদেরকে সোভিয়েট সমাজের কথা জানতে হবে...জানতে হবে ওদেশের মেয়েরা কী করে এতো অল্প সময়ের মধ্যে এতোটা সমৃদ্ধিলাভ করতে পেয়েছে। কোনো ভুঁইফোড় আন্তর্জাতিকতা থেকে এই সোভিয়েট-প্রীতি জন্ম নেয় নি; আসলে সোভিয়েটের সর্বহারা বিপ্লবই আমাদের কাছে শ্রদ্ধা ও কৌতুহলের বিষয় হয়ে দাঁড়িয়েছে। ভারতবর্ষের মেয়েরা ওদেশের মেয়েদের সম্বন্ধে যেটুকু জেনেছে সেটুকু জেনেছে ১৯৪১ সালের ২২শে জুনের পর। তারা দেখেছে জীবন-মরণ সংগ্রামের সামনে দাঁড়িয়ে ওরা কি ভাবে মুখোমুখি সংগ্রাম করেছে, ইতিহাসে যার কোনো জুড়ি মেলে না। নাৎসী আক্রমণ সোভিয়েট সমাজের সামনে যে অগ্নিপরীক্ষা উপস্থিত করেছিল, সোভিয়েটের মেয়েরা অসমসাহসিকতার সঙ্গে সে পরীক্ষায় উত্তীর্ণ হয়েছে পুরুষের পাশাপাশি সংগ্রাম করে। হাজার হাজার তানিয়ার রক্তাক্ত স্বাক্ষরেই তার প্রমাণ লিপিবদ্ধ হয়ে রয়েছে। সোভিয়েটের মেয়েদের মন থেকে সে রক্তের দাগ আজও মুছে যায় নি...সেই রক্তের দাগ যা দিয়ে নিজেদের নতুন সভ্যতাকে রক্ষা করেছে তারা বর্বর নাৎসী আক্রমণের হাত থেকে।

অন্য কোনো দেশের মেয়েরা এর শতাংশের একাংশ কৃতিত্বও অর্জন করতে পারে নি। কেন পারে নি? স্বভাবতই আমাদের কৌতুহলী মনে এ প্রশ্ন ওঠে।

আমাদের দেশের মেয়েদেরকে ওদেশের মেয়েদের কথা জানতে হবে কারণ আমাদের চোখের সামনে যে কণ্টকাকীর্ণ পথ, সে পথ অতিক্রমের একমাত্র প্রেরণা হল সোভিয়েট দেশ...সেই সোভিয়েট দেশ যে দেশে জনসাধারণ তার আপনার রাষ্ট্র কায়েম করেছে।

মুচীপত্র

| | | |
|--|-----|----|
| ১। মেয়েদের অধিকার | ... | ১ |
| ২। কর্মময় জীবনের অগ্রগতি | ... | ১০ |
| ৩। শ্রমশিল্পে মেয়েদের কৃতিত্ব | ... | ২০ |
| ৪। যৌথ কৃষিশালার মেয়েরা | ... | ২৯ |
| ৫। জাতিগঠন ও শাসনকার্যে মেয়েদের স্থান | ... | ৪৬ |
| ৬। নতুন জীবনের পথে | ... | ৫৬ |
| ৭। সাংস্কৃতিক ও সামাজিক উৎকর্ষ | ... | ৭৮ |
| ৮। জাতীয় রিপাবলিকের মেয়েরা | ... | ৮৬ |

মেয়েদের অধিকার

প্রত্যেক দেশে মেয়েরা হল জনসংখ্যার একটা বিরাট অংশ। এই অংশকে বাদ দিয়ে কোনো মুক্তি আন্দোলন বা নতুন জাতিগঠনের প্রচেষ্টা সার্থক রূপ গ্রহণ করতে পারে না, যে কোনো দেশের আন্দোলনের ইতিহাসে তার প্রমাণ মিলবে। দুশো বছর-ব্যাপী ব্রিটিশ-শাসিত ভারতবর্ষের ইতিহাসের রক্তাক্ত পাতায়ও তার স্বাক্ষর রয়েছে। অমানুষিক অত্যাচার ও অবমাননার মধ্যে দিয়েই এ দেশের মেয়েদের চৈতন্যপ্রাপ্তি ঘটেছে এবং নতুন মনো দীক্ষিত হয়ে তারা এগিয়ে এসেছে জাতীয় আন্দোলনের পুরোভাগে। ঠিক এমনভাবেই দুঃসাহসের সঙ্গে একদিন এগিয়ে এসেছিল জার-শাসিত রাশিয়ার লাঞ্চিত মেয়েরা।

আমাদের ভারতবর্ষের মতই ছিল সেদিন রাশিয়ার অবস্থা। জারের অপ্রতিহত শাসন, ব্যক্তি-স্বাধীনতার অভাব, মুক্তি আন্দোলনের নিষ্পেষণ; ঘরে ঘরে দারিদ্র, অশিক্ষা, বেকার সমস্যা, মৃত্যুর পরোয়ানা; গ্রামে গ্রামে কৃষকরা ছিল জমিদারের কেনা সম্পত্তি, রুটি ছিল না তাদের পেটে, গায়ে ছিল না তাদের কাপড়। এমনি শোচনীয় ছিল রুশ সাম্রাজ্যে লোকেদের অবস্থা। তবু এরই মধ্যে দিয়ে অগ্রসর হচ্ছিল জাতীয় আন্দোলনের স্রোত। ঘরে ঘরে সংগঠিত হচ্ছিল চাষী মজুর, একেকটি করে জলে উঠছিল বিপ্লবের অনিবার্ণ শিখা।

একাধারে সোভিয়েট বিপ্লবের সংগঠক ও নেতা নিকোলাই লেনিন মেয়েদের সমস্যা সম্বন্ধে পুরোপুরি সচেতন ছিলেন। তিনি বুঝেছিলেন কোনো জাতি তার এক বিরাট জনসংখ্যাকে রক্তনশালায় বন্দী রেখে দেশের স্বাধীনতা অর্জন করতে পারে না। সুতরাং সমাজতান্ত্রিক নীতির ভিত্তিতে মেয়েদের জীবনের নানান সমস্যা নিয়ে তাঁকে চিন্তা করতে হতো। বর্তমানে সোভিয়েট দেশে যে সমাজতান্ত্রিক আদর্শ পূর্ণতার

পথে এগিয়ে চলেছে, লেনিন জানতেন যে এই আদর্শকে যদি তার লক্ষ্য নিয়ে যেতে হয় তাহলে মেয়েদের ওপর পুরুষদের নির্বাধ শোষণের অবসান ঘটাতে হবে। শুধু শোষণই নয়, শ্রেণীবিভক্ত সমাজে নারী পুরুষের মধ্যে যত কম সামাজিক অসাম্য ও অগ্রায় মাথা উঁচিয়ে রয়েছে তাদেরকেও ঘা দিতে হবে শেষবারের মতন। শতাব্দী-ব্যাপী অচলায়তনের বিরুদ্ধে এমনি দৃঢ়তার সঙ্গেই সেদিন এগিয়ে এসেছিল লেনিনের বিপ্লবী নীতি। ১৯১৭ সালের পরবর্তী যুগে সোভিয়েট দেশে যে সব আইন প্রণয়ন করা হয়েছে, তাতেই তার কার্যকারিতার স্পষ্ট প্রমাণ মেলে।

জারের রাশিয়ার মেয়েরা সমস্ত রকম সামাজিক, রাষ্ট্রিক, অর্থনৈতিক ও রাজনীতিক অধিকার থেকে বঞ্চিত ছিল। বিশেষ করে স্বামীর সঙ্গে তাদের সম্পর্ক ছিল অত্যন্ত অপমানজনক। স্ত্রীরা ছিল স্বামীর কেনা বাদি। বিবাহিতা মেয়েদের পথে বেরোনোর কোনো স্বাধীনতা ছিল না। স্বামী ইচ্ছে করলে স্ত্রীকে যে কোনো লোকের কাছে বিক্রী করতে পারতো— তাতে তার কোনো আপত্তি তোলা চলত না। এমনিভাবে একজন বিবাহিতা মেয়ে যে ক'বার হাত বদল হতো তার ঠিক নেই। কারণ সে ছিল পুরুষের কেনা সম্পত্তি। মেয়েরা ইচ্ছে করলেও আদালত থেকে স্বামী-বিচ্ছেদের অনুমতি সহজে পেত না। যারা পেত তাদের অনেক কষ্ট স্বীকার করতে হতো; খোলা আদালতের সামনে খুলে বলতে হতো তাদের পরস্পরের জীবনের কুৎসিত ইতিবৃত্ত। কিন্তু অধিকাংশ মেয়েরাই এই অমর্যাদা মাথা পেতে নিতে পারত না। তাছাড়া গরীব মেয়েদের সামর্থ্যও ছিল না আদালতের খরচ জোগাবার।

সে যুগে বর-কনেকে গির্জায় গিয়ে বিয়ে করতে হতো এবং তাই ছিল একমাত্র আইনানুগ নিয়ম। ছেলেমেয়েদের ওপর বাপের ছিল সর্বপ্রথম

অধিকার^১। অবিশিষ্ট অবৈধ সন্তানের বেলায় মাকেই তার দায়িত্ব গ্রহণ কর্তে হতো ; আদালতের সাহায্য নেয়ারও কোনো অধিকার ছিল না তার ।

সোভিয়েট রাষ্ট্রব্যবস্থা কায়েম হবার পর এই সমস্ত আইনকানুন উচ্ছেদ করে নতুন নিয়মকানুন গঠন করা হল । এবং এই নিয়মে বিবাহ বা পরিবারগত সমস্ত ব্যাপারে মেয়েরা পেল পুরুষের সমান অধিকার । সুস্থ ও সবল সমাজ গড়তে হলে সবার আগে দরকার মানুষের পরিবার ও বিবাহিত জীবনকে দৃঢ়ভাবে নতুন আদর্শে সংগঠিত করা—সোভিয়েট কর্তৃপক্ষরা বুঝেছিলেন এর গুরুত্ব এবং সেই ভাবেই অগ্রসর হয়েছিলেন নরনারীর জীবনকে সমানাদিকারের ভিত্তিতে গড়ে তুলতে ।

সোভিয়েট সমাজে বিবাহিত জীবনের ক্ষেত্রে এই নীতিই সর্বপ্রধান । আগে স্বামীই ছিল পরিবারের কর্তা, তার ইচ্ছার ওপরই নির্ভর করতো পরিবারের ভালো-মন্দ, কিন্তু নতুন শাসনব্যবস্থায় স্বামীর সেই সংজ্ঞা সম্পূর্ণভাবে বদলে গেল ; এমন কি স্ত্রী বিয়ের পর স্বামীর পদবী গ্রহণ কর্তেও বাধ্য থাকল না । স্ত্রী ইচ্ছে করলে স্বামীর পদবী গ্রহণ করতে পারে বা তার নিজের পদবীও বজায় রাখতে পারে, তাতে কোনো আবশ্যিকতার কথা ওঠে না । স্বামী এবং স্ত্রীর তাদের ইচ্ছানুযায়ী যে কোনো পেশা বা কাজ গ্রহণ করার স্বাধীনতা রয়েছে । বিয়ের সময়ে তারা যদি কোনো সম্পত্তি লাভ করে তাতে তাদের দুজনেরই অধিকার আছে । বিয়ের আগে যদি দুজনেরই কোনো ব্যক্তিগত সম্পত্তি থেকে থাকে তার মালিকানা যৌথ নয়, সম্পূর্ণ পৃথক । সুতরাং বোঝা যাচ্ছে যে অন্যান্য দেশের মতন সোভিয়েট দেশে মেয়ে পুরুষ কোনো স্বার্থের খাতিরে বিয়ের বন্ধনে আবদ্ধ হয় না । যৌতুকের প্রলোভনে আজ আর কারো প্রবন্ধ

হওয়ার সম্ভাবনা নেই। আজ স্ত্রী পুরুষ ইচ্ছে করলেই রেজিস্ট্রেশন
 আপিসে গিয়ে তাদের নাম তালিকাভুক্ত করিয়ে বিয়ে করতে পারে।
 তার জ্ঞে কোনো ধর্মালুষ্ঠান বা আড়ম্বরের প্রয়োজন নেই। কিন্তু তাই
 বলে গির্জার দরজা বন্ধ হয়ে যায় নি। লোকে ইচ্ছে করলে সেখানে
 গিয়েও ঘটা করে বিয়ের অনুষ্ঠান সম্পন্ন করতে পারে। জারের যুগে
 গির্জায় মেয়েদের জ্ঞে সব চেয়ে নিকৃষ্টতম ও পশ্চাৎবর্তী জায়গা সংরক্ষিত
 থাকত, আজ সে বৈষম্য সম্পূর্ণভাবে লুপ্ত হয়েছে। আগে বিয়ের সময়ে
 পুরুষরা পরতো সোনার আংটি, মেয়েরা পরতো লোহার। এই ছিল
 সেদিনকার নিয়ম। আজ কিন্তু সে সব নিরমকানুনও চিরদিনের জ্ঞে
 অবলুপ্ত।

বর্তমানে সোভিয়েট ব্যবস্থার বিবাহ এবং বিচ্ছেদ দু'পক্ষের ইচ্ছার
 ওপর নির্ভর করে। তার ওপর রাষ্ট্রের অনুশাসনের কোনো চোখ
 রাঙানি নেই। কিন্তু তাই বলে এ সম্বন্ধে লঘু-চিত্ততার প্রশ্রয় দিতে
 সোভিয়েট কর্তৃপক্ষ একেবারে নারাজ। সমতা ও স্বাধীন ইচ্ছার
 বনিয়াদের ওপর সুস্থ ও সবল পরিবার গড়ে উঠুক—মানুষ যেন এই স্থির
 লক্ষ্য থেকে বিচ্যুত না হয়।

সোভিয়েট আইন অনুসারে দাম্পত্য-বিচ্ছেদ ঘটানোর আগে কেউ
 দ্বিতীয়বার বিয়ে করতে পারে না। এবং দাম্পত্য-বিচ্ছেদ কমানোর জ্ঞে
 প্রত্যেকবার দাম্পত্য-বিচ্ছেদের ওপর ক্রমবৃদ্ধি হারে সরকারী ফী আদায়
 করা হয় যেমন প্রথমবার ৫০ রুবল, দ্বিতীয়বার ১৫০ রুবল এবং
 তৃতীয়বার ৩০০ রুবল। ফলে কেউ অকারণে বা সামান্য কারণে বিবাহ-
 বিচ্ছেদে সাহসী হয় না।

সন্তান-পালনের সমস্ত দায়িত্ব ও খরচ সমানভাবে বাপ এবং মার
 ওপর পড়ে। যদি কোনো দায়িত্বহীন লোক তার পরিবারের গুরুভার

গ্রহণ কর্তে অনিচ্ছুক হয়—সেক্ষেত্রে রাষ্ট্র তাকে সন্তান-পালনের খরচের এক অংশ দিতে বাধ্য করে। * যতদিন সন্তান বয়ঃপ্রাপ্ত না হচ্ছে ততদিন পর্যন্ত এই অর্থদান আবশ্যিক। বৈধ, অবৈধ সমস্ত সন্তানের ক্ষেত্রেই একথা পুরোপুরি প্রযোজ্য। খোরপোষ অনাদায়ে অপরাধীকে কঠোর শাস্তি গ্রহণ করতে হয়। শুধু তাইই নয়, জনসাধারণের সামনে খোলাখুলিভাবে তার কীর্তিকলাপ জাহির করে কঠোর সমালোচনা করা হয়; দৈনিক ও সাময়িক পত্রিকায়ও এর বিরুদ্ধে নিয়মিত আন্দোলন চলে। যদি কখন দেখা যায় যে বিচ্ছেদের পর স্বামী বা স্ত্রীর মধ্যে কেউ অকর্মণ্য হয়ে পড়েছে তখন যে কর্মক্ষম সেই অপর পক্ষের জীবিকার খরচ বহন করে।

এই স্ত্রী-স্বাধীনতা শুধু যে পারিবারিক জীবনে বর্তমান তাই নয়, রাজনীতির বিস্তৃত ক্ষেত্রেও গিয়ে পৌঁছেছে এর ব্যাপ্তি। জীবনের সমস্ত ক্ষেত্রে যতদিন না পর্যন্ত মেয়েরা পুরুষের সমকক্ষ হয়ে অগ্রসর হতে পাচ্ছে ততদিন পর্যন্ত নতুন সমাজ-গঠনের পথে অসম্পূর্ণতা থেকে যাবেই।

- তাই সোভিয়েট আইনে আঠারো বছরের যে কোনো যুবতী জাতি ধর্ম নির্বিশেষে ভোট দেবার অধিকার পেয়েছে। সঙ্গে সঙ্গে সোভিয়েটের
- যে কোনো পরিষদে নির্বাচিত হওয়ার অধিকারও তার পূর্ণ মাত্রার বর্তমান।

জারের শাসনে মেয়েরা ছিল পুরুষের মুখাপেক্ষী। অর্থোপায়ের চাবিকাটি ছিল পুরুষদের হাতে। তারাই রোজগার করে আনতো এবং সেই অর্থের ওপরই নির্ভর করত মেয়েদের জীবনের সমস্ত

* বর্তমান আইন অনুসারে কোনো কোনো লোককে উপার্জনের শতকরা পঞ্চাশ ভাগ অর্থ দিতেও হতে পারে।

আশা আকাঙ্ক্ষা, স্মৃতি দুঃখ । আজ সেই পুরোনো নিয়ম বাতিল হয়ে গেছে । মেয়েরা পেয়েছে অর্থনৈতিক স্বাধীনতা ।

লক্ষ লক্ষ দরিদ্র, নির্যাতিত মেয়েরা এসে কাজ নিয়েছে কলকারখানায়, যৌথ কৃষিশালায়, সরকারী আপিসে ও নানান জন-কল্যাণকর প্রতিষ্ঠানে; তাই তারা অশিক্ষা আর কুসংস্কারের জীর্ণ বন্দীশালা থেকে বেরিয়ে এসে নতুন সাংস্কৃতিক ও সামাজিক ঔৎকর্ষের পথেও পা বাড়িয়েছে ।

দলে দলে কলকারখানায় যোগ দিয়ে মেয়েরা সত্যিকারের অর্থনৈতিক স্বাধীনতা লাভ করেছে । পরমুখাপেক্ষীতার প্রশ্ন আজ তাদের কাছে নেই । রন্ধনশালায়, দেয়ালের অঙ্ককার আশ্রয় থেকে সোভিয়েট সমাজব্যবস্থা তাদেরকে সত্যিকার মুক্তি দিয়েছে । কারণ লেনিন জানতেন “কোনো জাতি তার অধীক জনসংখ্যাকে রন্ধনশালায় আটক রেখে প্রকৃত স্বাধীনতা পেতে পারে না ।” তাই শহরে ও গ্রামে হাজার হাজার সাধারণ ভোজনাগার আজ কোটি কোটি সোভিয়েটবাসীকে খাওয়াবার দায়িত্ব নিয়েছে । তাতে শুধু যে মেয়েরাই লাভবর্তী হয়েছে তাই নয়, সমগ্র দেশ এই বিরাট জনসংখ্যাকে রন্ধনশালা থেকে মুক্তি দিয়ে সমৃদ্ধিশালী হতে পেরেছে ।

যে সব মেয়েরা কলকারখানায় কাজ করে তাদের ওপর রাষ্ট্র ও শ্রমিক সংঘের পক্ষ থেকে সজাগ দৃষ্টি রাখা হয় । বিশেষ করে সন্তানসম্ভবা মেয়েদের স্বাস্থ্যের ওপর । কলকারখানার প্রায় পঞ্চাশ রকম কাজ করা মেয়েদের পক্ষে নিষিদ্ধ কারণ সেই সব কাজের ফলে তাদের শারীরিক ক্ষতি হওয়া সম্ভব । কিন্তু এই নিষেধ চিরস্থায়ী নয় । বৈজ্ঞানিক উপায়ে যন্ত্রের ও কলকজার ক্রমোন্নতির সঙ্গে সঙ্গে এই নিষেধ উঠে যাবার সম্ভাবনা রয়েছে । সোভিয়েট দেশে বৈজ্ঞানিকরা দলবদ্ধভাবে গবেষণা করেন এবং তাদের গবেষণার ফলে যে কাজ করা মেয়েদের পক্ষে

ক্ষতিকর বিবেচিত হয়, সে কাজ মেয়েদের জন্তে নিষিদ্ধ করা হয়। ১৯৩১ সালে বৈজ্ঞানিক গবেষণার ফলে দেখা যায় যে আধ মণের (বিশ কিলোগ্রাম) বেশী ওজন বহন করা মেয়েদের স্বাস্থ্যের পক্ষে হানিকর। সেই বছরেই মেয়েদের জন্তে ২০ সেরের বেশী বোঝা বহন করা বে-আইনী বলে ঘোষণা করা হয়।

প্রত্যেক কারখানায় স্বাস্থ্য-ব্যবস্থা পরিদর্শন করার জন্তে বিশেষ পর্যবেক্ষক আছে যারা শ্রমিকদের স্বাস্থ্য-বিষয়ক সমস্ত সুবিধে অসুবিধে পরীক্ষা করে দেখে এবং প্রয়োজনীয় ব্যবস্থা অবলম্বন করে।

তাছাড়া সোভিয়েট শ্রমিকদের, বিশেষ করে মেয়ে-শ্রমিকদের স্বাস্থ্যরক্ষার প্রধান সহায় হল 'শ্রমিক আইন' ও সামাজিক বীমাব্যবস্থা। সোভিয়েটে কোনো কলকারখানায় সাত ঘণ্টার বেশী কাজ করা আইন-বিরুদ্ধ, এমন কি পরিশ্রমবহুল কাজে ছয় ঘণ্টার বেশী কাজ করা বে-আইনী। প্রত্যেক মেয়ে-শ্রমিকই পুরুষদের সমান মাইনে পায় এবং বছরে অন্তত দু সপ্তাহ করে ছুটি পায়। এ ছাড়া কাজ বিশেষে আরও ছুটির ব্যবস্থা আছে। অল্প দেশের মত সোভিয়েট মেয়ে-শ্রমিকদেরকে কারখানার হাড়ভাঙা খাটুনি খেটে জীবনপাত কর্তে হয় না। সুখ, স্বাচ্ছন্দ, প্রাচুর্য ও অবসরের মধ্যে তারা নতুন জীবনের ইমারৎ তৈরী করে।

সোভিয়েট বীমাব্যবস্থা শ্রমিকদের জন্তে এক নতুন স্বর্গের দ্বার খুলে দিয়েছে। অসুস্থতায়, দুর্ঘটনার বা চিরস্থায়ী পঙ্কুতায় এই বীমাব্যবস্থাই শ্রমিকদের জীবনের সমস্ত দায়িত্ব গ্রহণ করে। গর্ভাবস্থার আগে এবং পরে মেয়েদের এই বীমা ভাণ্ডার থেকেই অর্থ সাহায্য করা হয়। অল্প দেশের মতন শ্রমিকদের মাইনে থেকে একাংশ কেটে নিয়ে এই বীমা-ভাণ্ডার তৈরী হয় না। সোভিয়েট শ্রমিকরা এক পয়সা দিয়েও এই বীমা-ব্যবস্থাকে পুষ্ট করে না। কারখানা-কমিটিই কারখানার অর্থ

দিয়ে এই ভাণ্ডার গঠন করে। কোনো শ্রমিক মারা গেলে এই বীমা-ভাণ্ডার থেকে তার পরিবারকে অর্থদান করা হয়, মৃতদেহ সংস্কারের জন্তে সাহায্য দেয়া হয়, নতুন সন্তান জন্মাবার পর মায়ের প্রতি মাসে সন্তান-পালনের জন্তে অতিরিক্ত অর্থ দান করা হয়। শুধু তাই নয়, এই ভাণ্ডারের তরফ থেকেই সমস্ত শ্রমিক ও তাদের পরিবাররা বিনামূল্যে চিকিৎসা, স্বাস্থ্য-নিবাস ও বিরামাবাসে থাকার সুবিধে পেয়ে থাকে। ১৯৩৫ সালে সমস্ত সোভিয়েট দেশে ৬ কোটি ৭০ লক্ষ রুবলের ওপর অর্থ এই বীমাব্যবস্থার জন্তে ব্যয়িত হয়েছে। যারা এই ভাণ্ডারের অর্থে নানান স্বাস্থ্য-নিবাস ও বিরামাবাসে অবস্থান করেছে ১৯৩৮ সালে এখনি লোকের সংখ্যা হল ৫ লক্ষ ৫৫ হাজার। ১৯৩০ সাল পর্যন্ত সোভিয়েট যুক্তরাষ্ট্রে কিছু কিছু বেকার ছিল, তখন বীমা-ভাণ্ডার থেকেই তাদের নিয়মিত অর্থসাহায্য করা হতো। ১৯৩০ সালের পর সে সমস্যা অবিদ্যি নেই। বরং তার পর থেকে কর্মীর অভাব দেখা দিয়েছে।

প্রাক-বিপ্লব রাশিয়া ও অন্যান্য দেশের অবস্থা বিচার করলে দেখা যায় যে সুস্থ সমাজগঠনের পথে প্রবল অন্তরায় হল সে দেশে মাতৃত্ব ও সন্তান লালন-পালনের প্রতি রাষ্ট্রের অবহেলা। পেটের দায়ে মেয়েরা কলকারখানায় কাজ নেয়, হাড়ভাঙা পরিশ্রম করে দৈনন্দিন অন্ন সৎস্থান করে, বস্তিতে আলো হাওয়া পায় না, হাজার রকম অসুস্থতায় ভোগে, প্রয়োজনমতো চিকিৎসা পায় না। ফলে সুস্থ সন্তানের জন্ম দেয়া তাদের পক্ষে সম্ভব নয়। গর্ভপাত, অকাল-প্রসব, শিশু-মৃত্যু হল তাদের জীবনে অত্যন্ত সাধারণ ঘটনা। এই মারাত্মক অবস্থা থেকে মেয়েদের রক্ষা করার দায়িত্ব গ্রহণ করেছে সোভিয়েট রাষ্ট্র। সে যে কাজই করুক না কেন প্রত্যেক মেয়েই সন্তান প্রসবের আগে দু মাস এবং

পরে দু মাস করে পুরো বেতনসহ অবসর পেয়ে থাকে। তাছাড়া প্রসবের পর মায়েরা নানা রকম ছোট বড় সাহায্যও সরকারের কাছ থেকে পায় যা যে কোনো দেশের মেয়েদের চোখে স্বপ্নের সমান। শুধু আইন জারী করেই বসে নেই সোভিয়েট সরকার। বিস্তৃত পরিকল্পনা করে সারা দেশ জুড়ে সে হাজার হাজার শিশুসদন, কিন্ডারগার্টেন, খেলার-মাঠ ইত্যাদির ব্যবস্থা করেছে।

বিপ্লবের পর কয়েক বছর সোভিয়েট দেশকে এক অসহনীয় দুর্দশার মধ্যে দিয়ে যেতে হয়েছিল। এবং তার ফলেই ১৯২০ সালে আইন করে গর্ভপাত করার প্রয়োজনীয়তা স্বীকার করা হয়। কারণ তখন অনেক দারিদ্রক্লিষ্ট মায়েরা এ ছাড়া অন্য কোনো পথ ছিল না। এরই সাহায্যে দারিদ্রের কবল থেকে তারা রক্ষা পেয়েছিল কিন্তু বর্তমানে আইন জারী করে তা বন্ধ করা হয়েছে। কারণ আজ সোভিয়েটের মেয়েরা ভবিষ্যতের জন্তে কোনো রকম ভয় না করেই মা হিসেবে তাদের সমস্ত দায়িত্ব পালন করতে পারে।

এই হল সোভিয়েট সমাজব্যবস্থার বাস্তব রূপ। মেয়েদের জীবনে সমস্ত রকম সামাজিক ও রাজনৈতিক সমতা, দৃঢ় পারিবারিক বন্ধন, সমস্ত রকম কাজ কর্মে (শারীরিক ক্ষতিকারক কাজ বাদে) ও শিক্ষার দীক্ষায় সমান প্রবেশাধিকার এবং মাতৃত্বের প্রতি সমস্ত দৃষ্টি—এরই ভিত্তিতে প্রকৃত স্ত্রী-স্বাধীনতা ও নারী পুরুষের একাত্মতা গড়ে উঠেছে।

কর্মময় জীবনের অগ্রগতি

জারের আমলে-মেয়ে শ্রমিকদের সংখ্যা নেহাৎ কম ছিল না। পুরুষদের চেয়ে মেয়েদের অত্যন্ত অল্প মজুরীতে পাওয়া যেত বলে পুঁজিপতি মিল-মালিকরা তখন মেয়েদেরকেই কলকারখানায় কাজ দিত। পুরুষরা যা মজুরী পেত তার অর্ধেকেরও কম (অর্থাৎ শতকরা ৪৭'৭ ভাগ) পেত মেয়েরা। সুতরাং প্রত্যেক শিল্পাঞ্চলেই এর সুযোগ গ্রহণ কর্তে মিল মালিকরা ছাড়ে নি।

১৯০০ থেকে ১৯১৩ সাল। এই সময়ের মধ্যে হু হু করে বেড়ে উঠেছিল মেয়ে মজুরের সংখ্যা। ছিল ২,৫৯,০০০, গিয়ে দাঁড়ালো ৫, ৫৭, ৪০০ এ। ১৯১৩ সালের শেষের দিকে সংখ্যা আরও বাড়ল। অর্থাৎ সমস্ত রুশ দেশে মেয়ে মজুরদের মোট সংখ্যা হল ৬, ৩৬, ০০০। আর বেশীর ভাগ মেয়ে মজুরই হল কাপড়ের কলের দেখানো দুর্দশা ও খাটুনির অন্ত ছিল না।

১৯১৪ সাল থেকে আরম্ভ হল প্রথম সাম্রাজ্যবাদী যুদ্ধের আগুন। পুরুষরা চলে গেল মাঠে লড়াই-এর সৈন্য হয়ে। মেয়েরা গিয়ে জমল কলকারখানায়। ছয় লক্ষ ছত্রিশ হাজার থেকে আট লক্ষ আশি হাজারে গিয়ে দাঁড়ালো মেয়ে-শ্রমিকদের সংখ্যা। সংখ্যা বাড়ল কিন্তু দুর্দশা ঘুচল না এতটুকু। মজুরী কমল, কাজের ঘণ্টা বাড়ল; খাণ্ডদ্রব্য আক্রা হল, সঙ্গে সঙ্গেই পাল্লা দিয়ে বাড়ল অগ্নাণু জিনিসপত্রের দাম। লড়াই-এর ময়দানে দলে দলে প্রাণ দিল সৈন্তেরা। সাহায্যের অভাবে ঘরে ঘরে উপোসী রইল তাদের মা-বোন। এমনি এক শোচনীয় অবস্থার মধ্যে দিয়ে দিন কাটাতে হল রাশিয়ার দরিদ্র মেয়েদের।

শুধু অর্থনৈতিক অবস্থাই নয়, জারের শাসনে মেয়ে মজুরদের

সাংস্কৃতিক অবস্থাও ছিল অত্যন্ত হতাশাপূর্ণ। ১৯১৮ সালে শতকর পঞ্চাশ জন মেয়ে মজুরও অক্ষর চিনতে পারত না।

১৯১৭ সালে বিপ্লবের সাফল্য কিন্তু এক নতুন ঘোষণা পাঠাল, মেয়ে মজুরদের ঘরে ঘরে, চাষী-মেয়েদের কুটিরে কুটিরে। বহু যুগের কালো শাসনের পালা শেষ হল—এবার বৈপ্লবিক জাগৃতির অভাঁদর বিপ্লবের প্রথম বছরেই শহরে ও গ্রামে গড়ে উঠল শিশুসদন, কিণ্ডারগার্টেন ও সাধারণ ভোজনাগার। গার্হস্থ্য জীবনের সমস্ত খাটুনি আর বোঝা থেকে মুক্তি পেয়ে মেয়েরা পুরুষদের সমান স্বাধীন হয়ে দাঁড়াল।

কিন্তু বহু যুগের শাসন আর অত্যাচার, অবনতি আর অপমানের গ্লানি মেয়েদের মন থেকে সরে যেতে সময় নিল। যে সাংস্কৃতিক, অর্থনৈতিক ও সামাজিক বিপর্যয় তাদের জীবনে একমাত্র সত্য হয়ে দাঁড়িয়েছিল, সেই বুটো সত্যকে দূর করবার জন্তে দরকার হয়ে পড়ল আমূল পুনর্গঠনের। এই পুনর্গঠনের জন্তে ১৯১৭ থেকে আজ পর্যন্ত সোভিয়েট দেশকে নানান পরীক্ষা ও প্রক্রিয়ার মধ্য দিয়ে যেতে হয়েছে। বিপ্লবের পর ১৯১৮ থেকে ১৯২১ সাল পর্যন্ত সামরিক সমাজতন্ত্রের (war communism) যুগ। ঘরে এবং বাইরে দেশী-বিদেশী দুঃমনরা নবজাতক সোভিয়েটকে ছিঁড়ে খাবার জন্তে উত্তত হল। চোদ্দটি বিদেশী জাতির সৈন্যেরা পা বাড়ালো আতুড়-ঘরে নতুন সম্ভাবনাপূর্ণ শিশুকে হত্যা কর্তে। সে দিন সোভিয়েটবাসীর জীবনে এক মহা দুর্যোগ! হাজার হাজার মজুর চাষীর ছেলে লালফৌজে যোগ দিয়ে যুদ্ধ কর্তে গিয়েছে মরদানে; মেয়েরা ঘর সামলাচ্ছে সজাগ হয়ে। কাঁচামাল নেই—কলকারখানা বন্ধ। মিলের বাঁশী শুদ্ধ হয়ে গিয়েছে। ঘরে ঘরে ধুঁকছে বেকার মেয়েরা।

১৯২১ সালের পর ভালো হল অবস্থা। কথা উঠল নতুন অর্থনৈতিক ব্যবস্থার পত্তন হবে.....ঘরে ঘরে কাজ পাবে, কুটি পাবে দেশের প্রত্যেকটি মানুষ; গ্রহযুদ্ধ-বিধ্বস্ত দেশকে পুনর্গঠিত করা হবে নতুন ভাবে। ১৯২৭ সালে বাস্তবে প্রবর্তিত হল 'নতুন অর্থনৈতিক ব্যবস্থা'। তার ধরের বছরেই বৃদ্ধি পেল মেয়ে-শ্রমিকদের সংখ্যা। ছয় লক্ষ ছত্রিশ হাজার থেকে এক লাফে সাত লক্ষ, উনোষাট হাজার তিন শোয়। শুধু কলকারখানাতেই নয়, সমাজের বিভিন্ন শাখায় ধীরে ধীরে এগিয়ে এল মেয়েরা।

সুতরাং দেখা যাচ্ছে যে প্রাক-বিপ্লব যুগের তুলনায় সোভিয়েট ব্যবস্থার আওতায় হাজার হাজার মেয়েরা এগিয়ে এসেছে কর্মক্ষেত্রে। মেয়েদের এই অগ্রগতি অত্যন্ত তাৎপর্যপূর্ণ। কেননা ১৯১৭ সালের আগে মালিকরা কলকারখানার মেয়েদের কাজ দিত এই কারণে যে তাঁদের অত্যন্ত অল্প মজুরীতে পাওয়া যেত। ফলে হাজার হাজার টাকা মুনাফা লুটতে পারত কল-মালিকরা কিন্তু বিপ্লবোত্তর যুগে মেয়ে পুরুষ শ্রমিকদের মজুরীর মধ্যে কোনো পার্থক্য থাকল না। সমান মজুরী ধার্য হল সবার জন্তে। অর্থাৎ অল্প মজুরী বা মুনাফা নয়, সমাজ-জীবনের বিস্তৃতির মধ্যে অসংখ্য মেয়েদেরকে টেনে আনাই হল এই অগ্রগতির তাৎপর্য। এবং সে কারণেই ১৯২৮ সালের মধ্যে ২, ৫৭, ০০০ শিশু সদন ও ৪, ৫০, ০০০ কিণ্ডারগার্টেন খোলা হল সমস্ত দেশে; ৭, ৫০, ০০০ লোকের আহারের ব্যবস্থা হল সাধারণ ভোজনাগারে।

এরই সঙ্গে সঙ্গে চলতে লাগল তুমুল শিক্ষার আয়োজন। প্রথম দিকে মেয়ে-শ্রমিকদের অধিকের বেশী ছিল নিরক্ষর। কিন্তু পঞ্চ-বার্ষিকী পরিকল্পনার প্রথম বছরেই তা কমে গেল আশাতীতভাবে। একশো জনের মধ্যে ৮৪'২ ভাগ মেয়ে লেখাপড়ায় পারদর্শিনী

হয়ে উঠল। দলে দলে বিভিন্ন শিল্প-শিক্ষালয়ে গিয়ে ভর্তি হল তারা। সাধারণ শ্রমিক হয়ে থাকলে চলবে না—দেশের খাতিরে, তাদের নিজেদের ভবিষ্যতের খাতিরে, তাদের আধুনিক বৈজ্ঞানিক শিল্প-শিক্ষায় সুদক্ষ হয়ে উঠতে হবে—একথা মনে প্রাণে বুঝল তারা।

প্রথম পঞ্চবার্ষিকী পরিকল্পনা অনুযায়ী সোভিয়েট দেশকে সমাজতান্ত্রিক নীতি মার্কিন গড়ে তোলার চেষ্টা হল। এই অতিকায় প্রচেষ্টাকে সফল করে তোলার জন্তে সে দিন সারা দেশের লোক কি ভাবে আলোড়িত ও উৎসাহিত হয়েছিল তা তাদের কর্মোদ্যম ও সাফল্য থেকেই প্রমাণিত হয়েছে। এই প্রচেষ্টার ডাকে সর্বহারা মেয়েরা পুরুষদের সঙ্গে এগিয়ে এসেছিল সমানভাবে। এবং বিভিন্ন কর্মক্ষেত্রে সমাজতান্ত্রিক মনোভাবে অনুপ্রাণিত হয়ে তাদের কর্মস্পৃহার প্রমাণ দিয়েছিল।

পাঁচ বছর পরে দ্বিতীয় পঞ্চবার্ষিকী পরিকল্পনা গ্রহণ করা হল। গতবারের তুলনায় এই পরিকল্পনা আরও বৃহৎ, আরও সম্ভাবনাময়। গত পাঁচ বছরে যে সব জিনিস তৈরী হল সে সব জিনিসকে ঠিক মত কাজে লাগানো হল এই পরিকল্পনার অগ্রতম কর্মসূচী। এর পর সমাজতান্ত্রিক উৎপাদন বৃদ্ধি, কলকারখানা, যন্ত্র ইত্যাদি নির্মাণ এবং শ্রমিকদের অবস্থার উন্নতি, এ হল দ্বিতীয় পরিকল্পনার প্রধান লক্ষ্য। সুতরাং এই বিপুল প্রচেষ্টাকে সফল করার জন্তে মেয়েদের অপরিহার্যতা আরও বৃহৎভাবে স্বীকৃত হল।

কলকারখানা বাদে অগ্নাত কাজকর্মে মেয়েদেরকে নেয়ার প্রধান বাধা ছিল একটা। অনেক কাজেই এতটা শারীরিক শ্রমের প্রয়োজন হতো যে মেয়েদের পক্ষে তা সম্ভব ছিল না। সুতরাং প্রথম এবং দ্বিতীয় পঞ্চ-বার্ষিকী পরিকল্পনায় শতকরা আশি ভাগ শারীরিক শ্রম-চালিত কাজগুলি যাতে বিজ্ঞানসম্মত উপায়ে যন্ত্রচালিত হতে পারে তার ব্যবস্থা হল।

বর্তমানে অবিশিষ্ট সোভিয়েট ইউনিয়নে এ ব্যাপারে প্রভূত উন্নতি সাধিত হয়েছে ।

কলকারখানা বা শারীরিক শ্রমসাপেক্ষ অগ্নাত কাজ ছাড়াও মেয়েদেরকে শিল্প-কর্মে শিক্ষিত করে তোলা হয়েছে । ফলে নিষ্ক্রিয় হয়ে বসে নেই মেয়েরা । ১৯৩৭ সালের হিসাব থেকে দেখা যায় যে ৯৪,০০,০০০ মেয়ে সোভিয়েট দেশের নানান কাজে কর্মে নিযুক্ত আছে । ১৯৩৫ সালের একটি হিসাবে মেয়েদের কাজের নিম্নলিখিত সংখ্যাগুলি পাওয়া যায় :

| | |
|--|-----------|
| বড় বড় কলকারখানায় | ২৬,২৭,০০০ |
| নির্মাণকার্যে | ৪,৫০,০০০ |
| বানবাহনে | ৩,৮৪,০০০ |
| বাণিজ্য ও সাধারণ ভোজনাগারে | ৮,২২,০০০ |
| শিক্ষা, স্বাস্থ্য ও রাষ্ট্র পরিচালনায় | ১৯,৭৮,০০০ |
| কৃষিকার্যে | ৬,৮৫,০০০ |

জারের আমলে চার পঞ্চমাংশ মেয়ে-শ্রমিক কাজ করত কাপড়ের কলে ; প্রথম মহাযুদ্ধের সময়ে সে সংখ্যা গিয়ে দাঁড়িয়েছিল দুই তৃতীয়াংশে । কিন্তু প্রথম পঞ্চবাধিকী পরিকল্পনা কার্যকরী হওয়ার সঙ্গে সঙ্গে অবস্থা বদলে গেল আগাগোড়া । মেয়েরা অগ্নাত কাজকর্ম পাওয়ার সুযোগ পেল । ফলে ১৯৩৫ সালের মাঝামাঝি কাপড়ের কলে মেয়ে-শ্রমিকদের সংখ্যা দাঁড়ালো এক তৃতীয়াংশেরও কম (৩১.৭ ভাগ), বাকী যারা তারা সবাই পুরুষ । অতীদিকে শ্রমবহুল কাজকর্মে মেয়েদের সংখ্যা বাড়ল । কেমিক্যাল, লোহা কারখানা, বিদ্যুৎ কল—এই সব কাজে ধীরে ধীরে আকৃষ্ট হল মেয়েরা ।

সোভিয়েট মেয়েদের উন্নতির পেছনে এর গুরুত্ব অনেকখানি কারণ বর্তমানে মেয়েরা শুধুমাত্র শ্রমিকই নয়, তারা একেকটি বিষয়ে বিশেষজ্ঞা

হয়ে উঠেছে ।° ফলে দেশের উৎপাদনী ক্ষমতা বৃদ্ধি পেয়েছে অনেকগুণ । সঙ্গে সঙ্গে বৃদ্ধি পেয়েছে তাঁদের আর্থিক স্বচ্ছলতা, তাদের সংসারের স্বাচ্ছন্দ্য, তাদের স্বাস্থ্য । কয়েক বছর আগে তারা কিংবা তাদের বাপ মা যে সংকীর্ণ দৃষ্টি দিয়ে দারিদ্র-জীর্ণ পংকিল সমাজকে উপলব্ধি করতো, তাকে অভিশাপ দিত, সে সমাজ গেছে বদলে, তাদের সেই হলদে ফ্যাকাশে দৃষ্টি হয়েছে অনেক বড়, অনেক উজ্জল ।

সমবায় শিল্পে মেয়েদের ভূমিকা বিশেষভাবে উল্লেখযোগ্য । প্রথম পঞ্চ-পরিকল্পনা কার্যকরী হওয়ার সময়ে (১৯২৮ সালে) সমবায় শিল্পে কাজ করত ২,৬৫,০০০ মেয়ে । পরিকল্পনা সমাপ্তির সময়ে (১৯৩৩ সালে) দেখা গেল মেয়ে-কর্মীর মোটসংখ্যা হল ৭,০২,৬০০ ।° সমস্ত রকম হাতের কাজ এই সমবায় সংঘের মারফতই পরিচালিত হয়ে থাকে ।

সোভিয়েট কৃষিকার্যের দিকে তাকালে আরও বেশী অবাক হতে হয় । কারণ সমাজতন্ত্র কৃষিক্ষেত্রে এক অভূতপূর্ব পরিবর্তন এনেছে ; পর্বনির্ভর-শীল মেয়েদেরকে দিয়েছে আর্থিক ও সামাজিক স্বাভাব্যতা ।

আগের দিনে একেকটা চাষী পরিবার খণ্ড খণ্ড জমিতে পুরোনো প্রথাগত জরাজীর্ণ হাল বলদ নিয়ে চাষ করত । না ছিল চাষীদের জলসেচ বা সারের ব্যবস্থা, না ছিল তাদের ফসল বোনা বা কাটা ঝাড়ার কোনো যন্ত্র । কান পর্যন্ত তারা ডুবে থাকত দেনায়—কৃষিগণ আর খাজনার বোঝায়, অনাহারে আগুন জ্বলত তাদের পেটে, জমিদার ও তার পাইক বরকন্দাজদের জুলুমে অতিষ্ঠ হয়ে ভিটে ছাড়তে হতো তাদের । এমনি এক মর্মান্তিক অবস্থায় ডুবে ছিল কৃষিসমাজের আপাদমস্তক ।

সোভিয়েট সমাজ প্রতিষ্ঠিত হওয়ার পর জমিদাররা নিশ্চিহ্ন হল আর জোতদারদের ক্ষমতা হ্রাস পেল । শোষণের বিষদাঁতগুলো ভেঙে গেল তাদের । তারপর ধীরে ধীরে কার্যকরী হল যৌথ প্রথাগত চাষ করার

নীতি । বড় বড় যৌথ ও সরকারী কৃষিশালা গড়ে উঠতে লাগল । ক্রমে ক্রমে সংঘবদ্ধ হল চাষীরা । জেলায় জেলায় বসল ট্রাকটর ও অগ্ন্যাগ্নি যন্ত্রাদির স্টেশন । দলে দলে ছেলেমেয়েরা ট্রাকটর, কম্বাইন ও অগ্ন্যাগ্নি কৃষিযন্ত্র চালাতে শিখতে আরম্ভ করল । সমস্ত সোভিয়েট কৃষিব্যবস্থা জুড়ে হল এক প্রকাণ্ড বিপ্লব ।

১৯২৯ সাল পর্যন্ত শতকরা মাত্র ৪.৯ ভাগ কৃষিক্ষেত্র যৌথ কৃষিব্যবস্থার আওতার আনা গিয়েছিল কিন্তু দশ বছরের মধ্যে (১৯৩৮ সালে) শতকরা ৯৯.৩ ভাগ চাষের জমি যৌথকৃষিক্ষেত্রে (সোভিয়েট ইউনিয়নে ‘কলখজ’ বলা হয়) পরিণত হয়েছে । ১৯২৮ সালে সরকারী খামারের (সোভিয়েট ইউনিয়নে ‘সভকজ’ বলা হয়) সংখ্যা ছিল ১,৪০৭ । নয় বছর পরে তা দাঁড়িয়েছে ৩,৯৯২ এ । এই অবস্থান্তরের মুখে মেয়েরা বিপুল উৎসাহের সঙ্গে এসে যৌথ কৃষিশালায় সভ্য হয়েছে ।

তবু প্রথম দিকে কৃষক-মেয়েদের মধ্যে যৌথ-কৃষিপ্রণী সম্বন্ধে উপযুক্ত সচেতনতা লক্ষ্য করা যায় নি । শৃংখলার অভাব, কাজে অনিয়মিত উপস্থিতি এবং কম কাজ—এরই মধ্যে দিয়ে লক্ষ্য করা গিয়েছিল এর গুরুত্বের প্রতি তাদের ঔদাসিন্য । কিন্তু ১৯৩৩-৩৫ সালের মধ্যে আগাগোড়া বদলে গেল তাদের দৃষ্টিভঙ্গী । তাদের সহযোগিতা, কর্মক্ষমতা এবং শৃংখলা আরো দৃঢ় হয়ে প্রকাশ পেল । আগল ভেঙে বেরিয়ে এল সব বয়সের মেয়েরা । এর ফলে কি শুধুই আর্থিক স্বাভাব্য পেল তারা ? তা নয়, সমস্ত সামাজিক মর্যাদায় মাথা উচিয়ে তারা পুরুষের পাশে গিয়ে দাঁড়ালো । শিক্ষার দীক্ষায় তারা আজ উপযুক্ত হয়েছে পুরুষের পাশে দাঁড়াবার । যৌথ কৃষিব্যবস্থাই সোভিয়েট মেয়েদের জীবনে এই অভাবনীয় পরিবর্তন আনতে পেরেছে ।

১৯২৯-৩০ সাল পর্যন্ত সোভিয়েট দেশে মোট ১৭ লক্ষ ৭২ হাজার বেকার

ছিল। তার মধ্যে প্রায় অর্ধেক ছিল মেয়ে-বেকার। আবার এই মেয়ে-বেকারদের অধিকাংশই ছিল গ্রামাঞ্চলের। গ্রামে অন্ন সংস্থানের কোনো ব্যবস্থা না হলে তারা ছুটতো শহরের দিকে। কিন্তু যৌথ কৃষি-প্রথাষ চাষ হওয়ার পর ১৯৩০ সাল থেকে এ সমস্যা সম্পূর্ণভাবে ঘুচে গেল। যৌথ খামারের একশো জনের মধ্যে ৩৭ জন হল মেয়ে কর্মী। ভবিষ্যতের প্রতি তাদের অগাধ আত্ম-বিশ্বাস এবং বৃত্তি নির্বাচন ব্যাপারে নির্বাধ স্বাধীনতা তাদের জীবনে এক নতুন পরিচ্ছেদের সূচনা করেছে। আসল কথা সোভিয়েট রাষ্ট্রের সমাজতান্ত্রিক পরিকল্পনা তাদেরকে আকর্ষণ করতে পেরেছে বলেই তারা এগিয়ে এসেছে নির্ভয়ে ৫

খাওয়ার সুবন্দোবস্ত, পরবার কাপড়, থাকবার বাড়ী, ছুটিতে বাইরে যাওয়ার ব্যবস্থা, নিখরচায় ছেলেমেয়েদের বাধ্যতামূলক শিক্ষা, শিশু সন্তানদের অর্থসাহায্য, প্রমুখিদের জন্তে দীর্ঘ ছুটি ও রাষ্ট্রের কর্তৃত্বে দেখাশোনা, বিনামূল্যে চিকিৎসার ব্যবস্থা, আমোদ প্রমোদ ও সাংস্কৃতিক অনুষ্ঠান—দরিদ্র মেয়েদের জীবনে এক নিশ্চিতি এনেছে।

• এর সঙ্গে সঙ্গে পদোন্নতি ও অর্থোন্নতি তো আছেই।

সোভিয়েট বিপ্লবের পর থেকে যে সব মেয়েরা কলকারখানায় এসে যোগ দেন তাদের মধ্যে অধিকাংশই হল খাঁটি মজুর যারা জ্বারের আমলে পুঁজিপতিদের যাতাকলে কাজ করত। তা ছাড়া সাধারণ মধ্যবিত্ত ঘর থেকেও মেয়েরা এগিয়ে আসে। গ্রামাঞ্চল থেকেও এগিয়ে আসে অনেকে। গার্হস্থ্য জীবনের সংকীর্ণ পরিমিতি পেরিয়ে সমাজের রাজপথে এসে দাঁড়ায় তারা, যেখানে মানুষের সৃজনী শক্তি জীবনের নতুন উপনিবেশ আবিষ্কার করে চলেছে। “এ আমাদের দেশ, আমাদের ঘর বাড়ী, আমাদের সমাজ, একে নতুন পথে গঠন করার দায়িত্ব আমাদের” এমনি সমাজমুখী দৃষ্টিভঙ্গী গড়ে ওঠে প্রত্যেকটি মানুষের মধ্যে।

সমাজতান্ত্রিক প্রতিযোগিতা (socialist competition) হল উৎপাদন বৃদ্ধির এক প্রধান হাতিয়ার। এই হাতিয়ারের সাহায্যে সোভিয়েট দেশের উৎপাদন জগতে এক অবিস্মৃত যুগান্তর এসেছে। প্রত্যেক কারখানায় কারখানায় এই প্রতিযোগিতা হয়; শ্রমিকরা যোগ দেয় দলে দলে। কে সবচেয়ে বেশী উৎপাদন বাড়াতে পারে, কে কলকলার উন্নতি সাধন করে যন্ত্রের গতি বাড়াতে পারে—এই নিয়ে লড়াই। পুরুষদের সঙ্গে সঙ্গে মেয়েরাও এই প্রতিযোগিতায় অগ্রণী হয়েছে। বয়নশিল্পী এভ্‌ডোকিয়া ও মেরিয়া ভিনোগ্রাডোভা, অডিট্‌জোভা, ফাদীভা ও বুননকল-শিল্পী ফেডেরোভার নাম সর্বত্র উল্লেখযোগ্য। এঁরা সারা সোভিয়েট দেশে ‘শক্-ওয়ার্কার’ বলে খ্যাত।

এই প্রতিযোগিতার আন্দোলনকে ‘স্টাখানোভ আন্দোলন’ বলা হয়ে থাকে। ১৯৩৬ সালে ডন বেসিনের কয়লা খনির শ্রমিক আলেক্সাই স্টাখানোভ প্রথম এই উৎপাদন বৃদ্ধির আন্দোলনে অগ্রণী হন এবং তারপর তাঁরই নামে এই আন্দোলন সমগ্র সোভিয়েট ইউনিয়নে ছড়িয়ে পড়ে। এই আন্দোলনের উদ্দেশ্যই হল উৎপাদনের সাধারণ হার ও গতিকে অতিক্রম করা। এই হার ও গতি অতিক্রম ও রেকর্ড স্থাপনের প্রধান মূলধন হল শ্রমিকের সাংস্কৃতিক ও সৃষ্টিশীল ক্ষমতা।

কৃষিজগতেও মেয়েদের দান অসামান্য। প্রতি বছর কৃষিক্ষেত্রে যে ফসল বৃদ্ধি পাচ্ছে তার পেছনে মেয়েদের পরিশ্রম ও আন্তরিকতা অপরিণীম। ১৯৩৫ সালে পাঁচশো লোকের সহযোগিতায় যে কৃষি আন্দোলন আরম্ভ হয় তার নেতৃত্ব করে মেরিয়া ডেমচেংকো নামে একটি মেয়ে। সে সময়ে এক হেক্টরের (প্রায় আড়াই একর) জমিতে ১৩,২০০ পাউণ্ড বীট উৎপন্ন হতো। আন্দোলনকারীরা সেখানে ৫০,০০০ পাউণ্ড বীট ফলাতে দৃঢ়প্রতিজ্ঞ হন।

সোভিয়েট এশিয়ার (উজবেকিস্তান, তাজিকিস্তান, তুর্কমেনিস্তান ও কাজাকিস্তান প্রভৃতি জায়গায়) যৌথ কৃষিশালা ও তুলো ক্ষেতেও এমনি আশাপ্রদ ফল পাওয়া গিয়েছে । বিপ্লবের আগে মধ্য-এশিয়ার মেয়েরা ছিল পুরুষদের বাদি । ঘর ছেড়ে তাদের বাইরে বার হওয়ার কোনো স্বাধীনতা ছিল না । সোভিয়েট আমলে কিন্তু তারা নতুন শিক্ষা ও মর্যাদার অধিকারিণী হয়েছে । তুলো চাষের সমস্ত রীতিনীতি সম্বন্ধে তারা বিশেষজ্ঞা হয়ে উঠেছে । ১৯৩৫ সালে তারা তুলো উৎপাদনে রেকর্ড সৃষ্টি করে । গো-প্রজনন ব্যাপারেও তারা তেমনি বুদ্ধিবৃত্তির পরিচয় দেয় ।

সুতরাং দেখা যাচ্ছে যে সমাজ-চেতনা ও রাজনৈতিক জ্ঞান লাভের সঙ্গে সঙ্গেই মেয়েরা কর্মবহুল উৎপাদন জগতের প্রতি আকৃষ্ট হয়েছে । তবু অত্যন্ত সহজে এই রূপান্তর এলো মনে করলে ভুল করা হবে । সোভিয়েট কতৃপক্ষকে রীতিমত সংগ্রাম চালিয়ে, পুরোনো ধ্যান ধারণার পরিবর্তন ঘটিয়ে এর পথ তৈরী করতে হয়েছে । প্রাক-বিপ্লব যুগে পুরুষদের মধ্যে, বিশেষ করে কৃষকদের মধ্যে এই ধারণা বদ্ধমূল ছিল যে মেয়েরা হল সমাজের জঞ্জাল, মেয়েরা হল অস্পৃশ্য, অপবিত্র, কেবল সন্তান সৃষ্টি করাই তাদের কাজ ; দেশের ভালো মন্দের ওপর তাদের কথা বলার অধিকার নেই কোনো । এই মতের সঙ্গে লড়তে হয়েছে বলশেভিকদের, সোভিয়েট দেশের প্রগতিবাদীদের । প্রচণ্ড সংগ্রামের পর ধীরে ধীরে গোঁড়া কৃষকরা মেনে নিয়েছে যে স্টালিনের কথাই ঠিক—‘যৌথ কৃষিক্ষেত্রে মেয়েরাই হল প্রবল শক্তি ।’

শ্রমশিল্পে মেয়েদের ক্রমবৃদ্ধি

প্রাক-বিপ্লব যুগে কলকারখানায় কাজ করার সঙ্গে বিপ্লবোত্তর সমাজে শ্রমিক-পরিচালিত শ্রমশিল্পে কাজ করার অনেক তফাৎ আছে। জার-শাসিত ও বিদেশী মূলধন-কবলিত (১৯১৭ সালের আগে ব্রিটিশ, মার্কিন, জার্মান ও ফরাসী পুঞ্জিপতিরাই ছিল রুশ শ্রমশিল্পের আসল মালিক) আধা সামন্ততান্ত্রিক শ্রমিক সমাজের সঙ্গে ১৯১৭ সালের পরবর্তী বৈপ্লবিক পরিবর্তন-সাধনকে নতুন দৃষ্টিকোণ দিয়ে বিচার করে, দেখতে হবে। আগে জারের পরিবার ছিল রুশ সাম্রাজ্যের গোটা মালিক, দেশী ও বিদেশী মিল-মালিকরা ছিল সমস্ত কলকারখানার একচ্ছত্র অধিপতি ; শ্রমিকরা * ছিল সকলের পায়ের নীচে। দেশের ভালো-মন্দ, বর্তমান ও ভবিষ্যৎ নির্ধারণ করার দায়িত্ব ছিল না তাদের কাঁধে, বরং নিজেদের দেশে তারা ছিল পরদেশী। সুতরাং মাথার ঘাম পায়ে ফেলে, শারীরিক শ্রম পরের দোরে বিক্রী করে, দৈনিক ১১ ঘণ্টা (কোনো কোনো কারখানায় ১৮ ঘণ্টা পর্যন্ত পরিশ্রম করতে হতো) পরিশ্রম করে তারা তাদের জীবিকা আহরণ করতো। এই জীবিকা-আহরণ সম্পূর্ণভাবে তাদের নিজেদেরকে বাঁচিয়ে রাখার জন্তেই। তখনকার রাশিয়ার মর্মান্তিক বিপর্যয়ের পরিমাণ জানতে হলে আমাদের নিজেদের দেশের দিকে তাকিয়ে দেখলেই হবে। চাকরির জন্তে কাড়াকাড়ি, রুটির জন্তে কাড়াকাড়ি, সামান্য গ্রাষ্য অধিকার পাওয়ার জন্তে কাড়াকাড়ি—এই অমানুষিক কাড়াকাড়িই হল সাম্রাজ্য-কবলিত ভারতবর্ষের ইতিহাস।

নতুন সমাজব্যবস্থা প্রতিষ্ঠিত হওয়ার সঙ্গে সঙ্গে সমস্ত রাশিয়া এক নতুন দিকে মোড় নিল। মানুষের মনে জন্মালো এক নতুন মূল্যবোধ, এক

নতুন সমাজচেতনা যে এ দেশ আমার—এ দেশের জল, মাটি, হাওয়ার ওপর প্রত্যেকটি মানুষের সমান অধিকার; এ কলকারখানার মালিকানা আর কোনো পুঁজিপতির নয়, দেশের প্রত্যেকটি লোকের; এ জমির এ কণা মাটিও জমিদার বা জোতদার কেউ স্পর্শ করতে পারবে না, হাল যার সেই সোনা ফলাবে এই মাটিতে। অতএব হুঁসিয়ার সোভিয়েট দেশের নাগরিক! আজ সত্যি সত্যিই জনগণের রাষ্ট্র প্রতিষ্ঠিত হয়েছে। কোনো রকম গাফিলতি না দেখিয়ে জোর কদমে অগ্রসর হও তোমার কাজে।

মেয়েরা ছিল সব চেয়ে পিছিয়ে, তাই সব চেয়ে এগিয়ে এল তারাই। কলকারখানার নানান রকম কাজকর্মে বিশেষজ্ঞা হয়ে ওঠার জন্তে তাদের মধ্যে অদম্য উৎসাহ দেখা গেল। কারণ শিল্পশিক্ষার পেছনে সামাজিক ও রাজনৈতিক তাৎপর্য অনেকখানি। শিল্পজগতে মেয়েদের পশ্চাৎবর্তিতা সম্পূর্ণভাবে দূর না হওয়া পর্যন্ত সত্যিকার মুক্তি ও সমতা সম্ভব নয়। একজন পারদর্শিনী মেয়ের পক্ষেই শিল্প, সমাজ ও শিক্ষা জগতে পুরুষের সমকক্ষ হওয়া সম্ভব কারণ তার পারদর্শিতাই তার জন্তে সভ্য জীবনে এক নতুন অধ্যায়ের সূচনা করবে।

এই কারণে সোভিয়েট কর্তৃপক্ষ মেয়েদেরকে কলকারখানায় টানার সঙ্গে সঙ্গে তাদেরকে শিল্পশিক্ষায় শিক্ষিত করে তুলেছে। কেন্দ্রীয় কার্যকরী সমিতির তৃতীয় অধিবেশনে বিশেষ করে এ সম্বন্ধে দীর্ঘ আলোচনা হয় এবং স্থির হয় যে যদি সোভিয়েট দেশের ভবিষ্যৎ শিল্পজীবনে মেয়েদের সহযোগিতার প্রয়োজনীয়তা থাকে তাহলে তাদের শিল্প ও ব্যাপক শিক্ষার দিকে সমস্ত দৃষ্টি দিতে হবে।

বিপ্লবপূর্ব যুগে যে সমস্ত মেয়ে-শ্রমিক ছিল, তাদের না ছিল কোনো শিল্পশিক্ষা, না ছিল কোনো দক্ষতা। তারা সবাই ছিল কাজ-না-জানা

বা আধা-কাজ-জানা মজুর। শুধু শিল্পজগতে নয় সমস্ত জাতীয় জীবনে এই ছিল তাদের একমাত্র পরিচয়। সুতরাং নারীসমাজের এই প্রকাণ্ড অংশকে শিল্পশিক্ষা দেয়ার গুরুদায়িত্ব এসে পড়ল সোভিয়েট কর্তৃপক্ষের ওপর।

দেখা যায় যে ১৯২৭ সাল এমন কি ১৯৩০-৩২ সাল পর্যন্ত মেয়েদের টেকনিক্যাল শিক্ষা পুরুষদের তুলনায় অনেক কম ছিল। ফলে দলে দলে মেয়েরা কলকারখানায় যোগ দিলেও বেশীর ভাগ মেয়েই আধা-কাজ-জানা এবং কাজ-না-জানা স্তরে থেকে গিয়েছিল, উচ্চ শিল্পের কাজে পুরুষের সমকক্ষ হতে পারে নি। কিন্তু এমন অনেক কাজে মেয়েরা যোগ দিয়েছিল যে কাজ আগে কোনো দিন তারা করে নি। ১৯২৭-এ শতকরা মাত্র ১.৬ ভাগ মেয়ে কৃষি-যন্ত্র বিভাগে কাজ করত; ১৯৩৪ সালে তা বেড়ে ২৫.৫ ভাগ হল। ধাতুশিল্পে চুল্লীঘরের কাজ বিপদজনক বলে মেয়েদের জুতো নিষিদ্ধ কিন্তু কপিকল ওঠানো নামানোর কাজে মেয়ে-শ্রমিকের সংখ্যা কম নয়। ১৯২৭ সালে একটি মেয়েও বিদ্যুৎ-উৎপাদন ঘরে কাজ করত না কিন্তু ১৯৩৪-এ সেখানকার ফিটারদের মধ্যে শতকরা তের ভাগ এবং প্রধান সুইচবোর্ড কর্মীদের মধ্যে বত্রিশ ভাগ হল মেয়ে। ১৯২৬ সালের শেষ দিকে মাত্র ৯০০ জন মেয়ে-মজুর নির্মাণকার্যে নিযুক্ত ছিল। চার বছর পরে তার সংখ্যা স্ফীত হ'ল ১৭,০০০ হাজারে দাঁড়ালো। এমনভাবে সমস্ত রকম যানবাহনের কাজে, কলে কারখানায়, আপিসের কাজকর্মে এক অভাবনীয় উৎসাহ ও উদ্দীপনা লক্ষ্য করা গেল।

সোভিয়েট শ্রমশিল্পে শ্রমিকদের ছেলেমেয়েদের দান নিতাস্ত অল্প নয়। কিশোর কিশোরীরা সাত বছর সাধারণ শিক্ষা পাওয়ার পর অর্থাৎ ১৫ বছর বয়সে যে কোনো কারখানা, যানবাহন বা কৃষি-শিক্ষাকেন্দ্রে গিয়ে

ভর্তি হতে পারে। এই বয়সেই অনেকে স্থির করে, তারা ভবিষ্যতে কী হবে, কোন্ বৃত্তি গ্রহণ করবে এবং সেই আকাঙ্ক্ষা অনুযায়ী তারা শিক্ষালাভ করে। যে সব ছাত্রছাত্রীরা উচ্চ শিক্ষা পেতে চায় তারা বিদ্যালয়ে গিয়ে কৃতিত্ব অর্জন করে। এই শিক্ষাকেন্দ্রগুলির কাজ কিন্তু অত্যন্ত দায়িত্বপূর্ণ কারণ এই কেন্দ্রগুলির ওপরই শিল্প-জগতের উন্নতি ও অগ্রগতি নির্ভর করে। ১৯৩৩ সালের হিসাব থেকে দেখা যায় যে সে বছরে শিল্প-শিক্ষাকেন্দ্রে মোট ছাত্র ছাত্রীর সংখ্যা ছিল ৯,৫৮,৯০০। তার মধ্যে ছাত্রীর সংখ্যা হল ১, ৬২, ৮০০। অত্যাগত ধনতন্ত্রী দেশগুলির দিকে যদি তাকিয়ে দেখা যায় তাহলে দেখতে পাওয়া যাবে যে সে দেশগুলিতে কত অপ্রাপ্তবয়স্ক ছেলেমেয়েরা শিক্ষার অভাবে, দারিদ্রের তাড়নায় কলকারখানায় কুলি মজুরের কাজ নেয় এবং কোনো রকমে তাদের জীবিকা নির্বাহ করে। তাদের শিক্ষাদীক্ষা, স্বাস্থ্য, ভবিষ্যৎ সব কিছু অন্ধকারাচ্ছন্ন। আমাদের নিজেদের দেশেও তার ভুরি ভুরি প্রমাণ মিলবে। কয়লা-খাদ্যের মেয়েমজুরদের দিকে তাকিয়ে দেখলে বোঝা যাবে যে তাদের মধ্যে কত অপ্রাপ্তবয়স্ক কিশোরীরা জীবনপাত করে রুটির সংস্থান করছে; দুর্নীতির আবর্তে নিশ্চিহ্ন হয়ে গিয়েছে তাদের সাধারণ মানবিক ও নৈতিক মূল্যবোধ। কিন্তু সোভিয়েট দেশে অপ্রাপ্তবয়স্ক ছেলেমেয়েদের কোনো রকম শ্রমসাধ্য কাজ করা আইনবিরুদ্ধ।

শিল্প-শিক্ষাকেন্দ্রগুলিতে ছাত্রীদের সংখ্যা ও আগ্রহ লক্ষ্য করে ১৯৩১ সালে সোভিয়েট কর্তৃপক্ষ এক নতুন আইন জারী করেন যে, প্রত্যেক শিক্ষাকেন্দ্রে ছাত্রছাত্রীর সংখ্যা সমান সমান হবে অর্থাৎ পঞ্চাশ ভাগ ছাত্র এবং পঞ্চাশ ভাগ ছাত্রী—এই ভাবে গঠিত হবে শিল্প-শিক্ষা কেন্দ্রগুলি। ১৯৩৫ সালে কৃষি-শিক্ষাকেন্দ্রেও এই আইন বলবৎ হয়।

শিল্প-শিক্ষা জগতে মেয়েদের এই অভাবনীয় উন্নতির পেছনে আছে কলকারখানায় কাজ করার জন্তে এক প্রচণ্ড আগ্রহ ও নতুন কাজ শেখার জন্তে দুর্দমনীয় উৎসাহ। আগেকার সময়ে মেয়ে-শ্রমিকরা নিজেদের যোগ্যতা বা দক্ষতা বৃদ্ধির ব্যাপারে কিছুমাত্র আগ্রহ নিত না কারণ তারা ভাবত যে, আজ এ কাজে আছি, কাল চলে যাবো অন্য কাজে। দক্ষতা বাড়িয়ে আর কী এমন লাভ হবে? মজুরী যা পাবার তাই পাবো, কোনো মালিক এক পয়সা বেশী দেবে না আমাদের দক্ষতা দেখে। আসলে পেটের দ্বায়েই তারা কারখানায় ঢুকতো।

নতুন যুগে বদলে যেতে লাগল সেই দৃষ্টিভঙ্গী। টাইপরাইটিং, কাপড় সেলাই—এমনি সব হালকা কাজগুলো ছেড়ে মেয়েরা শ্রমসাধ্য কাজে যেতে চাইল। শ্রমিক পরিবারের মেয়েরা হতে চাইল টার্নার, মিলিং কাটার। এই চেতনার মধ্যে সমাজমুখী মনের এক নতুন বিষ্কার চোখে পড়ল।

প্রথম পঞ্চ-বার্ষিকী পরিকল্পনার শেষ দিকে “ইলেকট্রোকম্বিনাৎ” নামে মস্কোর এক শিল্প-শিক্ষাকেন্দ্রে পরীক্ষা গ্রহণ করে দেখা যায় যে ছাত্রীদের ফলাফল ছাত্রদের সমতুল্য। ছাত্রদের তুলনায় ছাত্রীরা কোনো অংশে নিকৃষ্ট নয়। ১৯৩৫ সালে বড় বড় কলকারখানায় আট লক্ষ শ্রমিকদের টেকনিক্যাল পরীক্ষা নেয়া হয় কারণ সেই বছর থেকেই প্রত্যেক শ্রমিকের ন্যূনতম দক্ষতার স্তর নির্ধারণ করা হয়। এবং এই ন্যূনতম দক্ষতা প্রত্যেক শ্রমিকের জন্তে আবশ্যিক। সেই পরীক্ষার ফলাফলেও মেয়ে-শ্রমিকরা পুরুষদের সমান দক্ষতার পরিচয় দিয়ে বেরিয়ে আসে। শুধু তাই-ই নয়, কয়েকটা বিষয়ে তারা পুরুষদেরকেও অতিক্রম করে যায়। ১৯৩৬ সালে যন্ত্রনির্মাণ, ধাতুশিল্প, কয়লাখনি ও কাপড় কলেও টেকনিক্যাল

পরীক্ষার আয়োজন হয় এবং মেয়েদের কর্মক্ষমতা ও দক্ষতা পূর্ণমাত্রায় প্রমাণিত হয়।

এই জ্ঞান আহরণের আন্দোলনে শুধু যে কিশোরী ও যুবতীরা এল তাই নয়, বৃদ্ধাদের মধ্যেও নতুন আশার স্ফূরণ দেখা গেল। ইয়ার্টসেভ কারখানার চুয়ান বছরের এক বৃদ্ধা বয়নশিল্পী এগিয়ে এসে বললে “আমি চুয়ান বছরের বৃদ্ধী হয়েছি বটে তবু লেখাপড়া শিখতে চাই আমি।” শিল্প-শিক্ষাকেন্দ্রগুলি যে একমাত্র ছাত্র-ছাত্রীদের মধ্যে সীমাবদ্ধ তাই নয়, কারখানার কাজের পর অনেক শ্রমিকই এই শিক্ষাকেন্দ্রগুলিতে এসে শিক্ষা গ্রহণ করে।

সোভিয়েট দেশে গুণগত এবং পরিমাণগত “হৃদিক থেকেই মেয়ে-শ্রমিকদের দক্ষতা প্রমাণিত হয়েছে। এবার তাদের পারিশ্রমিক সম্বন্ধে খবর নেয়া যাক। অনেক জায়গাতেই দেখা গেছে যে স্ত্রী পুরুষ উভয়ই সমান মজুরী পায়। আবার কতক ক্ষেত্রে দেখা গিয়েছে যে মেয়ে-শ্রমিকরা পুরুষদের তুলনায় বেশী অর্থ পেয়ে থাকে যেমন যন্ত্র-নির্মাণের কাজে, কাপড়ের কলে। এরকম প্রায়ই দেখা গিয়েছে যে একটি অনভিজ্ঞা মেয়ে কারখানায় কাজ নিয়ে হঠাৎ কয়েক বছরের মধ্যে সবদিক দিয়ে রীতিমত বড় শিল্পী হয়ে উঠেছে আর সারা দেশময় ছড়িয়ে পড়েছে তার নাম।

১৯৩৪ সালে স্টালিনের কাছে লেনিনগ্রাদের মেয়ে-শ্রমিকদের এক দিঠি থেকে জানা যায় যে টুলা ফ্যাকট্রিকে বারো হাজার কিলোওয়াটের এক জলচক্র (turbine) তৈরী করে দেয়ার দায়িত্ব রেড পুটিলভ ফ্যাকট্রির এক বিভাগের ওপর এসে পড়ে। এই জলচক্র তৈরী করার জন্যে বিশেষ দক্ষতা ও অভিজ্ঞতার প্রয়োজন। আইভানোভা ও শ্চাক্নভ্‌স্কায়া নামে দুটি মেয়ে এর নেতৃত্ব গ্রহণ করে এবং অত্যন্ত

যোগ্যতার সঙ্গে নির্দিষ্ট সময়ের মধ্যে অর্ডারটি সম্পাদন করে। ১৯৩১ সালে এই আইভানোভা ছিল কাজ-না-জানা মেয়েদের দলে।

কিছুদিন আগে পর্যন্ত মস্কো শহরে পরিচারিকার কাজ করত তেরা ভাগিনা। তার গ্রাম ববরিকীতে নতুন কারখানা তৈরী হচ্ছে শুনে সে সেখানে কাজ নেয়। কাজ করার সঙ্গে সঙ্গে সে সাধারণ শিক্ষা ও যন্ত্র-বিদ্যা আয়ত্ত্ব করবার জন্তে আপ্রাণ পরিশ্রম করে। তিন বছর পরে এমোনিয়া কারখানার নির্মাণকার্যে তাকে স্থানান্তরিত করা হয় এবং সেখানে কমপ্রেসারের কাজ দেয়া হয়। এই কাজে সক্রিয় ‘শক ওয়ার্কারের’ যোগ্যতা দেখানোর ফলে ‘অর্ডার অব দি ব্যানার অব লেনিন’ উপাধি উপহার দেয়া হয় তাকে।

আইভানোভা কাপড় কলের ক্লডিয়া বুইকোভার নামও কম উল্লেখযোগ্য নয়। ১৯২৬ সালে যখন সে গ্রাম থেকে আইভানোভায় আসে তখন একেবারে অশিক্ষিতা ছিল সে। লেবার এক্সচেঞ্জ তাকে পার্টিয়ে দেয় ফেলিক্স জারঝিন্স্কি কারখানায়। সেখানে সকলের দৃষ্টি আকর্ষণ করে সে। ১৯২৭-এ কার্টিম জড়ানোর কাজে তাকে স্থানান্তরিত করা হয়। কাজের সঙ্গে সঙ্গে সে সাধারণ ও টেকনিক্যাল শিক্ষা গ্রহণ করে। অল্প সময়ের মধ্যে সে তার বিভাগের অধ্যক্ষ হিসাবে নিযুক্ত হয় এবং ছাব্বিশটি বিশেষ পুরস্কার লাভ করে। ইয়ং কম্যুনিষ্ট লীগের পঞ্চদশ বার্ষিকীতে সরকার থেকে তাকে ‘অর্ডার অব দি লেনিন’ উপাধি দান করা হয়।

প্রথম পঞ্চবার্ষিকী পরিকল্পনায় এমনি কত মেয়ে যে তাদের কৃতিত্বের জন্তে পুরস্কৃত হয়েছে তার ঠিক নেই। এবং এই কৃতিত্বের পরিমাণ প্রতিদিন বেড়ে চলেছে। সঙ্গে সঙ্গে বেড়ে চলেছে ‘শক-ওয়ার্কার’এর সংখ্যা। সমাজতন্ত্রী সমাজে এই অগ্রণী মেয়েরাই হল পথ প্রদর্শক। উৎপাদন

জগতে এই যুগান্তকারী পরিবর্তনের ফলেই সমাজের প্রত্যেকটি লোকের সমস্ত চাহিদা মেটানো সম্ভব হয়েছে। এবং উৎপাদন বৃদ্ধির সঙ্গে সঙ্গে এই চাহিদাও বৃদ্ধি পাচ্ছে। যেমনি মানুষের অর্থনৈতিক অবস্থার উন্নতি হচ্ছে তেমনি প্রসারিত হচ্ছে তার প্রয়োজন; আরও বেশী হাত পা ছড়িয়ে সে বাঁচতে চাইছে তার ক্রমবর্ধমান পরিমিতির মধ্যে।

সোভিয়েট দেশে মানুষের সংখ্যা ও তার চাহিদার হিসাব নিয়ে উৎপাদনের পরিকল্পনা গ্রহণ করা হয়। অগ্ন্যাগ্ন দেশের মতন শ্রমিকদের ফাঁকি দিয়ে, খরিদারের পকেট কেটে এবং প্রতিযোগীর সঙ্গে পাল্লা দিয়ে ব্যক্তিগত মুনাফার জন্তে মাল উৎপন্ন হয় না সোভিয়েটে। তাই যখন শ্রমিকরা উৎপাদন বাড়ায় তখন তারা এই ভেবেই উৎপাদন বাড়ায় যে এই উৎপন্ন মাল তাদের এবং সমগ্র দেশবাসীর কল্যাণে লাগবে..... কোনো মুনাফাখোর মিল মালিক বা ব্যবসাদার লুটবে না এর লাভ : সোভিয়েট দেশের উৎপাদনের পেছনে এই সমাজতান্ত্রিক চেতনাই হল প্রধান মূলধন। এই মূলধনকে আশ্রয় করেই এগিয়ে চলেছে স্টাখানোভ আন্দোলন।

১৯১৭ থেকে ১৯৪৬ সাল—এই ২৯ বছরে সমস্ত সোভিয়েট দেশের শ্রমশিল্পের ধারা আগাগোড়া পালটে গেছে। পুরোনো কালের ছোট ছোট হস্তচালিত যন্ত্রগুলো উঠে গিয়ে বসেছে নতুন নতুন বৈদ্যুতিক যন্ত্র। যে সোভিয়েট দেশ বিপ্লবের অব্যবহিত পর পর্যন্ত বড় বড় যন্ত্রের জন্তে বিদেশের দিকে তাকিয়ে ছিল, সেই সোভিয়েট দেশেই তৈরী হচ্ছে সমস্ত রকম ভারী ভারী যন্ত্র। অর্থাৎ তিরিশ বছর আগেকার অশিক্ষিত, অভুক্ত ও আনাড়ী শ্রমিকরাই যন্ত্র জগতে এই বিপ্লব এনেছে যা অন্য কোনো দেশ পারে নি।

কিন্তু শ্রমিকদের এবং সমস্ত মানুষের জীবনের এই বৈপ্লবিক পরিবর্তনের

পেছনে মূল কথা হল অর্থনীতির পুঁজিবাদী রূপ পালটে যাওয়া। অর্থাৎ যে উৎপাদন-যন্ত্র সমস্ত দেশের গতি ও প্রকৃতিকে নিয়ন্ত্রিত করছিল তার হস্তান্তর ঘটল। মুষ্টিমেয় কলমালিকদের হাত থেকে সমস্ত উৎপাদন-যন্ত্র চলে এল শ্রমিকদের হাতে যারা হল যন্ত্রের প্রকৃত চালক। সাধারণ মানুষের সঙ্গে উৎপাদন-যন্ত্রের যে অস্বাভাবিক, সম্বন্ধ ধনতান্ত্রিক যুগে রচিত হয়েছিল তা আর থাকল না। সুতরাং দেখা যাচ্ছে যে সমাজতান্ত্রিক পরিবর্তনসাধনের বড় কথা হল রাজনৈতিক বিপ্লবের সঙ্গে সঙ্গে অর্থনৈতিক বিপ্লব। এই অর্থনৈতিক বিপ্লব বাদে কোনো দেশই সোভিয়েট রাষ্ট্রের মত সমৃদ্ধির অধিকারিণী হতে পারে না।

যৌথ কৃষিশালার মেয়েরা

কৃষিকাজ হল সোভিয়েট দেশের অগ্রতম কৃতিত্ব। আগেকার দিনে আমাদের ভারতবর্ষের কৃষকদের মতই রাশিয়ার ঋণগ্রস্ত ও দারিদ্র-ক্লিষ্ট কৃষকেরা ছোট ছোট জমিতে আলাদা আলাদা ভাবে চাষ করত, তাও অত্যন্ত প্রাচীন প্রথা। যে সব জোতদারদের হাতে অনেক জমি এবং পয়সা তারা ক্ষেতমজুর রেখে চাষ করাতো। হাল বলদ ধার করে, সারের অপেক্ষা না রেখে চলত সেদিনকার চাষবাস, কিন্তু ব্যক্তিগত ছোট ছোট জমিতে বিভক্ত হয়ে চাষ করার অসুবিধে অনেক এবং বর্তমান যুগে তা সম্ভবও নয়। কারণ নতুন যুগের সঙ্গে সঙ্গে, বিজ্ঞানের অগ্রগতির সঙ্গে সঙ্গে সমাজব্যবস্থাও পরিবর্তিত হচ্ছে। আবার এরই সঙ্গে সঙ্গে নতুনভাবে গঠিত হচ্ছে মানুষের চিন্তাধারা, পালটাচ্ছে তার হাতিয়ার। সুতরাং সাধারণ অগ্রগতির সাথে পাল্লা দিয়ে কৃষিব্যবস্থারও যে একটা পরিবর্তন আসবে তা সহজেই বোঝা যায়। যদি অগ্রাগ্র দেশের বর্তমান অবস্থা অনুযায়ী একেকটি কৃষক তার আর্থিক ও শারীরিক সামর্থ মাসিক আলাদা আলাদা জমিতে চাষ করে তাহলে বৈজ্ঞানিক যন্ত্রের সাহায্য নেয়া ও ফসলবৃদ্ধির প্রশ্ন কল্পনারও বাইরে। কারণ ঐ কয়েক হাত জমিতে কোথায় চলবে ট্রাকটর, কোথায় বসবে কম্বাইন, কি ভাবে যন্ত্র দিয়ে বীজ বোনা হবে জমিতে আর কী করে ফসল কাটা হবে যন্ত্রের সাহায্যে? আর তাছাড়া কৃষকের পক্ষে কি ঐ যন্ত্রগুলি কেনা সম্ভব? কারণ যে কৃষক জমিদারের খাজনা দিতে ও পরিবারের অন্তবস্ত্র জোটাতে পারে না, যে কৃষক ঋণ করে ও ধান কর্জ করে কৃষিকাজ চালায়, সেই কৃষকের চোখে ঐ দানবীয় বৈজ্ঞানিক যন্ত্রগুলি এক প্রকাণ্ড দুঃস্বপ্ন। অথচ ঐ বৈজ্ঞানিক যন্ত্রগুলির উপযুক্ত ব্যবহার না করেও উপায় নেই। মানুষকে

শৃংখলমুক্ত করে নতুন সুখ, সম্পদ, সমৃদ্ধি ও বিশ্রামের অধিকার দিতে হবে। এই সমস্যার ব্যাপক সমাধান হয়েছে সোভিয়েট দেশে।

১৮৬০ সাল পর্যন্ত রুশ সাম্রাজ্যে ছিল দাস-প্রথার অপ্রতিহত প্রভাব। মানুষের ব্যক্তিত্ব বলে কোনো পদার্থ সেদিন জন্মাতে দেয়া হয় নি দাসদের মধ্যে। নির্দিষ্ট জায়গা ছেড়ে কোথাও যাওয়ার অধিকার ছিল না দাসদের। প্রভুরা জমি বিক্রী করলে সেই জমির সঙ্গে সঙ্গে দাসেরাও হস্তান্তরিত হয়ে যেত নতুন প্রভুর হাতের মুঠোর মধ্যে। কিন্তু প্রবল আন্দোলনের ফলে ১৮৬০ সালে দাস-প্রথার জীর্ণ শিকল ভেঙে গুঁড়ো গুঁড়ো হয়ে যায়। অপেক্ষাকৃত স্বাধীন পরিবেশের মধ্যে এসে মানুষের মনে নতুন ব্যক্তিত্ববোধ জন্মগ্রহণ করে। তবু ওপরআলার অর্থনৈতিক শোষণ তাদের বাঁকানো শিরদাঁড়াকে সোজা হতে দিল না। হাল যার, প্রকৃত পক্ষে জমির মালিক হল না সে। চাষীরা হয়ে রইল চিনির বলদ। সোভিয়েট বিপ্লব এই চিনির বলদদের জীবনে সত্যিকারের মুক্তির ঘোষণা নিয়ে এল। বিপ্লবের পর হতে জমিদার এবং গির্জা কারো দখলে এক কাঠা জমিও থাকল না। বিনা ক্ষতিপূরণে সে জমিগুলি কেড়ে নিয়ে কৃষকদের মধ্যে বিলি করে দেয়া হল। রাতারাতি চল্লিশ কোটি একরের বেশী জমির মালিক হয়ে বসল কৃষকরা। এতদিন প্রতি বছর পঞ্চাশ কোটি রুবল খাজনা দিতে হচ্ছিল এখন তারা সেই গুরুভার থেকে মুক্ত হল।

কিন্তু নতুন সমাজের অগ্রদূত বলশেভিকরা শুধু জমি বিলি করেই বসে রইল না। কৃষকদের বোঝালো যে পুরোনো প্রথায় চাষ করলে চলবে না। যুগ পালটেছে, সঙ্গে সঙ্গে তোমাদের চাষের রীতিনীতিও পালটাতে হবে। ফসল ফলাতে হবে দশগুণ। কারণ তোমরা এতদিন মজুরদেরকে, সাধারণ দরিদ্র মানুষদেরকে আধপেটা খাইয়ে এসেছো;

তাদেরও পরসী ছিল না, তোমাদেরও গোলায় ফসল ছিল না, কিন্তু এখন পেট ভরে খাওয়াতে হবে প্রত্যেকটি মানুষকে ; তোমরাই হলে অন্নদাতা । অতএব ছোট ছোট জমির টুকরোগুলোকে এক করে ফেলে বড় বড় খামার তৈরী করো এবং সেখানে যৌথ প্রথায় কাজ করো তোমরা সকলে । যৌথ খামারের যারা যারা সভ্য হবে তারা সকলেই হবে তার মালিক । সকলেই সমান ফলের অধিকারী হবে । ‘প্রত্যেকে সকলের জ্ঞে এবং সকলে প্রত্যেকের জ্ঞে’ এই নীতিতে ফসল বাড়বে বহুগুণ ও তোমাদের পরিশ্রমও লাঘব হবে । আমরা রাষ্ট্র থেকে তোমাদের ট্রাকটর দেব, কম্বাইন দেব, বীজ বোনবার জন্মে ও জল দেবার জন্মে যে সব যন্ত্র লাগে দেব । তোমরা যাতে গ্রাঘ্য দাম পাও তার সমস্ত ব্যবস্থা করব; তোমাদের ঘরে ঘরে বিজলী বাতি পৌছে দেব, নতুন ঘর বানাবার জন্মে মালমশলা দেব, যানবাহনের ব্যবস্থা করব গ্রামে । গ্রামে, তোমাদের প্রত্যেকটি নিত্য প্রয়োজনীয় জিনিসের চাহিদা মেটাতে সে দিন অত্যাচারিত, নিগৃহীত কৃষকদের জীবনে এক নতুন ঐশ্বর্যের আলো বিস্ফারিত হয়ে উঠল ! তবু বহু দিনের কুসংস্কারাচ্ছন্ন কৃষক-সমাজ সহজে এই প্রস্তাব গ্রহণ করে নি । হাজার দ্বিধা-দ্বন্দের মধ্যে দোল খাবার পর তারা ধ্রুব সত্যকে স্বীকার করে নিয়েছিল । কারণ বহু যুগের আত্মকেন্দ্রিক মনোভাব, ব্যক্তি স্বাতন্ত্র্যের প্রতি পাশবিক মমতা . . . একে ছাড়িয়ে উঠে নতুন সমাজতান্ত্রিক আদর্শে জীবনের গতিপথ নিয়ন্ত্রিত করা নিতান্ত সহজ প্রক্রিয়া নয় ।

প্রথম পঞ্চবার্ষিকী পরিকল্পনার সময়ে কৃষিক্ষেত্রে সমগ্রীকরণের নীতি প্রথম কার্যকরী করা হল । কৃষকদেরকে নতুন যুগের তাৎপর্য বোঝানো হল, সমাজতান্ত্রিক চেতনার কথা বোঝানো হল । উৎপাদন-যন্ত্রের হস্তান্তরের সঙ্গে সঙ্গে সমাজের প্রত্যেকটি রীতিনীতিকে যুগোপযোগী করে তুলতে

হবে একথা কেউ তখনই বুঝল, কেউ দেবীতে বুঝল। যারা তখনই বুঝল তারা অগ্রসর হল যৌথ খামারের কাজে। ১৯২৯ সালে তাই দেখা গেল যে ৪৯ ভাগ (প্রায় কুড়ি ভাগের এক ভাগ) কৃষিক্ষেত্র যৌথ খামারের নীতি অনুযায়ী পরিচালিত হচ্ছে। অর্থাৎ অগ্নাত কৃষকদের সামনে এই খামারগুলি এক নতুন কৃষিসমাজের ছবি তুলে ধরল। ব্যক্তিগত কৃষিকাজের সঙ্গে সমষ্টিগত কৃষিকাজের তুলনা করবার একটা সুযোগ পেল সাধারণ কৃষকরা। কারা কম পরিশ্রমে বেশী ফসল উৎপন্ন করেছে ; কারা বেশী প্রাচুর্য, স্বাচ্ছন্দ ও ঐশ্বর্যের মধ্যে বাস করেছে ? সাধারণ কৃষকরা উঁকি মেরে মেরে দেখল, গোপনে এবং প্রকাশে আলোচনা করল, যৌথ খামারের ঐশ্বর্য দেখে দেখে হিংসে করল। বুঝল ওরাই ঠিক। ভুল করেছে তারাই। সমগ্রীকরণের তাৎপর্য তারা হৃদয়ংগম কর্তে আরম্ভ করল। অতীতকে বাড়তে লাগল যৌথ খামারের সংখ্যা।

১৯৩৩ সালের জানুয়ারী মাসে সোভিয়েট ইউনিয়নের কম্যুনিষ্ট পার্টির সপ্তদশ অধিবেশনে কমরেড স্টালিন বলেন—“আদর্শস্থানীয় গিজা, সম্মুখপটে কুলাক,* পাদ্রী ও পুলিশদের বড় বড় প্রাসাদ ও পশ্চাৎ পটে কৃষকদের আধ-ভাঙা জরাজীর্ণ কুঁড়ে-ঘর পরিবেষ্টিত পুরোনো গ্রামগুলি ক্রমে ক্রমে নিশ্চিহ্ন হয়ে যাচ্ছে। তার জায়গায় গড়ে উঠছে নতুন গ্রাম, তার বড় বড় বাড়ী, ক্লাব, বেতার, চলচ্চিত্র, স্কুল, গ্রন্থাগার ও শিশু-সদন, তার ট্রাকটর, কম্বাইন, মাড়াইকল ও অগ্নাত যন্ত্র। গ্রামের একসময়কার নামকরা প্রতিপত্তিশালী ব্যক্তি শোষণকারী কুলাক, রক্তশোষক মহাজন, মুনাফাখোর ব্যবসায়ী ও ‘ক্ষুদে বাপ’ পুলিশরা অদৃশ্য হয়ে গিয়েছে। যৌথ খামার, সরকারী খামার, স্কুল ও ক্লাবের নেতৃ-

* ধনী কৃষক

স্থানীয় কর্মী, ট্রাকটর ও কম্বাইনের প্রধান চালক, গো-মেষ পালন কেন্দ্রের কর্মী এবং যৌথ খামারের ‘শক-ওয়ার্কার’—এখন এরাই হল গ্রামের প্রভাবশালী ব্যক্তি।”

কমরেড স্টালিনের বক্তৃতা থেকে কৃষিসমাজের বিশাল পরিবর্তনের ছবি চোখে পড়ে। আর চোখে পড়ে এক ক্ষমিষ্ট সমাজের ভাঙনের সাথে সাথে এক নতুন সমাজগঠনের গতিছন্দ।

দ্বিতীয় পঞ্চবার্ষিকী পরিকল্পনার শেষে ১৯৩৮ সালে শতকরা প্রায় ৯৯.৩ ভাগ কৃষিক্ষেত্র যৌথ খামারের অন্তর্ভুক্ত হল। ট্রাকটর, কম্বাইন, মাড়াই কল, ডাইনামো ও যানবাহনের শব্দে মুখরিত হয়ে উঠল প্রত্যেকটি গ্রাম। কানে এল নতুন মানবতার জন্মের গান।

কৃষিক্ষেত্রের সমগ্রীকরণ মেয়েদের জীবনেও এক ব্যাপক পরিবর্তন আনলো। জারের রাজত্বে আইনকানুন ও সামাজিক প্রথার শিকল লাগানো ছিল তাদের সর্বাঙ্গে। কৃষক-মেয়েদেরকে মাঠে ও বাগানে ভয়ানক পরিশ্রম করতে হতো, গরুবাছুর দেখাশোনা করতে হতো এবং সংসারের সমস্ত কিছু কাজ করতে হতো। বাড়ীর কর্তাই ছিল তাদের একচ্ছত্র মালিক ও স্বামীর মারপিট ছিল তাদের দৈনন্দিন পুরস্কার। অশিক্ষা, সাধারণ জ্ঞানের অভাব এবং অত্যাচার, পুরোনো রাশিয়ায় এই ছিল কৃষক-মেয়েদের ছবি।

যৌথ কৃষিব্যবস্থা এক ব্যাপক মুক্তির আনন্দ আনলো তাদের জীবনে। পুরুষদের সমান নাগরিক ও রাজনৈতিক অধিকার পাবার সঙ্গে সঙ্গে অর্থনৈতিক স্বাধীনতা পেল তারা। যৌথ খামারে কাজ অনুযায়ী পুরুষদের সমান বেতন ধার্য হল তাদের জন্মে। ইতিহাসে এই সর্বপ্রথম কৃষক-মেয়েরা শিক্ষিত হয়ে স্বচ্ছন্দ জীবন যাপনের অধিকারিণী হল।

কৃষক-মেয়েরা যৌথ খামারে কী কী কাজ করে থাকে ?

১৯৩০-৩২ সালে অল্পসংখ্যক মেয়েরাই খামারে কাজ করত, তাও বিশেষ করে ফসল বোনা ও ফসল কাটার সময়ে। ১৯৩২ সালে হিসাব করে দেখা গেছে যে বড় জোর শতকরা ২০-৪০ ভাগ মেয়ে খামারের কাজে নিযুক্ত ছিল, তাও আবার সারা বছর নয়। বাকী মেয়েরা খামারের কাজকর্ম নিয়ে কিছুমাত্র মাথা ঘামাত না। উপরোক্ত যে বিশ-চল্লিশ ভাগ মেয়ে কাজ করত, তারা ছিল ‘কাজ-না-জানা’ কর্মীদের পর্যায়ে। তাদেরকে মাঠের সাধারণ কাজগুলি দেয়া হতো। ট্রাকটর কি অগ্ন্যাগ্ন যন্ত্র চালানোর ব্যাপারে পুরুষরাই ছিল সর্বজ্ঞ। কারণ তখনও মেয়েরা যন্ত্রবিদ্যা সম্বন্ধে কিছুমাত্র শিক্ষা পায় নি। এমন কি ছুধের ব্যবসায় ও গো-মেষ পালনের কাজেও মেয়েরা খুব সামান্য অংশই গ্রহণ করত। পুরুষরাই দেখা শোনা করত গরু বাছুর। আবার তারাই যেত হাটে বাজারে।

সুতরাং দেখা যাচ্ছে যে ১৯৩২ সাল পর্যন্ত মেয়েরা কেবলমাত্র বিশেষ বিশেষ সময়ে খামারে কাজ করত এবং তাও ‘আধা-কাজ-জানা’ বা ‘কাজ-না-জানা’ মজুরের কাজ। খামারের আগিস চালনা বা হিসাব লেখার কাজেও অত্যন্ত মুষ্টিমেয় মেয়ে কাজ করত।

কিন্তু মেয়েদের এই শৈথিল্য বেশী দিন স্থায়ী হল না। ১৯৩৪-৩৫ সালে সমস্ত কৃষিসমাজ জুড়ে এল এক নতুন স্রোত। প্রত্যেক খামারে দেখা দিল গুণগত ও পরিমাণগত উন্নতি। আরো বেশী বৈজ্ঞানিক ও যান্ত্রিক পদ্ধতিতে চাষ করার ফলে খামারগুলি দৃঢ় অর্থনৈতিক বনিয়াদের ওপর খাড়া হল ; মানুষের সংগঠন-ক্ষমতা বাড়ল। কি ট্রাকটর, কি কম্বাইন কোনো যন্ত্র চালাবার জ্ঞানে লোকের অভাব রইল না।

এই গুণগত ও পরিমাণগত সমৃদ্ধিলাভ মেয়েদেরকে খামারের কাজে আকর্ষণ করবার জ্ঞে জনসাধারণের দৃষ্টি ফেরালো। সঙ্গে সঙ্গে নতুন

উৎসাহের আতিশয্যে মেয়েরাও যৌথ খামারের কাজে তাদের দক্ষতার প্রমাণ দিতে সচেষ্ট হল। আর শতকরা ২০-৪০ ভাগ মেয়ে নয়, ১৯৩৪-৩৫ সালে ৮০-৮৫ ভাগ মেয়ে নিজেদেরকে খামারের কাজে আত্মনিয়োগ করল। মেয়েদের এই যোগদানের পেছনে আরেকটা বড় কারণ আছে, সে কারণ হল সাধারণ ভোজনাগার। সে সময়ে রাষ্ট্র থেকে যৌথ খামারের কর্মীদের জন্তে আহারের ব্যবস্থা করার ফলে মেয়েরা রান্নাইঘরের কাজ থেকে নিষ্কৃতি পেল। তাছাড়া অস্থায়ী শিশুসদন ও কিণ্ডারগার্টেন গঠনের ফলে লক্ষ লক্ষ ছেলেমেয়েদের লালনপালন ও শিক্ষার দায়িত্ব সাময়িক-ভাবে সেই সংগঠনগুলির উপর গুস্ত হল। এই অস্থায়ী সংগঠনগুলি বিশেষ করে মার্চ থেকে সেপ্টেম্বর মাস পর্যন্ত স্থায়ী হয়, যে সময়ে সকলে খামারের কাজে অত্যন্ত ব্যস্ত থাকে। এই কয়েক মাস সাধারণ ভোজনাগার খামারগুলিতে ব্যাপকভাবে আহার পাঠাবার ব্যবস্থা করে। ১৯৩৫ সালে সারা সোভিয়েট দেশে দশ লক্ষ পাচক কৃষি-ভোজনাগারে নিযুক্ত ছিল। পাচকের সংখ্যা থেকেই এর বিরাটত্ব উপলব্ধি করা যাবে।

কয়েক বছরের মধ্যে মেয়েদের কাজের স্তর অপ্রত্যাশিতভাবে উন্নতি লাভ করেছে। কৃষিশালাগুলিও সমস্ত রকম আধুনিক সাজসজ্জা ও যন্ত্রে সজ্জিত হয়ে উঠেছে। নীচের সংখ্যাগুলির আপেক্ষিক বিচার থেকেই যন্ত্রের অবিচ্ছেদ্য উন্নতির হিসাব পাওয়া যাবে :—

| | ১৯৩৩ | ১৯৩৮ |
|---------------------|----------|----------|
| ট্রাকটর স্টেশন | ২,৯১৬ | ৬,৩৫৬ |
| ট্রাকটর-যন্ত্র | ১,২৩,০০০ | ৩,৯৪,০০০ |
| শস্ত্রচ্ছেদক যন্ত্র | ১০,৪০০ | ১,২৭,৫০০ |
| শস্ত্রবাহী-লরি | ১২,৩০০ | ৯২,৬০০ |

নতুন বৈজ্ঞানিক যন্ত্রের আমদানীর সঙ্গে সঙ্গে কৃষকদের কাজের ধারা ও মনোবৃত্তি যে পরিবর্তিত হবে এ অত্যন্ত স্বাভাবিক। কারণ নতুন যন্ত্র ও নতুন বৃত্তিই হল কৃষিকাজের গতি নিয়ন্তা। প্রত্যেকটি কর্মীই আজ শিক্ষিত, প্রত্যেকটি যন্ত্রই আজ বৈজ্ঞানিক। আজ থেকে দশ বছর আগে (১৯৩৫ সালে) ৫,৫০,০০০ ট্রাকটর-চালক, ৬৪,০০০ কম্বাইন-চালক, ৬৮,০০০ মোটর-চালক এবং ৭০,০০০ ট্রাকটর-চালক দলের নেতা ও কর্মী.....সারা সোভিয়েট দেশে এরাই ছিল কৃষিশালার প্রধান শক্তি। এবং এই সাড়ে সাত লক্ষ কর্মী কিছু দিন আগে পর্যন্ত সাধারণ কৃষক ছিল। ট্রাকটর, কম্বাইন ইত্যাদি যন্ত্র ছিল তাদের কাছে রূপকথার গল্প।

আগেই বলা হয়েছে যে নয়-দশ বছর আগে পর্যন্ত মেয়েদেরকে কাজ-না-জানা শ্রমিকদের দলে কাজ করতে দেয়া হতো। আজ কিন্তু তারা কৃষিসমাজের ভেতর একটা বড় আসন দখল করেছে। আগে মেয়েদের সম্বন্ধে অদ্ভুত অবিশ্বাস ছিল পুরুষদের মনে। মেয়েরা ট্রাকটর, কম্বাইন চালাতে পারবে, বড় বড় খামার পরিচালনা করে 'শক ওয়ার্কার'এর মর্যাদা পাবে.....এ কথা সহজে বিশ্বাস করত না তারা। অন্তরমহলের নিরীহ মেয়েদের দিকে তাকিয়ে কেমন একটা করুণার ভাব জেগেছিল সমস্ত স্ত্রী-জাতির ওপর। শুধু পুরুষরাই নয়, অনেক বয়স্হা স্ত্রীলোকও দৃঢ়ভাবে বিশ্বাস করতো যে এ সব কাজ মেয়েদের জন্তে নয়। মেয়েরা অল্প খাত্তু দিয়ে গড়া, মেয়েদের জীবনের উদ্দেশ্যও ভিন্ন। সুতরাং ঘরেই তাদের একমাত্র বিস্তৃতি। এই পুরানো সংস্কার কাটতে সময় নিল। ১৯৩৩-৩৪ সালে অবাক হয়ে তাকিয়ে দেখল সবাই যে মেয়েরা মাঠে মাঠে ট্রাকটর, কম্বাইন চালাতে শুরু করেছে। এমন কি ১৯৩৪ সালে একদল মেয়ে ট্রাকটর-চালক পুরুষদেরকে কাজে

হারিয়ে দেয় এবং পরে সেই পুরুষরা মেয়েদের কাছে শিক্ষা গ্রহণ করে।

পশ্চিম সাইবেরিয়ার টালভ্‌স্কি ট্রাকটর স্টেশনের অধিনায়িকা ভি, এম বারনদিনার কৃতিত্ব এখানে উল্লেখযোগ্য। ১৯২৬ সালে সে যৌথ খামারে যোগ দেয় এবং ১৯৩১ পর্যন্ত সাধারণ মজুরণীর কাজ করে। ১৯৩১ সালেই সে প্রধান ট্রাকটর-চালকের পরীক্ষায় উত্তীর্ণ হয়। যৌথ কৃষিকর্মীদের দ্বিতীয় অধিবেশনে সে বক্তৃতা প্রসঙ্গে বলে—“প্রথমে লোকেরা আমার দিকে তাকিয়ে হেসেছিল কিন্তু বসন্তকালেই আমি রেকর্ড ভাঙতে সফল হলাম। সাধারণত সবাই ১৮৮ হেক্টরের জমি ট্রাকটরে চষে থাকে কিন্তু ৩৬০ হেক্টরের জমি চষে আমি জেলার মধ্যে প্রথম স্থান অধিকার করলাম।”

শুধু এই-ই নয়, বারনদিনার সমস্ত জীবনই একটা সাফল্যের ইতিহাস। সে কারণে জনসাধারণ তাকে সোভিয়েট সরকারের সব চেয়ে বড় সংগঠন অল ইউনিয়ন কেন্দ্রীয় কার্যকরী সমিতিতে প্রতিনিধি হিসাবে নির্বাচন করে।

এই সময়ে গো-পালনের কাজেও মেয়েদেরকে আগ্রহ নিতে দেখা যায়। আগে একেকটি মেয়ে পনেরটি গরু দেখাশোনা করত, এখন এক সঙ্গে সাতাশটি গরু দেখাশোনা করতে লাগল। ডেয়ারী ফার্মগুলি উন্নতিলাভ করতে লাগল উত্তরোত্তর। তিন বছরের মধ্যে মেয়ে কর্মীর সংখ্যা বেড়ে দ্বিগুণের বেশী হল—৩, ০২, ৩০০।

কৃষিসমাজে নতুন স্থান অধিকার করার সঙ্গে সঙ্গে ব্যাপক সমাজের প্রতি তাদের দায়িত্ববোধ আরও বৃদ্ধি পেল। ১৯৩৩ সালের গোড়ার দিকে উত্তর ককেশাসের যৌথ খামারের মেয়ে-কর্মীরা স্টালিনের কাছে এক চিঠিতে লেখে “এখন আমরা বুঝতে পেরেছি যৌথ কৃষিব্যবস্থা

আমাদেরকে কোন্ পথে নিয়ে চলেছে। সঙ্গে সঙ্গে তার তাৎপর্যও আমরা অনুধাবন করেছি। গ্রামের খামারগুলির কর্মীদের মধ্যে এক অদ্ভুত কর্মচাঞ্চল্য ও রাজনৈতিক সক্রিয়তা লক্ষ্য করতে পারছি..... দেখছি মেয়েরা দলে দলে গিয়ে সমাজতান্ত্রিক প্রতিযোগিতায় যোগ দিচ্ছে এবং কাজের মধ্যে এগিয়ে আসছে।”

১৯৩৫ সাল সোভিয়েট কৃষিমেয়েদের জীবনে এক অপূর্ব জয়যাত্রা আরম্ভের বছর। এই বছরে যে পাঁচশো মেয়ে বীটের ফসল বৃদ্ধির অভিযানে বার হয়েছিল, তাদের কথা আগেই জানিয়েছি। এই অভিযানের অধিনায়িকা ছিল মেরিয়া ডেমচেংকো। মেরিয়া একজন গরীব চাষীর মেয়ে। প্রথম থেকেই তার বুদ্ধিমত্তার পরিচয় পাওয়া গিয়েছিল। কৃষি পরীক্ষায় উত্তীর্ণ হয়েই সে সমাজতান্ত্রিক কৃষি আন্দোলনের পুরোভাগে যোগ দেয়। ১৯৩৪ সালে তার দল আড়াই একর জমিতে ৪৬,৯০০ পাউণ্ড বীট ফলাতে সমর্থ হয়। পরের বছর যৌথ খামারের শক্-ওয়ার্কারদের দ্বিতীয় অধিবেশনে মেরিয়া ডেমচেংকো প্রতিজ্ঞা করে যে আড়াই একর জমিতে তারা পঞ্চাশ হাজার পাউণ্ড বীট ফলাবেই। সে এবং তার দল এই প্রতিজ্ঞা রক্ষা করেছিল। কিন্তু অনেক কষ্ট স্বীকার করতে হয়েছিল তার জন্তে। বসন্তকালে এত তুষার পড়ল যে অর্ধেকের বেশী বিচি নষ্ট হয়ে গেল। গ্রীষ্মকালে দেখা দিল অনাবৃষ্টি.....১০৬ দিন এক বিন্দু বৃষ্টির দেখা নেই। তারপর ফসল নষ্ট করতে এল পোকা কিন্তু অধ্যবসায়, অমানুষিক পরিশ্রম ও কৃষি-বিজ্ঞানের সাহায্যে তারা সমস্ত বাধা জয় করে সমর্থ হল। ১৯৩৫ সালেই তারা আড়াই একর জমিতে ৫২,৪৫৪ পাউণ্ড বীট উৎপন্ন করে সমস্ত সোভিয়েট দেশকে সচকিত করে দিল। এই সাফল্যই মেরিয়া ডেমচেংকোর প্রধান কৃতিত্ব নয়, তার কৃতিত্ব হল

সাধারণ মেয়েদেরকে এই বিশাল আন্দোলনের মাঝখানে টেনে আনায় । কারণ তার সহকর্মীরাই একদিন তাঁকে অতিক্রম করে চলে গেল । ষোলো বছর বয়স্কা মেয়েদের দলের অধিনায়িকা হানা স্ভিড্কা আড়াই একর জমিতে ৫৭,৬০০ পাউণ্ড এবং চৌষটি বছরের বৃদ্ধাদের একটা দল সেই পরিমাণ জমিতে ৬৭, ০০০ পাউণ্ড বীট 'জন্মাতে' সফল হল । বীট-উৎপাদনকারী এলাকার হাজার হাজার চাষীরা এখন মেরিয়া ডেমচেংকোর সঙ্গে এসে দেখা করে কিংবা চিঠি লেখে । কৃষি-বিজ্ঞানই হল শ্রেষ্ঠ ফসল ফলনের প্রধান হাতিয়ার—এই হাতিয়ারের ওপরই জোর দেয় মেরিয়া । কারণ “কৃষি-বিজ্ঞানের সাহায্য ছাড়া বীটের ফসলও ভালো হবে না এবং তাতে চিনির পরিমাণও যথেষ্ট থাকবে না । তোমরা খাম্বারের উন্নতির জন্তে মন প্রাণ দিয়ে পরিশ্রম করো, কৃষি-বিজ্ঞান সম্বন্ধে পড়াশোনা করো, খাম্বারে আপনিই ভালো ফসল ফলবে ।”

সোভিয়েটের কৃষক-মেয়েরা শুধু যে ট্রাকটর চালানায় দক্ষতা অর্জন করেছে তাই নয় । কম্বাইনের মতন জটীল যন্ত্র চালাতেও শিখেছে তারা । ১৯৩৫ সালে কম্বাইন পিছু ৪০০-৪৫০ একর জমি তৈরী করা যেত । সে জায়গায় আমেরিকায় একজন চাষী ৫৭৭ই একর জমি তৈরী করিতে পারত । কিন্তু ১৯৩৫ সালেই সোভিয়েট দেশের বীর কৃষক-মেয়েরা আমেরিকার রেকর্ড অতিক্রম করে বহুদূর এগিয়ে যায় । সারাটভ্ জেলার মেরিয়া পেট্রোভা ১,৩৬০ একর জমি প্রস্তুত করে ; নিপ্রোপেট্রভ্ জেলার এভডোকিয়া ভিনিক করে ১,২০২ই একর জমি ; সেই জেলারই আরেকটি মেয়ে সুখিনা করে সকলের বেশী—১,৮২০ একর জমি । এই অদ্ভুত সফলতা থেকে প্রমাণিত হয় যে মেয়েরা পুরুষের তুলনায় কোনো অংশে ছোট নয় । সোভিয়েট দেশের মতন যে কোনো দেশের মেয়েরা তাদের যোগ্যতার প্রমাণ দিতে পারে যদি বর্তমান

সমাজব্যবস্থার অন্ধ কুঠরী থেকে মুক্তি পায় তারা। কারণ এই কম্বাইনের মতন জটীল যন্ত্র মেয়েরা চালাতে পারবে এ কথা ভাবতেই পারত না মুজিকরা। সবেমাত্র ১৯৩০ সালে যৌথ খামারের মাঠে মাঠে তারা দেখতে পেয়েছিল এই অত্যাশ্চর্য যন্ত্র।

বীটের ফসল বৃদ্ধির ব্যাপারেই যে মেয়েরা নতুন রেকর্ড সৃষ্টি করেছে তাই নয়, শণ তৈরীর কাজেও তাদের কর্মনিষ্ঠা সত্যিই কৌতুহলপ্রদ। পৃথিবীর যে সব দেশে বিপুল পরিমাণে শণ উৎপন্ন হয় তাদের মধ্যে সোভিয়েট দেশ হল অগ্রতম। সেখানে সাধারণত একটি লোক দিনে ১৭½ পাউণ্ড শণের আঁশ তুলতো। ১৯৩৫ সালের অক্টোবর মাসে আনা ভিরোব্‌য়েভা ৭৫ পাউণ্ড শণের আঁশ তুলতে পেরে সবাইকে আশ্চর্য করে দেয়। তার নেতৃত্বেই এই আন্দোলনের সূত্রপাত। তার পরেই যৌথ খামারের চাষী—রাসোজিনা ও রোগোসিনা যথাক্রমে ২৪২ ও ২৪৪½ পাউণ্ড আঁশ উৎপাদন করে।

স্টাখানোভ আন্দোলনের পেছনে রয়েছে এক নতুন পদ্ধতির শিক্ষা ও প্রেরণা। শণের আগামী ফসলের পরিকল্পনা করা কালে যৌথ খামারের এক কৃষক-মেয়ে মলিয়াকোভা বলে—“আমরা প্রত্যেকটি বিষয় ভেবেছি এবং কৃষি-বিজ্ঞানীদের সঙ্গে আলোচনা করেছি। আমরা সমস্ত ভালো ভালো রাসায়নিক সারদ্রব্য ব্যবহার করেছি; বৈজ্ঞানিক মতে জমি পছন্দ করেছি। আর অত্যন্ত যত্নের সঙ্গে বিচি বাছাই করেছি যাতে একটা দাগওলা বিচিও না থাকে।” এই পদ্ধতি ও এই বৈজ্ঞানিক-দৃষ্টি সম্পন্ন মেয়েটির সঙ্গে জারের যুগের একটুখানি তুলনা করে দেখলে দেখা যাবে যে এক তিমিরাবৃত জনপদের ওপর নতুন সূর্যের আলো এসে ঝলসিয়ে উঠেছে।

গো-পালন সম্বন্ধে দু' একটি কথা এখানে বললেই যথেষ্ট হবে। 'রেড ডন' যৌথ কৃষিশালার নাদেজ্জদা পারসিয়ান্টসেভা ও কাথারিন নারটোভাই গো-পালনে প্রথম স্টাথানোভ আন্দোলন শুরু করে। আগে সাধারণত সোভিয়েট ইউরোপে বছরে একটি গরু প্রতি ২৪৫ গ্যালন (১,১০০ লিটার) দুধ পাওয়া যেত। এদের নেতৃত্বে আন্দোলন হওয়ার ফলে-গরু পিছু-৬৬৭ গ্যালন (৩,০০২ লিটার) দুধ পাওয়া গেল। অগ্ন্যাগ্ন খামারের মেয়েরা অত্যন্ত খুসী হল এদের ফলাফল দেখে। জার্মান ভল্গা রিপাবলিকের খামারের একটি মেয়ে ই, ক্রাউবার্জার তার ছয়টা গরুর প্রতিটি থেকে বাৎসরিক ৯৮৩ গ্যালন দুধ আদায় করতে সমর্থ হয়। সমস্ত দেশে আলোড়ন পড়ে যায় এই নিয়ে। এই জার্মান মেয়েটির সাফল্য খামারের প্রতিটি মেয়েকে সমাজতান্ত্রিক প্রতিযোগিতায় এক নতুন অনুপ্রেরণা জোগায়। এবং একদিন ঐ জার্মান মেয়েটিকে অতিক্রম করে তাসিয়া প্রোকোভ্‌য়েভা সবার 'সামনে এক নতুন' রেকর্ড উপস্থিত করে। একটি ছুটি নয়, তার খাটালের প্রতিটি গরুর থেকে সে বাৎসরিক ১,৩৯৮ গ্যালন দুধ পেতে সফল হয়। প্রতিযোগিতায় তাসিয়াই অপরাজের আসনে বসবার সম্মান লাভ করে। এখানে বুঝে দেখতে হবে যে এই অভাবনীয় সাফল্য অর্জনের পেছনে কোনো যাদু নেই, কোনো ভূত বা ভগবানের তপস্যা করেও এই বরপ্রাপ্তি ঘটে নি। মানুষ তার নিজের জনচেতনা, বাস্তববোধ, আত্মবিশ্বাস ও সমবেত চেষ্টার প্রতি শ্রদ্ধার ফলেই তার প্রয়োজন ও ইচ্ছা অনুযায়ী ফলাফল সৃষ্টি করতে পেরেছে।

খামারের প্রতিটি কাজকর্মে মেয়েদের কৃতিত্ব প্রমাণিত হওয়ায় তারা খামার পরিচালনার ব্যাপারেও বড় বড় পদের অধিকারিণী হয়েছে। কমিটির সভ্যা, সভানেত্রী, সহ সভানেত্রী, দলের অধিনায়িকা এমন

কত উচ্চ সম্মানে মেয়েরা আজ সম্মানিত। বর্তমানে সম্মানিতের সংখ্যা আরও বৃদ্ধি পেয়েছে। এবং দায়িত্বশীল কাজে মেয়েরা কখনও অযোগ্যতার পরিচয় দেয় নি।

এবারে গ্রামে শিক্ষাদীক্ষা প্রসারের কথা।

জারের আমলে চাষীদের অবস্থা কোন্‌ স্তরে ডুবে ছিল তার কিছু পরিচয় আগে দেয়া হয়েছে। শিক্ষার দিক থেকে তো সম্পূর্ণ অন্ধকারে তলিয়েছিল গ্রামাঞ্চলের লোকেরা। কিন্তু আজ সোভিয়েট দেশের সদূরতম অঞ্চলে গিয়ে পৌঁচেছে শিক্ষার আলো। মেয়েরা গিয়ে ভীড় করেছে ইস্কুলে, শিল্প শিক্ষালয়ে, শ্রমিকদের শিক্ষায়তনে, বিশ্ববিদ্যালয়ে। ১৯১৭ সালের আগে শহরে এবং গ্রামে প্রাথমিক ও মাধ্যমিক ইস্কুলে পড়ত এমনি ছেলেমেয়েদের মোট সংখ্যা ছিল আটাত্তর লক্ষ। এই ছিল সারা রাশিয়ার ইস্কুল-যাত্রী ছেলেমেয়েদের সংখ্যা। সে জায়গায় সোভিয়েট সরকারের আওতায় ১৯৪০ সালে সে সংখ্যা দাঁড়িয়েছে সাড়ে তিন কোটিতে। ১৯৩৩-৩৪ সালে মোট ৬০,৪০০ ক্লাবের মধ্যে ৫০,৯০০টি ছিল গ্রামাঞ্চলে। এ থেকে পৃথিবীর লোক কী বুঝবে? বুঝবে একেকটি গ্রাম হল সোভিয়েট ইমারতের একেকটি ইট। কারণ গ্রামের অর্থনৈতিক বনিয়াদের সঙ্গে সঙ্গে সাংস্কৃতিক ভিতও গাঁথা হয়েছে মজবুত করে। আজ প্রত্যেকটি গ্রামে সিনেমা, থিয়েটার, ক্লাব, গ্রন্থাগার, বৈদ্যুতিক আলো, রেল লাইন ছড়িয়ে পড়েছে ব্যাপক আকারে।

সোভিয়েটের গ্রামগুলি একেকটি ছোট ছোট শহর হিসাবে গড়ে উঠেছে। শিক্ষা প্রতিষ্ঠানের অভাবে আর কাউকে কষ্টভোগ করতে হয় না। মেয়েরা জীবনে এই সর্বপ্রথম শিক্ষিত জীবন যাপনের সুযোগ সুবিধা পেয়েছে। আগের দিনে তারা ইস্কুল কলেজ, বই পত্র, আমোদ প্রমোদ সব কিছুর আশ্বাদ থেকে বঞ্চিত ছিল। তারা ওপর তারা ছিল দরিদ্র;

নিগৃহীত । গ্রীষ্ম, বর্ষা, শীত সমানে তাদেরকে পেটের ধাক্কায় ঘুরতে হতো । জীবিকাকে বাদ দিয়ে অর্থাৎ কিছু চিন্তা করবার অবসর পেত না তারা । যৌথ খামারের ফলে অর্থনৈতিক যুক্তি ও সমতার সঙ্গে সঙ্গে তাদের জীবনে বিকাশ লাভ করেছে এক নতুন চেতনা । বালির নীচে ঢাকা পড়ে শুকিয়ে গিয়েছিল যে শ্রোত তা আবার প্রাণচঞ্চল্যে শ্রোতস্বিনী হয়ে উঠেছে ।

সোভিয়েট রাষ্ট্রের তরফ থেকে কখন কখনও অনুসন্ধান করে দেখা হয় যে কৃষকরা কী ভাবে সময় কাটাচ্ছে.....কতটা সময় তারা কাজে ব্যয় করে এবং কতটা সময় বিশ্রাম করে । এই সংখ্যা থেকে সোভিয়েট কৃষিজীবনের এক দিককার ছবি স্পষ্ট হয়ে ফুটে ওঠে । ১৯২৩ সালে সোভিয়েট দেশে যৌথ কৃষিপ্রথা প্রবর্তিত হয় নি । তখনও কৃষকরা নিজেদের ছোট ছোট জমিতে আলাদা আলাদা ভাবে চাষ করতেন । সে সময়ে বিলুপ্ত খোঁজখবর নিয়ে জানা যায় যে চব্বিশ ঘণ্টা সময় চাষীরা নিম্নলিখিত ভাবে ব্যয় করত :—

| | |
|--------------------------|-------------------|
| ক্ষেতের কাজকর্ম | ১১ ঘণ্টা ৫১ মিনিট |
| ব্যক্তিগত বা সংসারিক কাজ | ২ " ৫৬ " |
| বিশ্রাম | ৩ " ১৫ " |
| নিদ্রা | ৫ " ৫৮ " |

১৯২৩ সালে একজন বিবাহিতা কৃষক-মেয়ে কী ভাবে সময় ব্যয় করত তার খবর আরেকটি হিসাব থেকে পাওয়া যায় । তখন প্রয়োজন মতো ঘুমোবার সময় পর্যন্ত পেত না তারা । সে কারণে নীচের সংখ্যাগুলি ভালো করে বিচার করে দেখবার প্রয়োজন আছে :—

| | |
|-----------------------|-------------------|
| ক্ষেতের ও সংসারের কাজ | ১৫ ঘণ্টা ৫১ মিনিট |
| বিশ্রাম | ৫ " ৪৩ " |
| নিদ্রা | ২ " ২৬ " |

১৯৩৬ সাল। তখন শতকরা নিরানব্বুই ভাগ জমি যৌথ-প্রথায় চাষ হচ্ছে। সারা দেশ সরগরম হয়ে উঠেছে যন্ত্রের কোলাহলে ও মানুষের পদশব্দে। সে সময়ে অনুসন্ধান করে যে তথ্যগুলি পাওয়া যায় আপেক্ষিক বিচারের জন্তে সেগুলি নীচে দেয়া গেল :—

| | |
|---------------------------|------------------|
| • ক্ষেতের কাজকর্ম | ৮ ঘণ্টা ২৩ মিনিট |
| ব্যক্তিগত বা সাংসারিক কাজ | ২ ” ২৪ ” |
| বিশ্রাম | ৫ ” ২৭ ” |
| নিদ্রা | ৭ ” ৪২ ” |

১৯২৩ আর ১৯৩৬। ওপরের তথ্যগুলোকে তুলনামূলক বিচারের মাপকাটিতে ফেললেই বোঝা যাবে সোভিয়েট দেশ কোন্ দিকে মোড় নিয়েছে। ১৯২৩-এর তুলনায় বর্তমানে কৃষকরা কী পরিমাণ সুখ, স্বাচ্ছন্দ্য ও প্রাচুর্যের মধ্যে দিন কাটাচ্ছে বিচারের ব্যারোমিটারেই তা ধরা পড়বে। আজ অনেক বেশী বিশ্রাম পাচ্ছে সোভিয়েট চাষীরা। এই বিশ্রামের সময়ে তারা পড়াশোনা করে, সামাজিক কাজকর্ম করে। থিয়েটার সিনেমা দেখে, আমোদ প্রমোদের মধ্যে দিয়ে কাটিয়ে দেয়। গ্রীষ্মকালে আরো কম পরিশ্রম করে বলে সবাই আরো বেশী বিশ্রাম করে।

সোভিয়েট কৃষিসমাজের বিশাল পরিবর্তন থেকে একটা জিনিস অত্যন্ত সুস্পষ্টভাবে নজরে পড়ে যে শহর ও গ্রামের মধ্যে যে পার্থক্য সোভিয়েট দেশে তা নিশ্চিহ্ন হয়ে গিয়েছে। বিজ্ঞানের প্রসার, যন্ত্রের অগ্রগতি এবং সমাজতান্ত্রিক অর্থনৈতিক ব্যবস্থা—এদের সামনে শহর ও গ্রামের মধ্যবর্তী প্রাচীর ছিন্ন ভিন্ন হয়ে গিয়েছে। অর্থাৎ এই দুইয়ের মধ্যে যে ফাঁক আর ফাঁকি তা ভরাট করে দিয়েছে কম্যুনিষ্ট সরকার। বহু যুগ যুগান্ত ধরে শহর ও গ্রামের মধ্যে সংঘর্ষ, বিদ্বেষ ও ঘৃণায় যে শক্তির

অপচয় হচ্ছিল তার সত্যিকার মীমাংসা সম্ভব হয়েছে। আজ আর গ্রামের ছেলেমেয়েদের দিকে তাকিয়ে শহরের লোকেরা তামাসা করে না, তাচ্ছিল্য করে না। ফাঁক আর ফাঁকি, কোনো অসঙ্গতিই আজ আর গ্রাম্য জীবনে অবশিষ্ট নেই।

যৌথ কৃষিসমাজে এক কোটি নব্বুই লক্ষ কৃষক-মেয়েরা হল একটা বিরাট সামাজিক শক্তি। তাই এই মেয়েদের সম্বন্ধে বগতে গিয়ে স্টালিন এক জায়গায় বলেছেন “যৌথ কৃষিকাজ নারীজাতিকে মুক্ত করে সম্পূর্ণ স্বাধীন সত্তার অধিকার দিয়েছে। আজ আর সে মেয়ে হিসাবে তার বাপের জন্তে বা স্ত্রী হিসাবে তার স্বামীর জন্তে কাজ করছে না, সে কাজ করছে সর্বাগ্রে তার নিজের জন্তে। এই হল কৃষক-মেয়েদের মুক্তির গোড়ার কথা। এই হল যৌথ কৃষিব্যবস্থার মূলতত্ত্ব যা একজন মেয়েকে একজন পুরুষের সঙ্গে সমান জায়গায় দাঁড়াবার অধিকার দিয়েছে।”

জাতিগঠন ও শাসনকার্যে মেয়েদের স্থান

একজন মেয়ের পক্ষে দক্ষতা অর্জন করার জন্তে প্রথমেই টেকনিক্যাল শিক্ষা গ্রহণ করা দরকার। এর পর দক্ষতার ক্ষেত্র আরও বিরাট, আরও প্রশস্ত। কারণ প্রাথমিক টেকনিক্যাল শিক্ষা পাওয়ার পর উচ্চ শিক্ষা গ্রহণ করা চলতে পারে। সর্ববিশেষজ্ঞা, ইঞ্জিনীয়ার, যন্ত্রবিদ, ফোরম্যান, কৃষিবিদ, চিকিৎসক, আইনজ্ঞ, অর্থনীতিবিদ, বিজ্ঞানের কত রকম শাখা প্রশাখা...যে কোনো দিকে মেয়েদের পারদর্শিতা প্রমাণের পথ খোলা আছে।

মাধ্যমিক স্কুল ও বিশ্ববিদ্যালয়ে এই ধরনের ছাত্র-ছাত্রীরা বিশেষ শিক্ষা পেয়ে থাকে। কিন্তু এমন অনেক কল-কারখানা আছে যেখানে সাধারণ শ্রমিকরা বিশেষ রকম শিক্ষা না পেয়েই নিজেদের পারদর্শিতার পরিচয় দিয়েছে এবং উচ্চ পদে উন্নীত হয়েছে। এই সব কর্মীদের জন্তে সোভিয়েট রাষ্ট্র থিয়োরিটিক্যাল শিক্ষার সুবিধা করে দিয়েছে যাতে তারা আরও উন্নতি করতে পারে।

বুদ্ধিজীবী জগতে সোভিয়েটের মেয়েরা কী রকম অংশ গ্রহণ করে তা জানবার জন্তে আমাদের দেশের মেয়েরা স্বভাবতই অত্যন্ত আগ্রহী। সেভিয়েট মেয়েরা কি ইঞ্জিনীয়ারিং বা যন্ত্রবিদ্যায় পারদর্শিনী? মাধ্যমিক ও উচ্চ স্কুলে মেয়েদের পড়বার জন্তে কি বিশেষ কোনো ব্যবস্থা আছে? এমনি কত প্রশ্ন তাদের মধ্যে উত্তরের জন্ত অপেক্ষা করছে।

জারের ঐতিহাসিক রাজত্বে শিক্ষার দরজা ছিল মেয়েদের জন্তে বন্ধ। মেয়েরা লেখাপড়া শিখবে, বহির্জগতে আত্মপ্রকাশ করবে—এ কথা কেউ স্বপ্নেও আনতে পারতো না। ১৯০৫ সালের পর অবিশ্যি মেয়েরা

কিছু সুবিধা আদায় করতে পারে। বিংশ শতাব্দীর শুরুতে মাত্র তিনটি উচ্চ শিক্ষাঙ্গণ ছিল সারা রুশ সাম্রাজ্যে, মস্কোতে একটি ও পিটার্সবুর্গে দুটি—প্রথমটি সাধারণ স্কুল ও দ্বিতীয়টি মেডিক্যাল স্কুল। ১৯০৫-৬ সালে বিপ্লবের সঙ্গে সঙ্গে নারী জাগরণের স্রোত আরও ব্যাপক রূপ নিয়ে আত্মপ্রকাশ করল। শিক্ষা রাজধানীর গভী ছাড়িয়ে তাই ওডেসা, খারকভ, কিয়েভ, কাজান ও অন্যান্য প্রদেশে বিস্তার লাভ করল। ১৯০৯ সালে সেন্ট পিটার্সবুর্গে উচ্চ শিক্ষা নিচ্ছে এমন ছাত্রীর সংখ্যা হল ৫,৭৭০। তাও সাধারণ স্কুলশিক্ষা, কোনো রকম বিশেষ শিক্ষা নয়। বিশেষ শিক্ষার মধ্যে অত্যন্ত অল্প সংখ্যক ছাত্রী চিকিৎসা-শাস্ত্র, আইনবিদ্যা ও কৃষি-বিদ্যা অধ্যয়ন করছিল।

প্রাক-বিপ্লব যুগের শিক্ষা সম্বন্ধে আরেকটি কথা বিশেষভাবে উল্লেখযোগ্য যে সে যুগে কেবলমাত্র অর্থশালী পরিবারের মেয়েরাই স্কুলে যেতে পারতো। সাধারণ কৃষক বা শ্রমিক ঘরের ছেলে-মেয়েদের এমন কি উচ্চ মধ্যবিত্ত শ্রেণীর ছেলেমেয়েদের অভিভাবকদের শিক্ষকের কি জোগাবার সামর্থ ছিল না। যে সব মেয়েরা শিক্ষায়তন থেকে লেখাপড়া শিখে বের হতো তারা শিক্ষয়িত্রীর কাজ পেত। কারণ সে সময়ে অল্প বেতনে শিক্ষয়িত্রীর কাজ সংগ্রহ করা এমন কিছু দুঃসাধ্য ছিল না। ১৯১২ সালে একমাত্র মস্কো শহরেই একশো-জন শিক্ষকের মধ্যে ৬৪ জন ছিল শিক্ষয়িত্রী অর্থাৎ সংখ্যায় সাড়ে দশ হাজার। এবং তাদের মধ্যে অধিকাংশই ছিল প্রাথমিক স্কুলের শিক্ষয়িত্রী। এ ছাড়া শতকরা ১৫ জন ছিল ডাক্তার আর বাকী যারা তারা ছিল ধাইয়ের কাজে বা আরও ছোটখাটো কাজকর্মে। এ হল রাজধানীর অবস্থা। মফস্বল শহরে মেয়েরা বড় একটা এ ধরনের কাজ করত না বললেই চলে।

প্রথম মহাযুদ্ধের সময়ে যখন পুরুষরা যুদ্ধের ময়দানে সৈন্য হয়ে চলে গেল তখন মেয়েদেরকে নানান কাজকর্মে গ্রহণ করা হল। লোকজনের ভয়ানক অভাব, সুতরাং সেদিন মেয়েদেরকে এ সুযোগ না দিয়ে শাসকদের কোনো গতাস্তরও ছিল না। অতীদিকে মেয়েরাও এই ফাঁকে বৃহত্তর কর্মজীবনে প্রবেশ করে তাদের ক্ষমতা প্রকাশের সুবিধা পেল।

তারপর এল সমস্ত কিছু পরিবর্তনের পালা। বিপ্লবের সম্মার্জনীতে সমাজের যত সব অত্যাচার অসাম্য ঝাঁটস্নেহে দূর হয়ে যাবার জোগাড় হল। সোভিয়েট কর্তৃপক্ষ সমস্ত রকম বাধা নিষেধের দেয়াল চূর্ণ করে মেয়েদের জন্তে খুলে দিল মাধ্যমিক ও উচ্চ শিক্ষার প্রবেশপথ। সমাজের অভুক্ত, অশিক্ষিত কিশোরীদের ডাক এল শিক্ষালয় থেকে। সে দিন 'আর পরসাদ' লোকেদের ছেলেমেয়ে নয়, সাধারণ কৃষক, শ্রমিক ও মধ্যবিত্ত সমাজের আঙিনা থেকে হাজার হাজার শিক্ষা-গ্রহণেচ্ছু ছেলেমেয়েরা জড়ো হল স্কুলের আশে পাশে। একেকটি প্রোমিথিউসের মন চঞ্চল হয়ে উঠল বৃহত্তর পৃথিবীকে চেনবার ও জানবার জন্তে। সাধারণ শিক্ষালয়ের সঙ্গে সঙ্গে গড়ে উঠল বিশেষ রকম স্কুল যেখানে কেবলমাত্র চাষী মজুরের ছেলেমেয়েরাই পড়বে। এই রকম ইস্কুলগুলিকে বলা হতো র্যাবফ্যাক (Rabfak) অর্থাৎ ওয়ার্কাস ফ্যাকাল্টি। এখানে তিন-চার বছরের কোর্সের সাহায্যে ছাত্র-ছাত্রীদেরকে বিশ্ববিদ্যালয়-পূর্ব শিক্ষা দেয়া হতো। এবং দেখা গেছে এই শিক্ষা সোভিয়েট সমাজে এক নতুন ধরনের বুদ্ধিজীবী শ্রেণীর জন্ম দিয়েছে।

১৯২৬ সালের তথ্য দাঁটিলে দেখা যায় যে তখন সোভিয়েট রাষ্ট্রচালনার কাজে ও টেকনিক্যাল কাজকর্মে মেয়েরা একটা বিশেষ স্থান অধিকার করে বসেছে। পরের পাতায় সংখ্যাগুলি দেয়া গেল :—

| | |
|------------------------|--------|
| রাষ্ট্র পরিচালনার কাজে | ১৬,০০০ |
| টেকনিক্যাল কাজকর্মে | ৭,০০০ |
| কৃষিবিদের পদে | ৭০০ |
| আইনজ্ঞের কাজে | ৮০০ |

আসলে কিন্তু একটা বিরাট উন্মাদনা চোখে পড়ল প্রথম পঞ্চবার্ষিকী পরিকল্পনা প্রবর্তনের ভেতর দিয়ে। এই পরিকল্পনাকে সফল করে তোলার জন্তে ডাক পড়ল দেশের বৃহত্তর মানব গোষ্ঠীর কারণ প্রত্যেকটি নারী পুরুষের সহযোগিতা ব্যতীত এই অতিকায় পরিকল্পনাকে কাজে পরিণত করা কোনো দিনই সম্ভব ছিল না। দেশের আবালবৃদ্ধবনিতা জাতি ধর্ম নির্বিশেষে নিজেদের সমস্ত ব্যক্তিগত স্বার্থ ও ব্যক্তি-স্বাতন্ত্র্য বোধ বিসর্জন দিয়ে এগিয়ে এসেছিল বলেই সফল হয়েছিল পঞ্চ-বার্ষিকী পরিকল্পনা। অত্র কোনো পুঁজিবাদী দেশে এই মানবিক বোধ, সমাজতান্ত্রিক সমাজ চেতনা ও যৌথ সহযোগিতা সম্ভব নয়। কারণ যে দেশের মানুষ জাতিতে জাতিতে বিচ্ছিন্ন, শ্রেণীতে শ্রেণীতে বিভক্ত, ধর্ম ও বর্ণ বিদ্বেষে আচ্ছন্ন, অর্থের পরিমাণ বিচারের ওপর যে দেশে মানুষের উচ্চ নীচতা নির্ভরশীল, সে দেশে কী করে জন্ম নেবে সমাজ চেতনা? যে দেশের অধিকাংশ মানুষ পেট ভরে খেতে পায় না, চিকিৎসার অভাবে হাজারে হাজারে মারা যায়, বস্তি-জীবনই বাদের কাছে ঐশ্বর্যের চরমতম প্রকাশ, বেকারত্বের বিভীষিকায় ভীত মানুষ যে দেশে কারখানার দোর থেকে দোরে তাড়া খেয়ে বেড়ায়, সে দেশের মানুষ কিসের ভরসায় এগিয়ে আসবে যৌথ সহযোগিতার ইচ্ছায়। কিন্তু সোভিয়েটের মেয়েরা এগিয়ে গিয়েছিল নিজেদের ইচ্ছায় কারণ তারা বুঝেছিল যে সমাজের দৈনন্দিন কাজের সঙ্গে তারা অবিচ্ছেদ্যভাবে জড়িত।

প্রথম পঞ্চ বার্ষিকী পরিকল্পনার ফলাফলের দিকে তাকালেই তার প্রমাণ

মিলবে। পাঁচ বছরের মধ্যে সংখ্যা কী ভাৱে বৃদ্ধি পেয়েছে, তার খবর নীচে দেয়া গেল :—

১৯২৮-এর শেষে ১৯৩৩-এর প্রথমে

| | | |
|---|----------|----------|
| মেয়ে-ইঞ্জিনীয়ার ও অন্যান্য সুদক্ষ কর্মী | ১,৪৬,০০০ | ৩,৭৫,০০০ |
| শিক্ষয়িত্রী | ২,১১,৫০০ | ৩,৮৭,২০০ |
| মেয়ে-চিকিৎসক | ১,৩৫,৫০০ | ২,১১,০০০ |

৪,৯৩,০০০ ৯,৭৩,২০০

মোট সংখ্যার দিকে দেখলে দেখা যাবে যে শতকরা প্রায় একশো ভাগ কর্মী এই পাঁচ বছরের মধ্যে গড়ে উঠেছে যারা সত্যি সত্যিই জাতি গঠনের দায়িত্ব গ্রহণ করতে সক্ষম। দ্বিতীয় পঞ্চবার্ষিকী পরিকল্পনার হিসাব নিকাশ নিলে আরও অবাক লাগে। ১৯৩৩-এ যে মেয়ে ইঞ্জিনীয়ার ও সুদক্ষ কর্মীর সংখ্যা ছিল পোনে চার লক্ষ, ১৯৩৫ সালের জুলাই মাসে তা হল পাঁচ লক্ষ। সংখ্যাগুলির দিকে চাইলে মনে হয় যেন মানুষ গড়া চলেছে বিদ্যুতিক গতিতে। যেন জ্ঞান-আহরণ নিয়ে কাড়াকাড়ি পড়ে গিয়েছে। কে আগে শিখবে, কে আগে মানুষ হবে, কে আগে তার বুদ্ধিমত্তার প্রমাণ দেবে—এই নিয়ে একটা প্রতিযোগিতা।

কিন্তু এই প্রতিযোগিতা সারা সোভিয়েট দেশ জুড়ে ব্যাপকভাবে দেখা দিল। স্কুলে, বিশ্ববিদ্যালয়ে, শিল্প-শিক্ষালয়ে—কোথায় নয়...দলে দলে মেয়েরা ভর্তি হওয়ার জন্তে আবেদন জানালো। শহরের মেয়েরা নয়, দূর দূর গ্রামের মেয়েরা যারা কিছু বছর আগে পর্যন্ত লেখাপড়ার কথা মনেও আনতে পারত না, তারা তাদের কাছাকাছি শিক্ষায়তনে গিয়ে উপস্থিত হল। যেন যাহুঘর দেখতে এসেছে, এমনি কোতুহল এমনি বিস্ময় তাদের ছ চোখে, এমনি অপরিমেয় উন্মাদনা তাদের মনে।

কলকারখানায়, ক্ষেত খামারে, ট্রাম ও রেলগাড়ী চালনায়—ওধু এসব

কাজকর্মই নয়, রাষ্ট্রের পরিচালনা-যন্ত্রের, মধ্যেও মেয়েরা উল্লেখযোগ্য পরিমাণে অংশ গ্রহণ করল। আপিসের সমস্ত কাজকর্ম, বড় বড় দোকান—(সবগুলিই রাষ্ট্রের অধীন) পরিচালিকার পদে এবং রাষ্ট্র নিয়ন্ত্রিত সমস্ত প্রতিষ্ঠানে মেয়েরা তাদের অনধিকৃত অধিকার দখল করে বসল।

রাসায়নিক পরীক্ষা-ঘরে বিশেষ করে যন্ত্র নির্মাণ শিল্পে, মেয়েরা তাদের কৃতিত্বের স্বাক্ষর রেখেছে। দেখিয়েছে রাসায়নিক পরীক্ষার বাপারে মেয়েদের দৈন্ত প্রকাশ করার কিছু নেই। তারাও চেষ্টা করলে বড় বড় রাসায়নিক, বড় বড় বৈজ্ঞানিক হতে পারে। ছাছাড়া ছোট ছোট কলকারখানায় পরিদর্শনের কাজে মেয়েরাই হল অগ্রণী।

১৯৩৮ সালের একটা হিসাব থেকে পরিষ্কারভাবে জানা যায় মেয়েরা সোভিয়েট সমাজে কত গুরুত্বপূর্ণ স্থান অধিকার করে আছে। পাঠকদের অবগতির জন্তে তা উদ্ধৃত করা হল :—

| | শতকরা হিসাব | |
|---------------------------|-------------|-------|
| | মেয়ে | পুরুষ |
| বড় বড় শ্রমশিল্পে (১৯৩৭) | ৩৯.৮% | ৬০.২% |
| বৈজ্ঞানিক গবেষণায় | ৩৪% | ৬৬% |
| বিশ্ববিদ্যালয়ে | ৪৩.১% | ৫৬.৯% |
| চিকিৎসা-শাস্ত্রে | ৫০.৬% | ৪৯.৪% |
| শিক্ষাজগতে | ৬৪.৮% | ৩৫.২% |

ভারতবর্ষে কিছু বছর আগে পর্যন্ত মেয়েদের ভোট দেয়ার কোনো অধিকার ছিল না। শ্রীমতি সরোজিনী নাইডুর প্রাণপণ চেষ্টায় এবং নারী আন্দোলনের চাপে ১৯২৩ সালে মন্টেগু চেমস্‌ফোর্ড ব্রিফর্ম বিলে এদেশের মেয়েরা সব প্রথম ভোট দেয়ার অধিকার

পায় এবং তাও অত্যন্ত সীমাবদ্ধভাবে। ১৯৪৬ সালের ভারতীয় নির্বাচনের হিসাব পর্যালোচনা করলে জানা যাবে যে শতকরা মাত্র চৌদ্দ ভাগ মেয়ে ‘ভোটের’ হিসাবে সরকারী বইয়ে তালিকাভুক্ত হয়েছিল। সোভিয়েট দেশে কিন্তু সমস্ত ব্যাপারটাই অল্প রকম। সে দেশে যে কোনো মেয়ে যার আঠারো বছর বয়স পূর্ণ হয়েছে সেই নির্বাচনে প্রতিদ্বন্দ্বিতা করতে পারে এবং ভোট দিতে পারে। অর্থাৎ দেশ-শাসনে মেয়েদের অধিকার ও দায়িত্ব পূর্ণমাত্রায় স্বীকৃত হয়েছে। সোভিয়েট দেশে যা “সর্বোচ্চ শাসন পরিষদ”—যাকে ও দেশের লোকেরা সুপ্রীম সোভিয়েট বলে, সেই পরিষদের সভ্য সংখ্যা হল ১১৪৩ জন; এর মধ্যে ১৮৯ জন হল মেয়ে ডেপুটি। এ সম্মান পৃথিবীর অল্প কোনো দেশের মেয়েরা পায় নি।

সবচেয়ে সভ্য, শিক্ষিত এবং নারী প্রগতির দেশ বলে যে দেশ গর্ব করে, সেই ইংলণ্ডেও প্রথম মহাযুদ্ধের আগে পর্যন্ত মেয়েরা নির্বাচনের সময়ে কোনো ভোট দিতে পারত না। সে কারণে মেয়েদেরকে প্রচণ্ড আন্দোলন (যা সাফ্রেজিস্ট আন্দোলন বলে খ্যাত) চালাতে হয়। পুলিশের লাঠি, কারাবরণ, অনশন ও হাজার রকম অত্যাচার সহ্য করতে হয় তাদেরকে সাধারণ ভোটের দাবী আদায় করবার জন্তে। ‘প্রত্যেকটি বয়ঃপ্রাপ্ত ব্যক্তি ভোট দেবে’ এ কথা স্বীকার করতে রাজী নয় পুঁজিবাদী দেশের শাসকরা। কারণ তারা জানে যে সাধারণ মানুষকে ভোট দেয়ার অধিকার দিলে তাদের রাজত্ব বেশী দিন টিকবে না। ভোটের অধিকার মানুষকে রাজনীতি-সচেতন করে তুলবে এবং সেই অধিকারের জোরে তারা একদিন কায়ম করবে জনসাধারণের নিজের সরকার।

এই ভয়, এই আশংকা সোভিয়েট দেশে নেই। কারণ তারা সে যুগকে উত্তীর্ণ করে নতুন যুগে গিয়ে উপস্থিত হয়েছে যেখানে জনসাধারণই

সব কিছুই-মালিক । ছোট বড় শ্রেণীর সহস্র রকম দড়িদড়া ছিন্ন ভিন্ন করে উড়িয়ে দিয়েছে তারা ।

সোভিয়েট শাসনব্যবস্থায় যে সব মেয়েরা উঁচু আসনে অধিষ্ঠিত হয়েছে এখানে তাদের হিসাব নেয়া প্রয়োজন । পৃথিবীর মধ্যে সর্বপ্রথম নারী-প্রতিনিধি (ambassador) হলেন একজন রুশ মহিলা ম্যাডাম কোলোনটায় । ইনি বহুদিন সুইডেনে প্রতিনিধিত্ব করেন । সর্বোচ্চ শাসন পরিষদের সভাপতিদের মধ্যে দুজন হলেন সভানেত্রী । সোভিয়েট অব দি গ্রাশানালিটিজ-এর সহ সভানেত্রী হলেন আজারবাইজানের মেয়ে আস্লানোভা । সুদূর মধ্য এশিয়ার অঞ্চল থেকে সভানেত্রী হিসাবে এসেছেন চুভাষ-মেয়ে আন্ড্রিয়েভা, ইয়াকুট-মেয়ে সিডোরোভা ও বারিয়াৎ-মঙ্গোল মেয়ে সাইজিনোভা । তাঁরা সবাই ছোট ছোট জাতির মেয়ে জারের আমলে যে সব জাতিদের বলা হতো বন্ড, মধ্যযুগের মানুষ ।

সোভিয়েট দেশের ষোলোটি রিপাব্লিকের মধ্যে পাঁচটি হল সোভিয়েট এশিয়ার—যে এশিয়া বিপ্লবের আগে পর্যন্ত ছিল জারের কলোনি, যে এশিয়া শোষিত ও নিপীড়িত হতো আমাদের ভারতবর্ষের মতন । এই এশিয়ার মেয়েরা ডুবে থাকত ‘পারাজা’র আড়ালে, বাইরে আত্মপ্রকাশ করার কোনো অধিকার ছিল না তাদের । কিন্তু তাদের দেশেরই তুর্কমেন-মেয়ে কেরেদজায়েভা হল তুর্কমেন সোভিয়েটের বিচার বিভাগের পিপ্লস্ কমিশার, তাদের দেশেরই খিরগিজ মেয়ে কারা কুলোভা হল খিরগিজ সোভিয়েটের বিচার বিভাগের সহকারী পিপ্লস্ কমিশার ।

১৯০৯ সালের কথা । সে সময়ে একাটেরিনা ফ্রিশিট্জ্ নামে একটি মেয়ে আইন পাশ করে সহকারী এটর্নির পদে সেন্ট পিটার্সবুর্গ বার এসোসিয়েশনে যোগ দেয় । এই নিয়ে তুফুল আলোড়ন সৃষ্টি হয় সমস্ত

রাশিয়ায়। একদিন সেই মেয়েটি একটি ফৌজদারী কেসে আসামীর পক্ষ সমর্থন করতে ওঠায় প্রসিকিউটর তাতে আপত্তি জানায়। কারণ মেয়ে-এটর্নির স্থান নাকি আদালতে হওয়া উচিত নয় এবং শেষ পর্যন্ত প্রসিকিউটরটি প্রতিবাদে ঘর ছেড়ে চলে যায়। সমস্ত ব্যাপারটি উচ্চতর পরিষদে বিচারের জন্তে পাঠানো হয়। এবং সেখান থেকে ঘোষণা করা হয় যে ভবিষ্যতে কোনো মেয়ে আইনজ্ঞের পেশা গ্রহণ করতে পারবে না। একাটেরিনাকে বাধ্য হয়ে সে কাজ ত্যাগ কর্তে হয়। কিন্তু বর্তমান সমাজ তাকে অবাধ স্বাধীনতা দিয়েছে। আজ একাটেরিনা একজন অধ্যাপিকা, ব্যবহারবিদ্যার বিশেষজ্ঞা, বৈজ্ঞানিক গবেষণা গৃহের সভ্যা, মস্কো বিশ্ববিদ্যালয়ের লেকচারার, বৈদেশিক বাণিজ্য ইনস্টিটিউটের আইন বিভাগের বড় পদাধিকারিণী এবং ব্যবসায়ী পরিষদের একজন সক্রিয় কর্মী।

১৯৪০ সালের ১লা জানুয়ারীর সংগৃহীত তথ্য থেকে জানা যায় যে সে সময়ে সমস্ত যৌথ খামারের সভানেত্রী ও সহ-সভানেত্রীর সংখ্যা হল চোদ্দ হাজার দুশো এবং খামারের প্রাণী-পালন বিভাগের প্রধান পরিচালিকার সংখ্যা হল চল্লিশ হাজার।

এই ভাবে সমাজের প্রত্যেকটি বিভাগে মেয়েরা তাদের যোগ্যতা অনুসারে কাজ পেয়েছে ও রাষ্ট্র পরিচালনার ব্যাপারে তাদের মতামত প্রকাশের স্বাধীনতা পেয়েছে।

সোভিয়েটের মেয়েদের এই অগ্রগতির সঙ্গে অন্যান্য দেশের মেয়েদের অবস্থা কী পরিমাণে উন্নত হয়েছে তা বিচার করে দেখা প্রয়োজন।

ইংলণ্ড ও আমেরিকা নারীপ্রগতির নামে যতই বড় বড় কথা বলুক না কেন আজও তারা মেয়েদেরকে পুরুষের সমান সম্মান দেয় নি। আজও তারা মেয়েদেরকে পূর্বপুরুষদের চোখে দেখে থাকে। কারণ সমাজব্যবস্থা

পরিবর্তিত না হলে দৃষ্টিভঙ্গী পালটাতে পারে না ; অসাম্য ও দুর্নীতি বা
ধনতন্ত্রী সমাজের সব চেয়ে বড় ব্যাধি তাদেরও চিকিৎসা হতে পারে না।
সেইভিয়েটের মেয়েদের জয়যাত্রার কথা বলতে গিয়ে তাই স্টালিন
বলেছেন “ক্রমবর্ধমান সামাজিক কাজকর্মে শ্রমজীবী মেয়েদের
যোগদানকে আমরা অভিনন্দন জানাবো। উচ্চতর পদে পদোন্নতি
থেকেই তাদের সাংস্কৃতিক ওৎকর্ষের প্রমাণ মিলছে।”

নতুন জীবনের পথে

১৯৪১ সালের শেষ দিকে মাক্সিম লিট্‌ভিনফ্‌ সোভিয়েট দূত হিসাবে ওয়াশিংটনে যান। তাঁর পৌছানোর কিছু দিন পরেই ‘মেয়েদের জাতীয় গণতন্ত্রী ক্লাব’ থেকে তাঁর স্ত্রীকে বক্তৃতা দেয়ার জন্তে আমন্ত্রণ জানানো হয়। মধ্যাহ্ন ভোজনের সে এক বিরাট রাজকীয় আয়োজন! ম্যাদাম লিট্‌ভিনফ্‌ বললেন কোন্‌ শ্রেণীর অভিজাতদের নিয়ে এই ক্লাবের সংগঠন। বক্তৃতা প্রসঙ্গে ম্যাদাম লিট্‌ভিনফ্‌ বললেন “এই সভায় এসে দেখছি যে এখানকার সমস্ত মেয়েদেরকে “ইনি অমুক সম্ভ্রান্ত ব্যক্তির স্ত্রী” “উনি তমুক ব্যক্তির সম্ভ্রান্ত স্ত্রী” হিসাবে পরিচয় করিয়ে দেয়া হচ্ছে, এমন কি আমাকেও! আমাদের রাশিয়ার এ প্রথা অচল। সেখানে এই তথাকথিত ‘সম্ভ্রান্ত’ ব্যক্তি বলে কোনো পদার্থ নেই। আমি একজন স্টেট-কর্মচারীর স্ত্রী বলে সেখানে কেউ আমার বক্তৃতা শুনতেও আসবে না। একজন সোভিয়েট মেয়ের তার নিজস্ব ব্যক্তিত্ব আছে যা তার কৃতিত্ব দিয়ে অর্জন করা; স্বামীর খ্যাতির ওপর তা নির্ভরশীল নয়।”

সোভিয়েটের মেয়েরা আজ কোন্‌ নতুন স্তরে গিয়ে পৌঁছেছে ম্যাদাম লিট্‌ভিনফের উক্তি থেকেই তার প্রমাণ মেলে।

জার্মানীতে যখন ফ্যাশিস্টরা মেয়েদেরকে লক্ষ্য করে ‘রসুইঘরে ফিরে যাও’ বলে আন্দোলন চালিয়েছে, সোভিয়েট দেশ তখন তাদেরকে রান্নাঘরের সংকীর্ণ পরিমিতি থেকে মুক্তি দিয়ে বৃহত্তর পৃথিবীতে যাবার ছাড়পত্র দিয়েছে। ফ্যাশিস্টরা যখন বলেছে যে সম্মানস্বার্থিই হল মেয়েদের একমাত্র কাজ; সোভিয়েট সমাজ তখন তাদেরকে ডেকেছে সমাজ

গঠনের কাজে, ডেকেছে ভবিষ্যৎ ইমারতের ভিত পত্তনের কাজে।

বিপ্লবের জয়যাত্রার সঙ্গে সঙ্গে সোভিয়েটের নতুন বিজ্ঞান বহন করে এনেছে নারীমূর্তির ধ্বজা। বিজ্ঞানীরা বলেছে—মেয়েদের মা হওয়ার যে জন্মগত অধিকার আছে তা তারা উপভোগ করতে পারবে...স্বামীর সাহচর্যের ও সন্তানের অধিকারিণী হতে পারবে, তার জন্তে তাদেরকে জীবিকা থেকে বঞ্চিত হতে হবে না; ফলে উন্নত হবে সমস্ত জাতি।

প্রত্যেকটি সোভিয়েট মেয়ে জানে :

(ক) যে, সে বিয়ে করুক বা না করুক কাজের জন্তে তাকে চিন্তা করতে হবে না, সোভিয়েট রাষ্ট্র তাকে খাওয়ার দায়িত্ব নিয়েছে।

(খ) যে, সন্তানের জন্ম হলে রাষ্ট্র বহন করবে হাঁসপাতালের সমস্ত খরচ; অসুস্থ হলে তার চিকিৎসার জন্তে এক পয়সাও লাগবে না, ডাক্তার বাড়ীতে এসে দেখে যাবে তাকে।

(গ) যে, সন্তান জন্মের আগে দু মাস এবং পরে দু মাস (অল্প পরিশ্রমী মেয়েদের ক্ষেত্রে ৩৫ দিন আগে ও ২২ দিন পরে) ছুটি তার বরাদ্দ আছে, এই কম মাস পুরো মাইনে পাবে সে।

(ঘ) যে, সন্তান পালনের জন্তে চিন্তা করতে হবে না তাকে, সন্তানের খরচ হিসাবে রাষ্ট্র তাকে অতিরিক্ত অর্থ দেবে প্রতি মাসে।

(ঙ) যে, সংসারের কাজ করার মত দেশের কল্যাণে কাজ করাও জীবনের একটা বৃহত্তম মর্যাদা।

সোভিয়েট দেশে মেয়ে-শ্রমিকরা বা কৃষক-মেয়েরা কাজে যাবার সময়ে তাদের ছেলেমেয়েদেরকে আমাদের দেশের মতন অনাদৃত অবস্থায় ফেলে রেখে যায় না। যে সব ছেলেমেয়েরা বড় হয়েছে তারা নিঃশ্রমিতভাবে শুলে যায় নইলে ‘রেড কর্ণারে’ (শ্রমিকরা যে সব বড় বড় বাড়ীতে থাকে, সেই সমস্ত বাড়ীতে একটা করে ‘ছোটদের ক্লাবের’ ব্যবস্থা আছে) খেলা

করে, পড়াশোনা করে বা গল্প করে। যে সব ছেলেমেয়েরা কোলের শিশু, তাদেরকে মায়েরা কাজে যাবার সময়ে সঙ্গে নিয়ে গিয়ে কাছাকাছি শিশু-সদনে জমা দিয়ে যায়। সেখানে যত্ন নেয়ার জন্তে খাত্তীরা সারাক্ষণ থাকে। তারা শিশুদের গায়ে লেবেল এঁটে ছোট ছোট বিছানায় শুইয়ে রাখে, খাওয়ায় দাওয়ায়, খেলা করায়; যাদের কিছুটা বুদ্ধি হয়েছে তাদেরকে লেখা পড়া শেখায়। টিফিনের সময়ে মায়েরা এসে শিশু সন্তানদেরকে দুধ খাওয়াতে পারে, তদারক কৰ্তে পারে, আদর করতে পারে। আবার ফেরার পথে বাড়ী নিয়ে যেতে পারে তাদেরকে। কেউ ইচ্ছে করলে বেশী দিনের জন্তে শিশুদেরকে নিশ্চিন্তে সদনের দায়িত্বেও রেখে যেতে পারে। কিন্তু "অধিকাংশ মায়েরাই কাজ থেকে ফেরার পথে ছেলেমেয়েদেরকে বাড়ী নিয়ে যায়।

সারা সোভিয়েট দেশে তিরিশ হাজারের ওপর সাধারণ ভোজনাগার আছে। সেখানে লক্ষ লক্ষ কর্মবাস্ত মানুষদের জন্তে আহাৰ তৈরী হয়ে থাকে। মেয়েরাও দলে দলে এসে সেখানে আহাৰ গ্রহণ করে। রান্নাঘরের হাজার রকম ঝামেলা থেকে ছাড়া পেয়ে তারা সেই সময়টা অগ্ৰাণ্ড মূল্যবান কাজকৰ্মে ব্যয় করার সুযোগ পেয়েছে। কিন্তু তাই বলে এ কথা মনে করার কোনো কারণ নেই যে সোভিয়েটের মেয়েরা রন্ধন-শিল্পকে বিসর্জন দিয়েছে বা সোভিয়েট পরিবারের অভিধান থেকে 'রান্নাঘর' শব্দটা মুছে গিয়েছে চিরদিনের জন্তে। হাজার হাজার সোভিয়েট পরিবার বাড়ীতে রান্না করে এবং যারা নিয়মিতভাবে বাইরে খায় তারাও ছুটির দিনে বা বিশেষ উপলক্ষে বাড়ীতে রান্নার উৎসব পালন করে। রন্ধন-শিল্পের প্রয়োজনীয়তা অস্বীকার করে না সোভিয়েটের মেয়েরা কিন্তু তাই বলে তাদের জীবনের দুই-তৃতীয়াংশ সময় তারা রান্নাঘরের পেছনে নষ্ট কৰ্তেও রাজী নয়।

সাধারণত সোভিয়েট শ্রমশিল্পে কাজের সময় হল সাত ঘণ্টা। যে সব কলকারখানার কাজ অত্যন্ত শ্রমসাধ্য সেখানে মেয়ে পুরুষ কাউকেই ছয় ঘণ্টার বেশী পরিশ্রম করতে দেয়া হয় না। বাকী সময়টা তারা স্বাধীন। পড়াশোনা, বেড়ানো, সামাজিক কাজকর্ম, যা ইচ্ছে করতে পারে তারা। কেউ পথ আটকাবে না তাদের, অন্নচিন্তায় চুল পাকাতে হবে না কাউকে, পয়সার অভাবে দুধ না পেয়ে মারা যাবে না কারো শিশু সন্তান, পরিশ্রান্ত হয়ে অভিশপ্ত জীবন কাটাতে হবে না কাউকে বস্তির পাঁকের মধ্যে। এ নিশ্চিতি আছে বলেই সোভিয়েটের ছেলেমেয়েরা মাথা উঁচু করে চলতে পারে।

এবার দেখা যাক রাষ্ট্রের তরফ থেকে সোভিয়েটের মেয়েরা কি কি সুবিধা পেয়ে থাকে। আগেই জানিয়েছি যে সোভিয়েট কতৃপক্ষ দেশের প্রতিটি লোকের চিকিৎসার দায়িত্ব গ্রহণ করেছে। তার জন্তে জনসাধারণকে কোনো খরচ বহন করতে হয় না। অসুস্থ বোধ করলেই ডাক্তারখানা বা হাসপাতালে গিয়ে পরীক্ষা করালেই হল। শয্যাশায়ী হলে ক্লিনিকে যাবার প্রয়োজন করে না। খবর পাঠাইলেই ডাক্তার এবং নার্স তৎক্ষণাত্ চিকিৎসার আয়োজন করে।

অসুস্থ হয়ে পড়লে শ্রমিক সংঘ সঙ্গে সঙ্গে ছুটির ব্যবস্থা করে এবং অর্থ সাহায্য দেয়। যারা শ্রমিক সংঘের সভ্য এবং এক জায়গায় স্থির হয়ে ছয় বছর কাজ করেছে তারা পুরো বেতন পায়। কিন্তু যারা তা নয় তাদেরকে দেয়া হয় শতকরা পঞ্চাশ ভাগ সাহায্য। কেউ যদি কোনো পীড়ায় বা দুর্ঘটনায় অকর্মণ্য হয়ে পড়ে, শ্রমিক সংঘ তাকে নিয়মিতভাবে তার আয়ের ৪৫ থেকে ১০০ ভাগ পর্যন্ত অর্থ সাহায্য দেয়। অর্থাৎ সোভিয়েট দেশের প্রত্যেকটি মানুষ জানে বিপদে পড়লে তাকে না খেয়ে মরতে হবে না, রাষ্ট্র তার অয়ের সংস্থান করবে।

বুদ্ধ বয়সে মেয়ে পুরুষ প্রত্যেক শ্রমিকেরই পেন্সনের ব্যবস্থা আছে। সাধারণত বিশ বছর কাজ করার পর বীমাব্যবস্থা চালু হয় অর্থাৎ সে তার আসল মাইনের শতকরা ৫০ থেকে ৬০ ভাগ পেন্সন পেয়ে থাকে। পুরুষেরা ষাট বছর এবং মেয়েরা পঁয়তাল্লিশ বছর বয়স হলেই পেন্সন দাবী করতে পারে।

সোভিয়েট দেশে সবাই পাঁচ দিন কাজ করে এবং একদিন ছুটি ভোগ করে (ওদের দেশে ছয় দিনে সপ্তাহ) এবং প্রত্যেক বছরে দু থেকে চার সপ্তাহ পর্যন্ত বেতনসহ ছুটি পেয়ে থাকে। এই ছুটির সময়ে সবাই স্বাস্থ্য-নিবাস বা বিশ্রাম-গৃহে দিন কাটায়। ষাওয়া আসার ভাড়া ও সেখানে থাকার সমস্ত খরচ শ্রমিক সংঘই দেয়। কৃষ্ণ সাগরের উপকূলে ও ককেশাস অঞ্চলে হাজার হাজার স্বাস্থ্য-নিবাস ও বিশ্রাম-গৃহ গড়ে উঠেছে সোভিয়েট সরকারের চেষ্টায়। বিপ্লবের আগে রাজা মহারাজারদের যে সব বড় বড় প্রাসাদ ছিল এই সব অঞ্চলে, বিপ্লবের পর সেই সব প্রাসাদগুলিকে চাষী-মজুরদের স্বাস্থ্য-নিবাসে পরিণত করা হয়েছে। প্রতি বছর লক্ষ লক্ষ সোভিয়েট নাগরিক এই সব জায়গায় ভ্রমণে আসে এবং উৎসবের মধ্যে দিয়ে দিন কাটিয়ে যায়।

এ হল বাৎসরিক ছুটি কাটানোর কথা। কিন্তু রবিবারের ছুটি কাটানোর জগ্রেও সোভিয়েট দেশে বহু One Day Rest Home রয়েছে। প্রতি রবিবার লোকেদের ভীড়ে সরগরম হয়ে ওঠে এই বিশ্রামাবাস। সবাই ছুটিতে উৎসব মানাতে আসে। আলাদা আলাদা ভাবে নয়, সবাই একসঙ্গে সেদিনের উল্লাসকে ভাগ করে নেয় খেলা, ভ্রমণ, গল্প ইত্যাদির মধ্যে দিয়ে। সেদিন বিশ্রামাবাস থেকে চারবার আহার পরিবেশন করা হয় সবাইকে। খাওয়ার পর যারা যেখানে ইচ্ছে দলবেঁধে বেড়াতে

যেতে পারে, নৌকাভ্রমণে বেরোতে পারে, টেনিস, ভলিবল, টেবল-ক্রীড়া
যা ইচ্ছে খেলতে পারে, গল্প করে সময় কাটাতে পারে.....মুঠো মুঠো
সময় কী ভাবে খরচ করবে তা নির্ভর করে সময়ের মালিকের ওপর।

১৯৩৮ সালের একটা হিসাব থেকে জানা যায় যে সোভিয়েট শ্রমিক সংঘ
সে বছরে তার ছয় লক্ষ সভ্যকে এই রকম ‘একদিনের বিশ্রামাবাসে’
পাঠাবার ব্যবস্থা করেছে।

এখানে জেনে রাখা দরকার যে প্রত্যেক স্বাস্থ্য-নিবাস ও বিশ্রামাবাসে
সারাক্ষণের ডাক্তার এবং নার্সের ব্যবস্থা আছে। নিয়মিতভাবে তারা
প্রত্যেক ভ্রমণকারীর স্বাস্থ্য পরীক্ষা করে দেখে এবং সামান্য অসুস্থ হলেই
তৎক্ষণাৎ চিকিৎসার ব্যবস্থা করে। এর জন্তে কাউকে এক পয়সা ফি
দিতে হয় না।

সোভিয়েট দেশের মানুষ এক নিশ্চিতি পেয়েছে। সে নিশ্চিতি হল যে
মানুষকে বড় করার জন্তে, জীবনকে প্রসারিত করার জন্তে এবং মনকে
সমৃদ্ধ করার জন্তে যে মালমশলা দরকার তা সমস্ত পাওয়া যাবে যোগ
সোভিয়েট-ব্যবস্থা থেকে। কোনো রকম দৈন্য কলুষিত করবে না তাদের
নিষ্কলুষ জীবনকে। এই নিশ্চিতিই এক-ষষ্ঠমাংশ দেশের মানুষদের
চোখে এক বৃহত্তম সম্ভাবনাকে আলোকিত করে তুলেছে।

এই অধ্যায়ে সোভিয়েট দেশের পারিবারিক জীবনের বিস্তার ও গুরুত্ব
বিশেষভাবে আলোচনা করে দেখার প্রয়োজনীয়তা রয়েছে।

সোভিয়েট সমাজের জন্মের পর থেকে ‘পরিবারের’ প্রশ্নকে বৃহত্তর
সমস্যা হিসাবে গভীরভাবে চিন্তা করে দেখেছে সোভিয়েট কতৃপক্ষ।
কারণ পারিবারিক সম্বন্ধের ওপরই সমাজের গঠনবিহীনতা অনেকটা
নির্ভরশীল। সে কারণে বিপ্লবের কিছুদিন পরে ১৯১৮ সালের শরৎকালে
কতৃপক্ষ ‘জন্ম, বিবাহ ও মৃত্যু’ এবং ‘বিবাহ, পরিবার ও অভিভাবকত্ব’

সম্বন্ধে বিস্তারিত আইনকানুন জারী করে। তার পরও বহু ছোট খাটো বিধান কার্যকরী হয়েছে বিশেষ করে ১৯৩৬ ও ১৯৪৪ সালে। এবং এই বিধান অনুযায়ীই সমস্ত কিছু নিয়ন্ত্রিত হয়ে থাকে। এই বিধানগুলি গৃহীত হবার আগে সোভিয়েট সরকার সেগুলি সারা দেশবাসীর সামনে উপস্থিত করেছিল এবং জনসাধারণের মতামত ও সংশোধনগুলি বিচার করার পর সেগুলি সর্বসম্মতিক্রমে গৃহীত হয়েছিল।

বিবাহ সম্বন্ধে সোভিয়েটের বিধান কী ?

সোভিয়েট-ব্যবস্থা একমাত্র লৌকিক বিবাহ (civil marriage) স্বীকার করে। কিন্তু তাই বলে গির্জার আচার ও অনুষ্ঠান মার্কিন বিবাহে কতৃপক্ষ কোনো বাধা দেয় না। সোভিয়েট গঠনতন্ত্রেই যে কোনো মানুষের ধর্ম-সংক্রান্ত আচার-অনুষ্ঠানে যোগ দেয়ার পূর্ণ স্বাধীনতা স্বীকৃত হয়েছে। ধর্ম এবং রাষ্ট্র দুটো পরস্পর থেকে আলাদা। সুতরাং একমাত্র লৌকিক বিবাহই সোভিয়েট সমাজের মতে আইনসম্মত বিবাহ। এ কথা অবিশ্যি বিপ্লব-পূর্ব যুগের বিবাহ সম্বন্ধে প্রযোজ্য নয়। বিপ্লবের পর সেগুলিকে আইনসম্মত বলেই মেনে নেয়া হয়েছে।

সোভিয়েট দেশে কোনো যুবক যুবতী বিয়ে করতে চাইলে তাদেরকে এই জানিয়ে একটা আবেদন করতে হয় রেজিস্ট্রারের আপিসে যে তাদের বিয়ের পথে কোনো রকম আইনগত বাধা বিপত্তি নেই এবং তাদের দুজনেরই স্বাস্থ্য রাষ্ট্র কতৃক পরীক্ষিত হয়েছে। তাদেরকে আরও জানাতে হয় যে এই বিয়ে তাদের প্রথম, দ্বিতীয় কি তৃতীয় বিয়ে ও তাদের আগেকার বিয়ের কোনো ছেলে মেয়ে আছে কিনা। তারপর রেজিস্ট্রার যুবক-যুবতীটির কাছে বিয়ের আইনকানুনগুলি পড়ে শোনায় এবং ভুল খবর দেয়ার ফলাফল সম্বন্ধে সতর্ক করে দেয়। অতঃপর আইনের কোনো রকম বাধা না থাকলে দুজনের স্বাক্ষর লিপিবদ্ধ করার

পর বিয়ের কাজ শেষ হয়। এ ব্যাপারে রেজিস্ট্রারই হল দায়িত্বশীল সাক্ষী। বিয়ের পর তাদের দুজনের 'ছাড়পত্রে'* এই বিয়ের কথা স্বাভাবিকভাবে লিপিবদ্ধ করা হয়। যদি দেখা যায় যে কোনো আইনগত অনুবিধা আছে তাহলে বিয়ে স্থগিত রেখে সে সম্বন্ধে অনুসন্ধান চলে।

সোভিয়েট আইন অনুসারে দু'পক্ষের অনুমোদন থাকলেই বিয়ে রেজিস্ট্রীকৃত হতে পারে। তৃতীয় পক্ষ যেমন বাপ-মা বা অভিভাবকদের হস্তক্ষেপ সেখানে অপ্রয়োজনীয়। সোভিয়েট আইন এমন কি অভিভাবকদের পরোক্ষ সম্মতির অপেক্ষাও রাখে না। অভিভাবকদের অনুমোদন না থাকলে তাদের ছেলে বা মেয়ে সম্পত্তিচ্যুত হবে, এ প্রশ্ন ও দেশে ওঠে না। তাই প্রত্যেক নাগরিক যারই বিবাহযোগ্য বয়স (আঠারো বছর) হয়েছে তারই নিজের সঙ্গী বা সঙ্গিনী বাছাই করে নেয়ার স্বাধীনতা আছে।

পাঠকদের মনে স্বভাবতই প্রশ্ন জাগতে পারে যে আচ্ছা, সোভিয়েটের ছেলেমেয়েরা কি তাহলে বাপ-মা বা অভিভাবকদের না জানিয়েই বিয়ে করে? তারা কি সত্যিই এতোই উচ্ছৃংখল এবং বাপ-মাদের প্রতি শ্রদ্ধাহীন? পাঠকদের মনে এ প্রশ্ন জাগা হয়তো অস্বাভাবিক নয় কিন্তু সোভিয়েট সমাজকে আমাদের আজ এক নতুন বাস্তববাদী দৃষ্টিভঙ্গী দিয়ে বিচার করে দেখতে হবে। কারণ ওপরে যে বিবাহ-আইনের কথা উল্লেখ করা হয়েছে তার ভিত্তি রচিত হয়েছে 'সমস্ত ঐরকম শোষণমুক্ত বিধানের' জমিনের ওপর। আমাদের দেশে বা অগ্রাণু দেশে বাপ-মা বা

* সোভিয়েট দেশে নারী পুরুষ প্রত্যেক নাগরিকের একটি করে ছাড়পত্র আছে। এই ছাড়পত্রই তার নাগরিকত্ব প্রমাণ করে।

অভিভাবকদের অগ্রায় হস্তক্ষেপে কত তরুণ জীবন নষ্ট হয়েছে এবং ধ্বংসে গিয়েছে সেই কলঙ্কময় ছবি আমাদের চোখের সামনে অত্যন্ত স্পষ্ট। সোভিয়েটের সাম্যবাদী সমাজব্যবস্থা তাই অর্থনৈতিক স্বাধীনতার সাথে সাথে এই সর্বাঙ্গীন মুক্তির ভিত্তি পত্তন করেছে। আসলে সোভিয়েটের ছেলেমেয়েরা বিয়ে করার আগে নিশ্চয়ই অভিভাবকদের জানিয়ে বিয়ে করে কারণ অভিভাবকদের সঙ্গে তাদের সম্পর্ক অত্যন্ত মধুর ও অত্যন্ত স্বাভাবিক। কিন্তু আইন লিপিবদ্ধ রইল। যদি অভিভাবকদের পক্ষ থেকে কোনো অগ্রায় হস্তক্ষেপের চেষ্টা চলে সে ক্ষেত্রে এই আইন হবে সেই তরুণদের সমর্থক।

কোনো যুবক যুবতী যদি লৌকিক বিবাহ না করে স্বামী-স্ত্রীর মত বসবাস কতে চায়, সোভিয়েট আইন তাতে কোনো বাধা দেয় না। সোভিয়েট নাগরিকের এ স্বাধীনতা আছে। এবং তাদের সন্তান জন্মলাভ করলে অবৈধ বলে অবজ্ঞাত হয় না। তাদের চোখে কোনো শিশুই অবৈধ নয়। প্রত্যেক শিশুই রাষ্ট্রের কাছে সমান দৃষ্টি পাবার দাবী রাখে। কিন্তু ওদেশে এ রকমের সহবাস ধীরে ধীরে হ্রাস পেয়েছে। আজ সাধারণত সবাই রেজিস্ট্রারের আপিসে গিয়েই তাদের বিয়ে তালিকাভুক্ত করায়। বিবাহ-বিচ্ছেদের বেলাও তারা তেমনি রেজিস্ট্রারের কাছে উপস্থিতি হয়ে আবেদন পেশ করে এবং জনসাধারণের আদালতে বিচার হওয়ার পর তারা পরস্পরের কাছ থেকে বিদায় নেয়। সম্ভব হলে আদালত দুজনের মধ্যে মীমাংসা করার চেষ্টা করে। ১৯৪৪ সালের নতুন ডিক্রী অনুযায়ী বর্তমানে বিবাহ-বিচ্ছেদের অনুমতি দেয়া না দেয়া আদালতের ওপর নির্ভর করে। কেউ হঠাৎ খেয়ালের বশে বিবাহ-বিচ্ছেদ ঘটাতে চাইলেই তা ঘটাতে পারে না। কিন্তু তাই বলে বিপ্লব-পূর্ব যুগের মতন নয়, প্রয়োজন থাকলে এবং সমীচীন হলে,

বিবাহ-বিচ্ছেদ কোনো অজুহাতেই বাধা দেয়া হয় না।

বিবাহ-বিচ্ছেদ হলে • ছেলে-মেয়েরা (যদি ইতিমধ্যে কোনো সন্তান জন্মলাভ করে থাকে) :মা বা বাবা 'কার কাছে থাকবে এবং কে তার ভরণ-পোষণের খরচ বহন করবে তা আদালতে স্থিরীকৃত হয়।

একটা কথা প্রায়ই শোনা যায় যে সোভিয়েট দেশে মেয়েদের জাতীয়করণ (nationalisation) হয়েছে অর্থাৎ সোভিয়েট সমাজের নৈতিক জীবন এত দূষিত যে সেখানে সতীত্ব, মাতৃত্ব ও সত্যতা বলে কোনো জিনিস নেই।

এই মিথ্যা অপপ্রচারের মূল হল সাম্রাজ্যবাদী দেশে। সেই দেশের গণ্ডী ছাপিয়ে আমাদের দেশে এসে পৌঁচেছে এই মিথ্যা প্রচারের স্রোত। আসল কথা সোভিয়েট বিপ্লব মানুষে-মানুষে এবং নারী-পুরুষে যে অবাধ স্বাধীনতার পত্তন করেছে, সেই স্বাধীনতার ওপর সাম্রাজ্যবাদীদের প্রধান আপত্তি। এবং সে জগ্রেই তাদের মুখে সতীত্ব ও মাতৃত্বের জিগির!

আজ আমাদের সমাজের পানে তাকালে কী দেখতে পাই? দেখতে পাই স্ত্রী পুরুষের মধ্যে নানান অসাম্য ও অসামঞ্জস্য, ছেলে-মেয়েদের মধ্যে পারস্পরিক স্বাভাবিক মেলামেশার অভাব, তাদের মধ্যে যৌনজ্ঞান সম্বন্ধে অমার্জনীয় অজ্ঞতা, সমস্ত সমাজকে এক কুৎসিত রূপে ভরে তুলেছে। একটি ছেলে কি একটি মেয়ে পরস্পরের মধ্যে অত্যন্ত স্বাভাবিকভাবে কথা বলতে পারে না। যদি কখনও লোকচক্ষুর বাইরে তাদের দুজনকে কথা বলতে দেখি, তাহলে দেখবো অত্যন্ত মেকী অভিনয়িক ভঙ্গীতে তারা কথা বলছে। দুজনেই দুজনের সম্বন্ধে এমন এক কাল্পনিক স্বপ্নজাল সৃষ্টি করেছে যা স্বাভাবিকও নয়, বাস্তবও নয়। কিন্তু একদিন বাস্তব জগতের মুখোমুখি তাদের দুজনকেই দাঁড়াতে হয়। সেদিন তাদের সামনে তিনটি পথ খোলা; প্রথম, অত্যন্ত ভালো ছেলের মতন সহস্র অসঙ্গতিপূর্ণ সামাজিক বিধানকে

মেনে নেয়া ; দ্বিতীয়, সামাজিক বিধানকে মন দিয়ে গ্রহণ করতে না পেরে হতাশার আশ্রয় খোঁজা। তৃতীয়, বিদ্রোহ করা। "মানুষে মানুষে এবং নারী পুরুষে স্বাভাবিক মেলামেশার অভাবই সমস্ত রকম সামাজিক দুর্নীতি, ব্যাভিচার ও হতাশার জন্মে দায়ী। এই অসঙ্গতিকেই সোভিয়েট-বিপ্লবের সম্মার্জনী পৃথিবীর এক-ষষ্ঠমাংশ অংশ থেকে ঝেঁটিয়ে সাফ করে দিয়েছে। আজ তাদের মধ্যে তাই দুর্নীতি নেই, অসামঞ্জস্য নেই।

আজকে সোভিয়েট সমাজের মেয়েদের ওপর থেকে সমস্ত রকম শোষণ আইন জারী করে তুলে নেয়া হয়েছে। জ্বারের আমলের কথাই ধরা যাক না। সেদিন গণিকারা পথে ঘাটে, সমাজের গলিঘুঁজিতে সমস্ত জনসমাজের স্বাস্থ্যকে দূষিত ও রোগাক্রান্ত করে তুলেছিল। কিন্তু আজ ? সোভিয়েট-ব্যবস্থার জন্মের পর থেকে গণিকালয়ের দরজাগুলো চিরদিনের জন্মে বন্ধ। আজ আর মেয়েদেরকে কেউ পণ্য হিসাবে ব্যবহার করতে পারবে না। রাষ্ট্র আইন করে গণিকাবৃত্তিকে বেআইনী ঘোষণা করেছে। যারা তিরিশ বছর আগে এই বৃত্তি গ্রহণ করে জীবিকা আহরণ করত, তারা আজ সমাজে সংস্কৃত, সুপ্রতিষ্ঠিত।

সাম্যবাদী রাষ্ট্র মাতৃত্বকে আজ যে মর্যাদা দিয়েছে সে মর্যাদার শতাংশের একাংশও অল্প কোনো দেশ দেয়নি। সন্তানের জন্মের পর তার লালন-পালনের জন্মে রাষ্ট্র নিয়মিতভাবে মায়েদের কি ভাবে অর্থ সাহায্য করে, নীচের হিসাব থেকে তা পরিস্ফুট হয়ে উঠবে :—

| | এককালীন দান (রুবল) | মাসিক দান (রুবল) |
|-------------------------|-------------------------|-----------------------|
| তৃতীয় সন্তান জন্মের পর | ৪০০ | — |
| চতুর্থ " " " | ১,৩০০ | ৪০ |
| পঞ্চম " " " | ১,৭০০ | ১২০ |

| | এককালীন দান (রুবল) | মাসিক দান (রুবল) |
|----------------------|-------------------------|-----------------------|
| ষষ্ঠম „ „ „ | ২,০০০ | ১৪০ |
| সপ্তম „ „ „ | ২,৫০০ | ২০০ |
| অষ্টম „ „ „ | ২,৫০০ | ২০০ |
| নবম „ „ „ | ৩,৫০০ | ২৫০ |
| দশম „ „ „ | ৩,৫০০ | ২৫০ |

দশম সন্তানের জন্মের পর প্রত্যেকটি

সন্তানের বেলায় ৫,০০০ ৩০০

যে সব তরুণ তরুণীর বিবাহ রেজিস্ট্রারের আপিসে তালিকাভুক্ত হয়নি তারা রাষ্ট্র থেকে সন্তানের ১২ বছর বয়স না হওয়া পর্যন্ত নিম্নলিখিত অর্থ সাহায্য পেয়ে থাকে :—

| | মাসিক দান |
|--------------|-------------|
| প্রথম সন্তান | ১০০ রুবল |
| দ্বিতীয় „ | ১৫০ „ |
| তৃতীয় „ | ২০০ „ |

যদি কোনো অবিবাহিতা মা তার সন্তানকে লালন-পালন কর্তে ইচ্ছুক না হয় বা অথবা কোনো দিক থেকে অসুবিধা বোধ করে তাহলে শিশু-সদন তার সমস্ত দায়িত্ব গ্রহণ করে। তার সমস্ত অর্থ ব্যয়ের ভার নেয় সোভিয়েট সরকার। অর্থাৎ বাপ বা মাকে সন্তানের ভবিষ্যতের জন্তে কোনো অর্থ খরচ কর্তে হয় না। কিন্তু সন্তানের ওপর মার দাবী চিরদিন অক্ষুণ্ণ থাকে, যে কোনো দিন মা ইচ্ছে করলে তার সন্তানকে ফিরিয়ে নিয়ে আসতে পারে।

অর্থ সাহায্য ছাড়াও মায়েরা ‘মাতৃ পদক’ পেয়ে থাকে যেমন “অর্ডার অব

দি গ্লোরিয়াস মাদারহুড”, “হিরোয়িন মাদার”, “অর্ডার অব দি হিরোয়িন মাদার” ইত্যাদি। প্রত্যেকটি পদক অবিশিষ্ট সন্তানের সংখ্যার ওপর নির্ভর করে।

এবারে সোভিয়েট সমাজ মায়েদের আরো কি কি সুবিধা দিয়েছে দেখা যাক। ১৯১৩ সালে প্রসূতি সদনে বেড-এর সংখ্যা ছিল মাত্র সাত হাজার। ১৯৪১ সালে তা বেড়েছে উনিশগুণ—অর্থাৎ এক লক্ষ চল্লিশ হাজারেরও বেশী (শহরে ৭৬,০০০ ; গ্রামে ৬৪,০০০)। কিন্তু প্রসূতি সদনে যাবার আগে মায়েদের অনেক কিছু জ্ঞাতব্য বিষয় জানবার থাকতে পারে। সে কারণে সারা সোভিয়েট দেশে প্রায় ৫,০০০ পরামর্শ-কেন্দ্র রয়েছে। এই কেন্দ্রগুলির কাজ হল মায়েদেরকে উপদেশ ও শিক্ষা দিয়ে সাহায্য করা। কিন্তু সোভিয়েটের প্রসূতি সদনগুলি কী রকম? আমাদের ভারতবর্ষের মতন, না তার চেয়ে কিছুটা উন্নত। আমাদের দেশের কথা দূরে থাক, কোনো দেশই এ ব্যাপারে সোভিয়েটের সঙ্গে দাঁড়াতে পারে না। সদনগুলি বাড়ীর তুলনায় যেন একেকটি স্বর্গ। হাজার রকম সুখ সুবিধা যা আমরা কল্পনা কর্তেও সাহস করি না। পৃথিবীতে এমন কোনো জায়গা আছে যেখানকার মাতৃ-সদনে কোনো প্রসূতিকে বিনামূল্যে স্থান দেয়া হয়? এমন কোনো মাতৃসদন আছে যেখানে প্রসূতির সারাক্ষণ ‘ইয়ার-ফোন’ (এই যন্ত্রটি দু কানে লাগাল বেতারের সমস্ত কিছু অনুষ্ঠান শোনা যায় অথচ তার শব্দ বাইরে ধ্বনিত হয়ে কারো বিরক্তি উৎপাদন করে না) এর সাহায্যে পৃথিবীর সঙ্গীত শুনতে পারে? এমন কোনো দেশ আছে, যে দেশ সোভিয়েটের মত গর্ব করে বলতে পারে যে তার মাতৃ-সদনে প্রসূতির বিছানার ধারের টেলিফোনের সাহায্যে যতক্ষণ ইচ্ছে তার স্বামী, পুত্র বা বন্ধু বান্ধবদের সঙ্গে কথোপকথন চালাতে পারে? এবং তাও বিনামূল্যে?

ভারতবর্ষের মেয়েরা একবার কল্পনা করুন যে সাধারণ চাকীর মেয়ে, সাধারণ মজুরের মেয়ে, সোভিয়েট দেশে আজ কোন্ স্তরে উন্নীত হয়েছে ! কেন আজ সেই দেশ তার জনসাধারণকে, তার নারীজাতিকে এমনি অব্যাহিত সুখ, সুবিধা, ঐশ্বর্য দিচ্ছে যা অগ্ৰাণ্য দেশ দিতে কুণ্ঠিত । দিচ্ছে তার কারণ সোভিয়েট দেশ কোনো কায়েমী স্বার্থ-সম্পন্ন দল বা চক্রের ব্যক্তিগত সম্পত্তি নয় । জনসাধারণই আজ সে দেশের মালিক ।

প্রসব-কালীন অবসর, মাতৃ-সদন ও অর্থ সাহায্য ছাড়াও প্রসূতির আরো দুটি সুবিধা পেয়ে থাকে যেমন গর্ভাবস্থার চতুর্থ মাস থেকে তাদেরকে পরিশ্রমবহুল কাজ বা অতিরিক্ত কাজ (overtime) দেয়া হয় না । এবং সে সময় থেকেই তারা ডবল রেশন পেয়ে থাকে ।

পারিবারিক ভিত্তি আরো বেশী দৃঢ় করার জন্তে সোভিয়েট দেশে কতকগুলি কর ধার্য করা হয়েছে । যারা অবিবাহিত, সন্তানহীন বা এক বা দুই সন্তানের বাপ-মা তারা পড়ে এই আইনের গণ্ঠীতে । পুরুষদের ২০ থেকে ৫০ বছর এবং মেয়েদের ২০ থেকে ৪৫ বছর বয়স পর্যন্ত এই কর নিয়মিতভাবে দিতে হয় ।

(ক) অবিবাহিত বা সন্তানহীন স্ত্রী-পুরুষ যারা আয়-কর দেয় তাদেরকে তাদের আয়ের শতকরা ছয় ভাগ অর্থ কর হিসাবে দিতে হয় । যাদের একটি সন্তান তারা দেয় শতকরা এক ভাগ এবং যারা দুই সন্তানের বাপ-মা তারা দেয় শতকরা এক ভাগের আধ ভাগ ।

(খ) যৌথ চাকী, স্বতন্ত্র চাকী বা খামারের অগ্ৰাণ্য কর্মী যারা কৃষি-কর দেয় তাদেরকে যথাক্রমে ১৫০ রুবল , ৫০ রুবল ও ২৫ রুবল দিতে হয় ।

(গ) অগ্ৰাণ্য নাগরিক যারা আয়-কর বা কৃষি-কর দেয় না তারা যথাক্রমে ৯০ রুবল, ৩০ রুবল ও পনের রুবল কর দিয়ে থাকে ।

এই করের অর্থ কি ? এই কর ধার্যের অর্থ মিলবে সোভিয়েটের নীতির

মধ্যে। প্রত্যেকটি নাগরিক অত্যন্ত সুস্থ ও স্বাভাবিকভাবে তার জীবনকে গড়ে তুলুক...সোভিয়েটের এই নীতিই তার প্রত্যেকটি কার্যপদ্ধতির মধ্যে ওতপ্রোতভাবে জড়িয়ে রয়েছে। সুতরাং এই কর সমস্ত স্ত্রী-পুরুষকে চাপ দিচ্ছে যাতে তারা অত্যন্ত স্বাভাবিকভাবে সংসার জীবন যাপন করে, অত্যন্ত সুস্থভাবে তাদের পারম্পরিক সম্পর্কে আরও মধুর ও আরও ঘনিষ্ঠ করে তোলে। বয়ঃপ্রাপ্তির পর একটা মানুষ কেন সাধারণভাবে অগ্র সকল মানুষের মত জীবন যাপন করবে না? বিয়ের পর স্ত্রী-পুরুষ কেন তার স্বাভাবিক কর্তব্য পালন করবে না? এ হল ওদেশের প্রশ্ন। প্রত্যেকটি মানুষকে এ বিষয়ে সচেষ্টি হতেই হবে কারণ সামাজিক জীব হিসাবে তা না করলে সমগ্র সমাজ ক্ষতিগ্রস্ত হবে তাতে। একটা বিরাট যন্ত্রের ছোট কগ্ উইল থেমে গেলে সমস্ত যন্ত্রই যেমন অচল হয়ে পড়ে, একটা মানুষের কর্তব্যচ্যুতিও তেমনি সমাজে একটা বিরাট ফাঁক সৃষ্টি করে।

আমাদের দেশের কথা আলাদা। এখানে আমরা স্বাভাবিকভাবে, সুস্থভাবে জীবনকে গড়ে তোলার কথা চিন্তাই করতে পারি না। দৈনন্দিন সংগ্রামের মধ্যে দিয়ে জীবনকে ভেঙে চুরে ছুঁড়ে, ছোট করে তবে আমাদের বাঁচার পথ করে চলতে হয়। সোভিয়েট দেশ পেরেছে। কারণ একটা বৈজ্ঞানিক ভিত্তির ওপর তারা দাঁড় করিয়েছে তাদের সমস্ত সমাজব্যবস্থাকে।

সোভিয়েট ছেলে-মেয়েদের শিক্ষার দায়িত্ব রাষ্ট্র সম্পূর্ণভাবে নিজের ওপর নিয়েছে কারণ ছেলেমেয়েদের ওপর বাপ-মার যা দায়িত্ব আছে তার চেয়েও বেশী দায়িত্ব আছে রাষ্ট্রের কারণ আগামী সমাজকে অবহেলার চোখে দেখলে চলবে না। তাই যখন ও দেশের শিক্ষা-জগতের দিকে তাকাই তখন অবাক লাগে...অবাক লাগে ওদের বিস্ফার দেখে। এই বিস্ফার,

এই ব্যাপ্তি ওরা পেল কোথায়? কোন্ যাত্রার গুণে ওরা এই সম্পদের
অধিকারী হল?

১৯১৭ সালের রুশ সমাজের দিকে তাকাই। অশিক্ষার অন্ধকারে তলিয়ে
আছে সমস্ত দেশ। শিক্ষা হল ধনিকদের একচেটে। দেশের হাজার
হাজার দরিদ্র মজুর চাকী তা থেকে বঞ্চিত। আজ সে অবস্থা পালটেছে
আগাগোড়া।

১৯১৩ সালে সমস্ত রুশ সাম্রাজ্যে প্রাথমিক ও মাধ্যমিক স্কুলযাত্রী
ছেলেমেয়ের সংখ্যা ছিল ৭৮ লক্ষ অর্থাৎ জমিদার, বড়লোক ও উচ্চ মধ্য-
বিত্ত শ্রেণীর ছেলেমেয়েরাই যেত স্কুলে পড়তে। ১৯৪০ সালে সেই
ছেলেমেয়েদের সংখ্যা হল ৩ কোটি ৫০ লক্ষ।

১৯১৪ সালে শিশু সদনে মোট বেড-এর সংখ্যা ছিল ৫৫০। ভেবে দেখা
যাক ১৯৩৮ সালে সে সংখ্যা কত উঁচুতে উঠতে পারে! ভাবতে গেলে
কল্পনাশক্তিকে অনেক দূর টেনে নিয়ে যেতে হবে। কারণ তার সংখ্যা-
বৃদ্ধি এক অবিশ্বাস্য উচ্চতায় উঠতে পেরেছে। ৫৫০ থেকে একেবারে ৭
লক্ষ, ২৩ হাজার, ৬৫১-র। ১৯৩৬ সালে কিণ্ডারগার্টেনের সংখ্যা হল
৫৫,১০২ যা ১৯১৯ সালে ছিল মাত্র ২৭৫টি।

ছেলেমেয়েদের কি করে শিক্ষা দেবে...কী করে স্কুলের ফী আর বইয়ের
খরচ জোগাবে...এ চিন্তা ও দেশের কোনো বাপ মাকে কতে হয় না।
কারণ শিক্ষার দায়িত্ব মূলত রাষ্ট্রই গ্রহণ করেছে। এবং আইন জারী
করে প্রত্যেকটি ছেলেমেয়ের জন্য শিক্ষাকে বাধ্যতামূলক বলে ঘোষণা
করেছে।

একটি ছেলে কি একটি মেয়ের যখন তিন বছর বয়স তখন থেকেই সে
কমিসেরিয়ট অব হেল্থের তত্ত্বাবধানে থাকে অর্থাৎ শিশুসদন তার
কল্যাণের জন্য সমস্ত দিকে দৃষ্টি দেয়। এবং এই শিশুসদনে শিক্ষার

ভার গ্রহণ করে কমিসেরিয়ট অব এডুকেশন। সাত বছর পর্যন্ত এরই তত্ত্বাবধানে কিণ্ডারগার্টেন শিক্ষা অগ্রসর হতে থাকে।

আগেই জানিয়েছি কাজে যাবার পৃথক মায়েরা তাদের ছেলেমেয়েদেরকে এই শিশু সদনে জমা রেখে যায়। অর্থাৎ সকলে ৮টা থেকে সন্ধ্যা ৫টা কিংবা ৯টা থেকে ৭টা পর্যন্ত ছেলেমেয়েরা (যারা স্থায়ীভাবে শিশুসদনেই থাকে তাদের কথা স্বতন্ত্র) এইখানে থাকে। এই নয়-দশ ঘণ্টা সময় তারা যে ভাবে কাটায় তা অত্যন্ত কৌতুহলপ্রদ। সাধারণ খেলা, শিক্ষামূলক খেলা, ভ্রমণ, খাওয়া-দাওয়া এবং ঘুম—এ হল মোটামুটি তাদের প্রোগ্রাম। শিক্ষামূলক খেলার মধ্যে দিয়েই সাধারণ বুদ্ধিবৃত্তির সাহায্যে তারা শিক্ষা গ্রহণ করে।

আট বছর বয়স থেকে আরম্ভ হয় বাধ্যতামূলক শিক্ষা। এবং পনের বছর বয়স পর্যন্ত তা চালু থাকে। পনের বছর বয়স থেকে উচ্চ শিক্ষার আয়োজন। এই উচ্চ শিক্ষা অবিশিষ্ট বাধ্যতামূলক নয়। যার যে বিষয়ে আগ্রহ ও যার যে পরিমাণ আগ্রহ তারা সে ভাবে শিক্ষা বা বৃত্তি গ্রহণ করতে পারে

এ তো গেল শিক্ষার কথা। এ দিক থেকে সোভিয়েট দেশের প্রত্যেকটি বাপ-মা আজ নিশ্চিন্ত। তারা জানে রাষ্ট্রের হাতে ছেড়ে দিয়ে তাদের ছেলেমেয়েদেরকে তারা অনেক বড় অনেক যোগ্য হওয়ার সুযোগ দিয়েছে। শিক্ষা-জগতে মেয়েরা কত দায়িত্বপূর্ণ স্থান অধিকার করে আছে তা আগে আলোচনা করেছি। যারা সোভিয়েট দেশের শিক্ষা পরিচালনা করে মেয়েরা হল তাদের মধ্যে একটা বিরাট অংশ।

ক্রীড়া জগতেও মেয়েদের মধ্যে এক অপূর্ব উন্মাদনা চোখে পড়ে। প্যারাসুট থেকে লাফ, নৌকা দৌড়, ফুটবল, ভলিবল, টেনিস, স্কিইং, স্কেটিং, বক্সিং, ওয়াটার পোলো, ভার উত্তোলন, সঁতার কাটা, বন্দুক ছোড়া

...কী নয় ? খেলাধুলোর মধ্যে মেয়েরা ডুবে আছে আকর্ষণ। শুধু তাই নয়, তারা কয়েকটা বিষয়ে সারা পৃথিবীর রেকর্ডকে পর্যন্ত ভাঙতে পেরেছে। যেমন মস্কোর মেয়ে বৃহকোভা—১৯৩৫ সালে সে ৩০০ মিটার রেসে আগেকার প্রতিদ্বন্দ্বী (যিনি ৪৮'৬ সেকেন্ড সময় নিয়েছিলেন) কে হারিয়ে দিয়ে মাত্র ৪১'৬ সেকেন্ডে সমস্ত জায়গাটা দৌড়তে সক্ষম হয়। সেই বছরেই লেনিনগ্রাদের মেয়ে মাস্লোভা ৫৭'০৫ মিটারের রেকর্ডকে ভঙ্গ করে ৬২'২০ মিটার দূরে বর্শা ফেলতে সফল হয়। ১৯৩৬ সালে গোর্কীর মেয়ে কুজনেটসোভা ৫,০০০ মিটার দূরত্ব ১০ মিনিট ২১'২ সেকেন্ডে স্টেট করতে পারে। তার আগের প্রতিদ্বন্দ্বী পেরেছিল ১০ মিনিট ৩৩'৬ সেকেন্ডে। সোভিয়েট ক্রীড়া জগতের ত্রিশ বছরের ইতিহাস এমনি কত কীর্তি ও কৃতিত্বের কাহিনীতে উজ্জ্বল। ত্রিশ বছর আগেকার ইতিহাসের পানে যদি তাকাই তাহলে দেখতে পাব যে সে সময়ে মেয়েদের কথা দূরে থাক সাধারণ পুরুষমানুষরাই তাতে যোগদান করবার কথা চিন্তা করতে পারত না। খেলাধুলো ছিল বড়লোকদের একচেটে।

১৯৩৫ সালে মেয়ে-পুরুষ উভয়েই খেলাধুলোর ব্যাপারে কী পরিমাণ আগ্রহ নিচ্ছে নীচের তথ্য থেকে তা পরিস্কারভাবে বোঝা যাবে।

শতকরা হিসাব

| | কুস্তিবিদ্যা | মাঠের খেলা | সাঁতার |
|-------|--------------|------------|-------------------|
| পুরুষ | ১৫'৭ | ২৩'৯ | ৩'৭ |
| নারী | ২৭'৭ | ৩৪'৩ | ৫'৩ |
| | ভলিবল | দাবাবোডে | অগ্ন্যগ্ন ক্রীড়া |
| পুরুষ | ১২'৫ | ১৬'৪ | ২৭'৫ |
| নারী | ১৭'৩ | ৬'৪ | ৭'০ |

বিশ লক্ষের ওপর মেয়ে খেলাধুলোয় সক্রিয় অংশ গ্রহণ করে থাকে এবং

তাদের মধ্যে হাজার হাজার মেয়ে রয়েছে যারা সেরা সাতারু, দাঁড়ী, স্কায়র ও স্কেটার হওয়ার উপযুক্ত। প্রায় সাড়ে তিন লক্ষ মেয়ে ইতিমধ্যে খেলাধুলোর উত্তীর্ণ হয়ে “লেবার এণ্ড ডিসফেন্স ব্যাজ” পেয়েছে। এই সব মেয়েরা শুধু নিজের দেশেই নয়, সারা পৃথিবীময় তারা পরিচিত।

সোভিয়েট মেয়েদের জীবন পরিবর্তনের যে ধারা আমরা এই কয় অধ্যায়ে লক্ষ্য করেছি তা অত্যন্ত গুরুত্বপূর্ণ। আমরা দেখেছি সামাজিক ও অর্থ-নৈতিক বিপ্লবের সাথে সাথে যন্ত্র জগৎ জুড়ে যে বিপ্লব এল...সেই বিপ্লবের মধ্যে দিয়েই নতুন গতিপথ খুঁজে পেল সোভিয়েট দেশের সমস্ত স্ত্রীজাতি। অথচ ধনতন্ত্রী পশ্চিম ইউরোপীয় দেশগুলিতে আমরা কী দেখতে পাই? দেখতে পাই হাজার রকম শাসন আর সংস্কারের শেকল দিয়ে বাঁধা সে সব দেশের মেয়েরা। তাদের দৃঢ় বিশ্বাস যে কলকারখানায় প্রবেশ করা মেয়েদের পক্ষে অত্যন্ত বিপজ্জনক, তাদের স্বাস্থ্য ও সন্তানধারণের পক্ষে হানিকর। কিন্তু সোভিয়েট শাসনব্যবস্থা প্রমাণ করেছে যে এ বিশ্বাস ভুল। এ হল পুঁজিবাদী শোষকদের আরেকটা বিরাট প্রবঞ্চনা।

সোভিয়েট দেশের স্ত্রী-স্বাধীনতাকে স্বতন্ত্র করে দেখলে চলবে না, বিশ কোটি নিপীড়িত জনসাধারণের সামগ্রিক জাতীয় মুক্তির সঙ্গে তাকে পাশাপাশি রেখে সমস্তটা বোঝবার চেষ্টা করতে হবে। কারণ যে নীতি সোভিয়েট দেশে বিপ্লবের সৃষ্টি করেছে সেই নীতির পেছনে ছিল দেশের সর্বাঙ্গীন মুক্তির প্রচেষ্টা। আমাদের ভারতবর্ষের বেলায় একথা খুব স্পষ্টভাবে বুঝে দেখতে হবে। কারণ স্ত্রী-স্বাধীনতার সংগ্রাম শুধুমাত্র সামাজিক সংগ্রামই নয়, রাজনৈতিক সংগ্রামও। নারীমুক্তির সংগ্রাম আলাদা আলাদাভাবে চলে না...রাজনৈতিক আন্দোলনের সাথে সাথেই তা অগ্রসর হয়। কারণ নারীমুক্তির সংগ্রাম আসলে পুরুষ জাতির সঙ্গে নয়, সে সংগ্রাম হল সেই শোষণ ও শাসনব্যবস্থার

বিরুদ্ধে যে ব্যবস্থা পুরুষজাতিকে এমনি এক আবর্তে এনে উপস্থিত করেছে। নতুন জীবনের পথে? হ্যাঁ, নতুন জীবনের পথেরই হৃদিশ পেয়েছে আজ সোভিয়েটের মেয়েরা...সন্ধান পেয়েছে এক নতুন জগতের যে জগৎ। একমাত্র সাম্যবাদের সুস্থ ও সবল ভিত্তির ওপরই গড়ে উঠতে পারে। এই অভূতপূর্ব পরিবর্তন বৃদ্ধাদের মনকে কি ভাবে স্পর্শ করেছে তা একটা ছোট ঘটনা থেকেই বোঝা যায়।

১৯৩৭-৩৮ সালে বিখ্যাত মার্কিন শিক্ষয়িত্রী ডিয়ানা লেভিন একবার রেল যোগে সোচি যাচ্ছিলেন। তাঁর ট্রেনের কামরায় কয়েকজন লালফোজের সৈন্ত, একজন বৃদ্ধা ও আটাশ বছরের একটি মুহিলা ভ্রমণ করছিলেন। অনেক আলাপ আলোচনার মাঝখানে বৃদ্ধাটি ফেটে পড়লেন। তাঁকে বললেন “...তোমার দেশে বিপ্লব হয় নি। হয়েছে কি? এদিকে বিপ্লব আমার দেশের কী অবস্থা করেছে দেখো। আমি যৌথ থামারে থাকি। আমার বড় ছেলে ট্রাক্টর চালায় আর আমার মেয়ে হল যে দল গরু চরায় সে দলের পরিচালিকা। আমার মেজ ছেলে মস্কোর কৃষি-বিদ্যা পড়ছে। আমাদের থামার তাকে সেখানে পাঠিয়েছে। আমার নাতি-নাতনীরা সবাই চমৎকার শিক্ষা পাচ্ছে। আমি নিজে অবিশ্রি লিখতে পড়তে জানি না। বয়সও হয়েছে, স্মৃতিও আর সম্ভবও নয়। কিন্তু আমি এইটুকু জানি—করুক দেখি কেউ আমাদের দেশ আক্রমণ—আমরা তাকে উচিত শাস্তি দেব।”* বৃদ্ধাটি বজ্র মুষ্টি তুললেন।

‘সাবাস, সাবাস, দিদিমা। এই তো উচিত কথা’ লাফিয়ে উঠে অভিনন্দন জানালো লাল ফোজের সৈন্তরা।

একটি বৃদ্ধার মধ্যে এই যে পরিবর্তন এ পরিবর্তন এল কী করে? এ রাষ্ট্রের

*অনিলকুমার সিংহ অনুদিত “সোভিয়েট রাশিয়ায় শিক্ষাব্যবস্থা” থেকে উদ্ধৃত।

তরফ থেকে শেখানো কোনো প্রচলিত নয়। নতুন জীবনের পাঠ থেকেই এ শিক্ষা নিয়েছেন সোভিয়েট বুদ্ধাটি।

প্যাট স্লোন একজন ইংরাজ লেখক। তিনি বহুবার সোভিয়েট দেশে গিয়েছেন। এবং সেখানে দীর্ঘ দিন থেকে সে সমাজের সামগ্রিক রূপকে বুঝতে চেষ্টা করেছেন। ১৯৩২ সালে তিনি যখন মস্কো যান তখন একটি মেয়ের সাথে তাঁর সাক্ষাৎ হয়। মেয়েটি যে বাড়ীতে তিনি উঠেছিলেন সে বাড়ীতেই পরিচারিকার * কাজ করছিল। গ্রামের মেয়ে... একেবারে অশিক্ষিত। প্রাথমিক শিক্ষা পর্যন্ত জোটে নি তার ভাগো। ইংলণ্ডের লোকেরা অত্যন্ত খেলো দৃষ্টিতে তাকিয়ে থাকে এই সব মেয়েদের দিকে। ১৯৩৭ সালে আবার যখন প্যাট স্লোন মস্কোয় যান তখন সেই মেয়েটির সঙ্গে তাঁর দেখা হয় কিন্তু মেয়েটি আর সে-মেয়েটি নেই। জিজ্ঞাসু স্লোনের দিকে তাকিয়ে মেয়েটি বলল “—পরিচারিকার কাজ আমি ছেড়ে দিয়েছি। এখন আমি একটা ল্যাবরেটরিতে যুক্ত আছি এবং ইঞ্জিনিয়ারিং পড়ছি।” * কথা শুনে স্লোন আশ্চর্য বোধ করলেন না কারণ তিনি তখন ধরতে পেরেছিলেন সোভিয়েট সমাজের পেছনকার জীবন-দর্শন। তিনি শুধু এইটুকু ভাবলেন যে মেয়েটি যদি মস্কোয় না থেকে ইংলণ্ডে থাকত তাহলে কী হত তার ভবিষ্যৎ? গ্রামের সেই অশিক্ষিতা মেয়েটি শুধু এক মনিবের দরজা থেকে অন্য এক মনিবের দরজায় ঘুরে বেড়াত!

শুধু—এই একটি মেয়েই নয়, এমনি হাজার হাজার মেয়ে সমাজের নিম্ন

* বিপ্লবের পর থেকে সোভিয়েট দেশে পরিচারিকা রাখার অভ্যাস ও প্রয়োজন ক্রমশ হ্রাস পাচ্ছে। ১৯৩৬ সালের হিসাব থেকে জানা যায় যে সে দেশে তখন পরিচারিকার সংখ্যা ছিল শতকরা মাত্র দু ভাগ।

* সুখাংগু সরকার অনুদিত “বিপ্লবোত্তর রাশিয়া” থেকে উদ্ধৃত।

- স্তর থেকে উঠে সোভিয়েট দেশে উচ্চ শীর্ষে বসবার সম্মান পেয়েছে। যে কোনো দেশের মেয়ে তার সমাজের কাছ থেকে এমনি সম্মান ও মর্যাদা দাবী করতে পারে কিন্তু তার আগে তাকে তার সমাজের রূপ পাল্টাতে হবে, রাজনৈতিক ক্ষমতা হস্তগত করতে হবে।
- আজ সোভিয়েটের মেয়েদের সামনে সুস্থ ও সুখী জীবনের এক অপরিমেয় বিস্তৃতি। মাতৃত্বের মর্যাদায় তাদের নারীত্ব আজ সমৃদ্ধ...এক নতুন সম্পদের অধিকারিণী। শিক্ষা ও সাংস্কৃতিক উৎকর্ষতা তাদের জীবনে এক অমূল্য অনুপ্রেরণা। এই নতুন জীবনের স্ফুরণকে সবচেয়ে আগে স্বীকৃতি দেবে আমাদের দেশের মেয়েরা—যারা আজও পিছিয়ে পড়ে আছে।

সাংস্কৃতিক ও সামাজিক উৎকর্ষতা

শ্রমজীবী হিসাবে সোভিয়েট মেয়েদের উন্নতি ও কৃতিত্বের পেছনে রয়েছে তাদের সমাজগত ও সংস্কৃতিগত চেতনা—যে চেতনা ও উপলব্ধি বিপ্লবোত্তর সমাজে এক স্মৃষ্টি ধারাবাহিকতার মধ্যে দিয়ে গড়ে তুলেছে। বিপ্লব সফল হবার পর থেকেই বলশেভিকরা মেয়েদের শিক্ষা সম্বন্ধে পরিকল্পনা গ্রহণ করছিল এবং ১৯১৯ সাল থেকে ব্যাপকভাবে আরম্ভ হয়েছিল অশিক্ষা-বিরোধী আন্দোলন। শহরে এবং গ্রামে তুমুল অভিযান মাথা তুলে দাঁড়িয়েছিল এই সামাজিক ব্যাধিকে উচ্ছেদ করার জন্তে। ফলে ১৯১৯ সালেই একটা পরিবর্তন চোখে পড়ে। দেখা যায় মেয়েরা দলে দলে ‘সোভিয়েটের’ প্রতিনিধি নির্বাচনের কাজের মধ্যে এগিয়ে এসেছে, যা পূর্বে কোনো দিন লক্ষ্য করা যায় নি। কিন্তু সোভিয়েটের মেয়েদের মধ্যে যে ব্যাপক পরিবর্তন এল, সে পরিবর্তন এল ১৯২৭ সালে, পঞ্চবার্ষিকী পরিকল্পনার কার্যকারিতার মধ্যে দিয়ে।

জারের আমলে শতকরা সত্তর ভাগ লোক এক অক্ষর লিখতে পড়তে জানত না। গ্রামের কৃষক-মেয়ে ও কারখানার মেয়ে-শ্রমিকদের মধ্যে অশিক্ষা ছিল আরও প্রবল, আরও গভীর। ১৯২০ সালে মোট জনসংখ্যার ৬৭ ভাগ ছিল অশিক্ষিত। মেয়েদের ক্ষেত্রে অশিক্ষার প্রসার ছিল আরও বেশী—শতকরা সাড়ে পঁচাত্তর ভাগ।

১৯১৯ সালের ২৬শে ডিসেম্বর পিপল্‌স কমিশারদের এক সভায় স্থির হল যে সমস্ত সোভিয়েট দেশ থেকে অশিক্ষার গ্লানি দূর কর্তে হবে। লেনিনের ডিক্রী জারী হয়ে বেকুল সাধারণের সামনে। তারপর শুরু হল শিক্ষার প্রসার। ‘অশিক্ষার অন্ধকারে ঢাকা জনসমাজকে জাগাও’ দিক থেকে দিকে ডাকের প্রতিধ্বনি শোনা গেল। বিপ্লবী মজুর চাষীদের হাঁক

গিয়ে পৌঁছল মানুষের কানে...যারা অক্ষর চিনতে শেখেনি তাদের কাছে.....যারা পড়তে শিখেছে অথচ অক্ষর লিখতে জানে না তাদের কাছেও। ডাকের ফল ফলল। ১৯২৯ সালে শতকরা ৫৮ ভাগ মানুষ শিক্ষিত হয়ে উঠল। আর একটা যুগের প্রয়োজন হল না, মাত্র চার বছরের মধ্যেই ১৯৩২ সালে শতকরা ৯০ ভাগ জনসংখ্যা অক্ষর চিনতে শিখল, নিজের মাতৃভাষাকে ভালবাসতে শিখল।

মাত্র বারো বছরের মধ্যে অশিক্ষিত জনসংখ্যার শতকরা ৬০ ভাগ জনতাকে কী করে শিক্ষিত করে তোলা হল এ সত্যিই একটা বিস্ময়কর ব্যাপার। আরও বিস্ময়কর এইজন্মে যে এক পক্ষের প্রচেষ্টার দ্বারা এ কাজ সম্ভব নয়। কারণ যতক্ষণ না পর্যন্ত রাষ্ট্রের শিক্ষা দেয়ার অভিযানের সঙ্গে জনসাধারণের শিক্ষা গ্রহণেচ্ছু মনের মিলন হচ্ছে ততক্ষণ পর্যন্ত তা সম্পূর্ণ অসম্ভব। এই দুইয়ের মিলন কী করে সম্ভব হল? এর উত্তর মিলবে, মার্কসবাদে। এর উত্তর মিলবে মার্কসবাদী জীবন দর্শনের প্রতিফলনে। শিক্ষা আর কোনো একটা শ্রেণীর হাতে ক্রীড়ানক বা বিলাসিতা হয়ে রইল না। শিক্ষা হয়ে দাঁড়াল জীবনের দৈনন্দিন প্রয়োজনের একটা অঙ্গ। তুমার্ত লোকের পক্ষে জলের মতন জরুরী হয়ে পড়ল এই শিক্ষা।

সোভিয়েট সরকার শুধু মাত্র প্রাপ্তবয়স্ক অশিক্ষিতদের শিক্ষা দেয়ার কাজেই ব্যস্ত রইল না..আগামী সমাজকে চালিয়ে নিয়ে যাবে যে ভবিষ্যৎ বংশ...সেই শিশুদের শিক্ষা দেয়ার দিকেও বেশ কিছু দৃষ্টি দিল। শিশুসদন, কিণ্ডারগার্টেন, প্রাথমিক স্কুল, চিলড্রেন্স প্যালেস, রঙ্গমঞ্চ, সিনেমা, ক্লাব...সংস্কৃতি জগতে প্রবেশ করল ছেলেমেয়েরা যেন রূপকথার এক একটি নায়ক নায়িকা হয়ে।

মেয়েদের জীবনে সন্তান পালন করা হল একটা ভয়ানক পীড়াদায়ক কাজ। শুধু পীড়াদায়ক কাজই নয়, একটা বড় সমস্যা। সন্তানপালন একজন

মার ব্যক্তিগত জীবনকে কী ভাবে আচ্ছন্ন করে রাখে তা আমরা আমাদের সমাজের দিকে তাকালেই দেখতে পাবো। দেখতে পাবো তার 'ব্যক্তিত্ব' সন্তানপালনের কাছে কত ছোট, কত নগণ্য হয়ে গিয়েছে। তার সমগ্র জীবনকে ঘিরে আছে স্বামীর পরিচর্যা আর সন্তানপালন। এর বাইরে সে অনুপস্থিত। এর বাইরে তার অস্তিত্ব একটা প্রকাণ্ড শূন্যতার মধ্যে বিলুপ্ত। সুতরাং সন্তানপালন ও শিক্ষাদীক্ষার মত বিরাট সামাজিক সমস্যা কে অত্যন্ত সুপরিকল্পিত উপায়ে সমাধান করতে পেরেছে বলে সোভিয়েট সমাজ দাবী করতে পারে।

আজ প্রতিটি সোভিয়েট ছেলে-মেয়েকে কিণ্ডারগার্টেনে যেতে হবে, স্কুলে পড়তে হবে, সোভিয়েট শিল্প, কৃষি বা রাষ্ট্র পরিচালনার কাজে সক্রিয় অংশ গ্রহণ করতে হবে...এ হল সমগ্র সোভিয়েট সমাজের দাবী। এ থেকে ফাঁকি দেয়ার উপায় নেই। যদি কেউ ফাঁকি দেয়ার চেষ্টা করে তাহলে সে সোভিয়েট নাগরিক হওয়ার অনুপযুক্ত, তাহলে সে হল সোভিয়েট ব্যবস্থার শত্রু...সোভিয়েট সমাজে অপাণ্ডক্লেয়।

শিশু-শিক্ষা ও উচ্চ শিক্ষার মধ্যেই সমস্ত শিক্ষা-আন্দোলন সমাপ্তিলাভ করে নি। সমাজের আরও গভীর তলদেশে, আরও ব্যাপক বিস্তৃতি নিয়ে সোভিয়েট সংস্কৃতির প্রবাহ অগ্রসর হয়ে চলেছে। তার ব্যাপ্তি দেখা যায় শহরের ও গ্রামের হাজার হাজার ক্লাবের মধ্যে। ও দেশের ক্লাবগুলি নিছক আমোদ প্রমোদের জায়গাই নয়, ক্লাব হল সামাজিক উৎকর্ষতার বড় বড় পীঠস্থান। ১৯১৪ সালে সমস্ত দেশে ক্লাবের মোট সংখ্যা ছিল ২২২টি। আর তখন কারা যেত এ সব ক্লাবে? জারের মোসাহেব, বড় বড় রাজকর্মচারী, বড় বড় খেতাবধারী খয়ের খাঁদের ছেলেমেয়ে, বড় লোক ও জমিদারদের পোষ্যপুত্র—এরাই ছিল সেদিন ক্লাবের পৃষ্ঠপোষক... গরীব মজুর চাষীরা সেদিন শুধু হাঁ করে তাকিয়ে থাকত ক্লাবগুলির

দিকে...তার ত্রিসীমানায় প্রবেশ করতে পারত না কেউ। কিন্তু সেই ক্লাবের সংখ্যা ১৯৩৮ সালে দাঁড়িয়েছে ৯৫, ৬২৬-এ। আজ কারা যায় এই সব ক্লাবে? সেই সব লক্ষ লক্ষ মজুর চাষী যারা জারের সমাজে ছিল অপাঙক্তেয়, অস্পৃশ্য, ছোটলোক।

সোভিয়েট ক্লাবের মধ্যে দিয়ে সংস্কৃতি আন্দোলন কী ভাবে অগ্রসর হচ্ছে তার খবর নেয়া দরকার।

শিল্পাঞ্চলে, যৌথ খামারে, শহরে, জনসংখ্যার প্রয়োজন অনুযায়ী হাজার হাজার ক্লাব সমস্ত দেশ জুড়ে গড়ে উঠেছে। কোথাও সমাজতান্ত্রিক সংস্কৃতি কেন্দ্র, কোথাও শ্রমিক সংঘ ক্লাব, আবার কোথাও যৌথ খামার ক্লাব। এই সব ক্লাবে একটা করে অত্যন্ত সুসজ্জিত পাঠাগার আছে। এখানে এসে লোকেরা মনোযোগের সঙ্গে পড়াশোনা করে...নিজেদের দেশের নানান খবর, দেশ বিদেশের খবর, জ্ঞানবিজ্ঞানের খবর আহরণ করে, আলোচনা করে.....পারস্পরিক আলোচনার মধ্যে দিয়ে শিক্ষা দিয়া-নেয়া করে। এই ক্লাবগুলি আবার শিল্প-কলা ও বিজ্ঞানের বিভিন্ন বিষয়ের ওপর অনেকগুলি চক্র পরিচালনা করে যেমন সংগীত চক্র, কবিতা চক্র, চিত্রকলা চক্র, জীববিজ্ঞান চক্র, প্রত্নতত্ত্ব চক্র, স্থাপত্যবিজ্ঞান চক্র, এমনি আরও অনেক। শুধু ক্লাবেই নয়, কলকারখানাতেও এমনি অনেক চক্র গড়ে উঠতে দেখা গেছে।

এই চক্রগুলি সোভিয়েটের সংস্কৃতি জগতে অত্যন্ত গুরুত্বপূর্ণ স্থান অধিকার করে আছে। এবং এই চক্রগুলির মধ্যে যারা অত্যন্ত সক্রিয় অংশ গ্রহণ করে থাকে তাদের মধ্যে মেয়েদের নাম সর্বাগ্রে উল্লেখযোগ্য। ১৯৩৩ সালের এক হিসাব থেকে জানা যায় যে তখনকার মোট চক্র-সভ্য সংখ্যা ২১,৭৯,০০০-এর মধ্যে মেয়েদের সংখ্যা ছিল ৯,০০০। তথ্য থেকে প্রমাণিত হয়েছে যে সৃজনীশক্তি,

কল্পনাশক্তি ও বুদ্ধিবৃত্তির দিক থেকে চক্রের মেয়েরা পুরুষদের প্রায় সমান সমান।

সোভিয়েট দেশ থেকে নিয়মিতভাবে প্রায় চার হাজার দৈনিক ও সাময়িক পত্রিকা প্রকাশিত হয়ে থাকে। এই সব পত্রিকার সংবাদদাতা ও সাংবাদিক হিসাবে মেয়েদের দান কিছু সামান্য নয়। তের বছর আগেকার কথা—সে সময়েই শতকরা প্রায় তের ভাগ সংবাদদাতা ও সাংবাদিক ছিল মেয়েরা। আজ অবিশিষ্ট তার সংখ্যা আরও বৃদ্ধি পেয়েছে কারণ সেদিনের তুলনায় মেয়েরা আজ সাহিত্য ও সংস্কৃতির দরবারে এক বিশেষ আসন পাবার দাবী রাখে।

১৯৩৬ সালে মেয়েদের সম্পর্কে এক অত্যন্ত কৌতুহলজনক অনুসন্ধান চালানো হয়েছিল সোভিয়েট কর্তৃপক্ষের তরফ থেকে। সেই অনুসন্ধান থেকে জানা যায় যে মেয়েরা গড়ে প্রতি মাসে প্রায় চার বার সিনেমা, থিয়েটার, কনসার্ট, যাদুঘর ইত্যাদিতে গিয়ে থাকে। জারের আমলে অধিকাংশ মেয়েই বাড়ীর বার হতো না, বার হতো তারা কচিৎই এমনি ঘন ঘন আমোদ প্রমোদ অনুষ্ঠানে যোগদান করত। আজ সেখানে পুরুষদের মতন মেয়েরাও সমানভাবে সিনেমা, থিয়েটার, কনসার্ট সম্বন্ধে আগ্রহ নেয়।

সাহিত্য সম্বন্ধে তারা কী পরিমাণ আগ্রহ নেয় শুনলে অবাক হতে হয়। সে বছরেই হিসাব নিয়ে দেখা গেছে যে এক যন্ত্র-নির্মাণ কারখানার মেয়ে-কর্মীদের মধ্যে শতকরা ৬৬ ভাগ পুশকিনের “ইউজিন অনেজিন” ও গোর্কীর “মাদার” পড়েছে, ৫১ ভাগ পড়েছে গোগলের “ডেড সোল্‌স্‌”, ৫৫ ভাগ পড়েছে শোলোকভের “ভার্জিন সয়েল আপটার্নড্‌” এবং শতকরা ৬৭ ভাগ গভীর মনযোগ দিয়ে অধ্যয়ন করেছে কমরেড স্টালিনের সপ্তদশ কম্যুনিষ্ট পার্টি কংগ্রেসের অভিভাষণ। বিপ্লবের আগে যে নারীজাতির

সাহিত্য-জগতে (প্রাচীন সাহিত্যই হোক বা আধুনিক সাহিত্যই হোক)
প্রবেশের কোনো অধিকার ছিল না...অশিক্ষার অন্ধকারে তলিয়ে ছিল যে
বিরাট নারীসমাজ...তারা সাহিত্য ও সংস্কৃতির উচ্চশীর্ষে উঠল কী করে ?
এই উন্নতি বাস্তবিকই চমক লাগায় ।

কৃষি .জগতে মেয়েদের অস্বাভাবিক সাংস্কৃতিক উন্নতি সত্যি সত্যিই
আরো বেশী করে নজরে পড়ে । কারণ আগে অন্তঃপুরে বন্দী ছিল
মেয়েরা । তাদের জীবনে 'ঘর'ই ছিল একমাত্র সত্য...তার বাইরে
নিজেদের কথা ভাবতে পারতো না তারা । দেশ বিদেশে কি ঘটছে,
দেশের রাজনীতি কোন্ পথে চলেছে, সমাজ কোন্ দিকে মোড় নিচ্ছে,
দেশের কোটি কোটি মানুষ কী ভাবছে, বিজ্ঞান জগতে কি কি নতুন
আবিষ্ক্রিয়া দেখা দিচ্ছে...এ বিষয়ে কিছুমাত্র মাথা ঘামাত না তারা ।
খবরের কাগজ ছিল তাদের কাছে বিলাসিতা । আবার অধিকাংশ
মেয়েরা কাগজের অক্ষরই চিনতো না । আজ কিন্তু ঘরের
বাইরে এসে তারা সমাজকে চিনেছে, জীবনে সমাজতন্ত্রবাদের
বৈপ্লবিক আশ্বাদ পেয়েছে । তাই সাহিত্যের মধ্যে দিয়ে, সংবাদ-
পত্রের মধ্যে দিয়ে তারা অগ্রসর সমাজের প্রাণস্পন্দন উপলব্ধি
করতে পারে ।

শ্রমিক সংঘ ও যৌথ খামার কর্মীদের সংগঠন পরিচালনার কাজে
সোভিয়েটের মেয়েরা অসামান্য কৃতিত্বের পরিচয় দিয়েছে । প্রত্যেকটি
কলকারখানায়, প্রত্যেকটি শ্রমশিল্পে সক্রিয় ও সচেতন মেয়েরা হাজার
হাজার মেয়েদেরকে শ্রমিক সংঘে টেনে এনেছে, তাদের দৃষ্টিভঙ্গীর
পরিবর্তন ঘটিয়েছে...তাদেরকে দেখিয়েছে পরিবর্তনশীল সমাজ তাদের
জীবনে কি সম্ভাবনা, কি সম্পদ নিয়ে আসছে ! তেমনি গ্রামেগ্রামে
হাজার হাজার পিছিয়ে-থাকা মেয়েদের জীবনে তারা এক নতুন বাতায়

উপস্থিত করেছে.....যেথা খামারের কাজে তাদের সক্রিয় সহযোগিতা আদায় করেছে।

সব চেয়ে উল্লেখযোগ্য বিষয় হল “যে সোভিয়েট ইউনিয়নের কম্যুনিষ্ট পার্টিই আজ সারা সোভিয়েট দেশকে জনসাধারণের কল্যাণে এগিয়ে নিয়ে চলেছে। ১৯৩৩—এ এই পার্টির কেন্দ্রীয় তথ্য বিভাগ একটি হিসাব প্রকাশ করে, সে হিসাব থেকে জানা যায় যে পার্টির শতকরা সভ্য-সংখ্যার সাড়ে ষোলো ভাগ হল মেয়ে। তের বছর পরে...বর্তমানে মেয়ে-সভ্য সংখ্যা কত দাঁড়িয়েছে সে খবর অবিশিষ্ট আমাদের জানা নেই। কিন্তু এটুকু বলা চলে যে মেয়ে সভ্য সংখ্যা নিশ্চয়ই বৃদ্ধি পেয়েছে...কারণ সোভিয়েট নাৎসী যুদ্ধেই আমরা তাদের এক অসাধারণ গৌরবোজ্জ্বল রূপ দেখতে পেয়েছি।

সোভিয়েটের সামাজিক ও সাংস্কৃতিক অগ্রগতি থেকে এতটা জিনিস খুব ভালোভাবে ধরা পড়ে যে সমাজ ও সংস্কৃতির ওপর আজ আর কারো একচেটে অধিকার নেই। সংস্কৃতির সম্পদ জাতি, ধর্ম, বর্ণ, স্ত্রী ও পুরুষ নির্বিশেষে দেশের প্রত্যেকটি মানুষের মধ্যে সমানভাবে ভাগ করে দেয়া হয়েছে। একজন রাশিয়ান, তাতার, আর্মেনিয়ান, সাদা রুশ, ভল্গার জার্মান, কি উজবেক—কারো মধ্যে এতটুকু অসামঞ্জস্য নেই। তারা প্রত্যেকেই বলতে পারে যে—এ আমার দেশ, একে ইচ্ছেমতো গড়ে তোলার স্বাধীনতা আমার আছে এবং তাতে সোভিয়েট দেশের হাজার হাজার মানুষ সায় দিয়ে বলবে “নিশ্চয়ই, সে স্বাধীনতা তোমার আছে—তোমার এবং আমাদের। আমাদের প্রত্যেকের স্বার্থ আজ আর পরস্পর বিরোধী নয়। এই সংস্কৃতি আজ আর লক্ষ্মীর বরপুত্রদের হাতে বিলাসের সামগ্রী হয়ে নেই। সভ্যতা ও সংস্কৃতির নতুন আলোয় আমাদের সমস্ত দেশ আজ উদ্ভাসিত।”

এ কথা ওরা বলতে পারে। বলতে পারে টান্কেণ্টের মজুর আর জর্জিয়ার
চাষী। কারণ ওরা জানে যে কারো লুট করা সম্পদ দিয়ে আলো জ্বলে নি
ওদের দেশে। ওদের আলো ওদের নিজেদের সৃষ্টি।

জাতীয় রিপাবলিকের মেয়েরা

নানান জাতির মানুষ নিয়ে সোভিয়েট দেশের জনসংখ্যা। একশো নব্বুই রকম ছোট বড় জাতি সমান অধিকারের ভিত্তিতে ছড়িয়ে রয়েছে সারা দেশময়। এরাই হল সোভিয়েট সমাজের প্রাণ এবং তার মার্কসবাদী নীতির ধারক ও বাহক।

সোভিয়েটের নীতি যখন নারীমুক্তির বার্তা নিয়ে অগ্রসর হয়েছিল তখন তা কোনো বিশেষ দেশের গণ্ডীর মধ্যে আবদ্ধ থাকেনি, সমস্ত দেশের ছোট বড় সকল অঞ্চলে গিয়ে পৌঁচেছিল তার আলো। কোনো জায়গায় অতি সহজে সেই স্বাধীনতার বাণী গৃহীত হয়েছিল, আবার কোনো কোনো জায়গায় তুমুল বাধার সম্মুখীন হতে হয়েছিল তাকে এবং এই বাধা বিপত্তিকে অতিক্রম করতে গিয়ে বিশেষ পদ্ধতি গ্রহণের প্রয়োজনীয়তা অনুভূত হয়েছিল।

জারের রাজত্বে ছোট ছোট জাতিদের হাজার রকম শোষণ নির্বিবাদে সহ্য করতে হতো। তাদের প্রদেশ বা এলাকাগুলি ছিল জারের ঔপনিবেশিক শোষণের যাঁতাকলের নীচে। যারা দরিদ্র জনসাধারণ তাদের ওপর ছিল দেশী ও বিদেশী দু রকমের শোষণ.....একদিকে স্বদেশী বণিক, জমিদার ও মোল্লা, অন্য দিকে রুশীয় পুঁজিপতি। সুতরাং ধ্বংস হতে বসেছিল এই জাতিগুলির অস্তিত্ব। অত্যন্ত নিম্নস্তরের অর্থনৈতিক, সাংস্কৃতিক ও সামাজিক আবর্তে ডুবে ছিল এই বিরাট জনসমাজ। তাদের গোষ্ঠিপতি-প্রভাবান্বিত গোত্রীয় ও সামন্ততান্ত্রিক সামাজিক বিধিব্যবস্থার মধ্যেই তার সুস্পষ্ট প্রমাণ মেলে।

এই সমাজব্যবস্থায় স্ত্রী-পুরুষের সম্পর্ক ছিল অত্যন্ত আদিম প্রকৃতির। মেয়েদের ওপর পুরুষদের ছিল অথও আধিপত্য; সামাজিক কাজকর্মে

যোগ দেয়ার তাদের কোনো স্বাধীনতা ছিল না। অর্থনৈতিক 'স্বাবলম্বন' ছিল তাদের কাছে স্বপ্ন। স্বামীর কাছে স্ত্রী ছিল তার দাসীর মতন..... তার ব্যক্তিগত সম্পত্তির সমতুল্য, বাইরের সমাজে তার গতিবিধি ছিল নিষিদ্ধ। সারা দিন সাংসারিক কাজ, স্বামীর পরিচর্যা ও সন্তান সৃষ্টি—এই ছিল জীবনের মহত্তম উদ্দেশ্য।

বহু শতাব্দী আগে (দ্বাদশ, ত্রয়োদশ ও চতুর্দশ শতাব্দীতে) কিন্তু ঠিক উল্টোটা ছিল এই সমাজের অবস্থা ; মেয়েরাই ছিল সমাজের কর্তা। মধ্য এশিয়ার অনেক বড় বড় এলাকা ছিল মেয়ে-খানদের শাসনের অধীনে। চেঙ্গিস খাঁর আক্রমণের সময়ে দেখা গেছে যে মেয়েরা বীরত্বের সঙ্গে সেই দস্যু-সৈন্যদলের সঙ্গে সশস্ত্র যুদ্ধ করেছে। সেদিন উচ্চ শীর্ষে ছিল তাদের স্থান। মধ্য এশিয়া, ক্রাইমিয়া, ককেশাস, ট্রান্স-ককেশিয়া ও অন্যান্য মুসলমান সংস্কৃতিসম্পন্ন জাতিগুলি জারের আমলে বিশেষ করে এক নিদারুণ নির্যাতনের মধ্যে দিয়ে জীবনযাপন করত। তাদের ধার্মিক ও লৌকিক সংস্কারবদ্ধ সমাজ পরিবারের কর্তার ওপরই মেয়েদের সমস্ত দায়িত্ব অর্পণ করেছিল। যার চূড়ান্ত পরিণতি দেখা গিয়েছিল চরমতম নারী-নির্যাতনের মধ্যে।

তাদের সামাজিক বিধি অনুসারে কোনো স্ত্রী স্বামীর ও বাড়ীর কতৃস্থানীয় ব্যক্তি ছাড়া কারো সাথে বাইরে বেরুতে পারতো না ; নিষিদ্ধ ছিল পরপুরুষের সাথে কথা বলা, বোরখা না পরে রাস্তায় চলা ছিল বিধি-বহির্ভূত। নয় বা দশ বছর পার হলেই প্রত্যেক মেয়েকে পারাঞ্জা (মাথা থেকে পা পর্যন্ত দীর্ঘ আবরণ) পরতে হতো। বৃদ্ধ বয়স পর্যন্ত এই আবরণ অঙ্গে ধারণ করা ছিল সামাজিক বিধি। উজবেক এবং তাজিক মেয়েদের আট নয় বছর বয়সে বিয়ে দেয়া হতো এবং যে কোনো পাত্র অর্থের বিনিময়ে মেয়ে খরিদ করে তার মালিকানা স্বত্বের অধিকারী হতে পারত।

কিন্তু নতুন যুগ পতনের পর জার-শাসিত উক্ত উপনিবেশের সমস্ত ছোট ছোট জাতিগুলিকে সোভিয়েট রাষ্ট্র সমস্ত রকম অত্যাচার ও অসঙ্গতি থেকে মুক্তি দিল। শুধু মুক্তি দিয়েই ক্ষান্ত হুল না, অর্থনীতি, শিল্প ও কৃষিগত উন্নতির সাহায্যে পিছিয়ে-পড়া দেশগুলিকে স্বাবলম্বী ও সম্ভাবনাপূর্ণ করে তোলার দিকে নজর দিল। সোভিয়েটের ইউরোপীয় অংশে যে সব বাধাবিঘ্ন আদৌ দেখা দেয়নি বা অল্প পরিমাণে দেখা দিয়েছিল সেগুলি ব্যাপক আকারে দেখা দিল এই জাতীয় রিপাবলিক-গুলিতে। কারণ এই সব জাতির মেয়েরা ছিল অশিক্ষিত, কুসংস্কারাচ্ছন্ন এবং রক্ষণশীল। তাই আইনের সাহায্যে তাদের চিরচরিত রীতিনীতি উচ্ছেদ করে স্বাধীনতার পথ প্রশস্ত করতে হল। জনসাধারণের কতৃৎ কার্যে হবার সাথে সাথে বাধ্যতামূলক বিবাহ, গৌরীদান প্রথা, বলপূর্বক বিবাহ, মেরে-বিক্রী প্রথা আইনত উচ্ছেদ করে খোলা বছর বয়সে মেয়েদের বিয়ে দেয়ার আইনসম্মত বয়স স্থিরীকৃত হল! খোলা হল মেয়েদের ক্লাব (সেখানে পুরুষদের যাতায়াত নিষিদ্ধ) এবং এই ক্লাবগুলিতে বসল সব বয়সের মেয়েদের জটলা; তাদের হাতের কাজ প্রদর্শিত হল সেখানে, নানান বিষয়ের ওপর নিয়মিতভাবে শিক্ষা পেতে থাকলো সবাই। ধীরে ধীরে এই ক্লাবগুলিই হয়ে উঠলো হাতের কাজের সমবায় ভাণ্ডার। এই ক্লাব থেকেই সর্বপ্রথমে মেয়েরা নিজেদের পরিশ্রমে একটা কারখানা গড়ে তুলল—সেই সব মেয়েরা যারা আগের দিনে ছিল হারেমের বন্দি। নারী আন্দোলনে এক নতুন স্রোত চোখে পড়ল। সবখানে যেন কর্মচঞ্চল্যের ভাব। একমাত্র আজারবাইজান রিপাবলিকে ১৯২৩ সালে অনুষ্ঠিত হল খোলা শো নারী সভা ও বিশটি নারী সম্মেলন। জর্জিয়ায় হল দু হাজার সভা, তেইশটি সম্মেলন।

রক্ষণশীল মুসলিম সামাজিক প্রথা যা এতদিন সমস্ত নারীসমাজকে তার

নাগপাশে বেঁধে রেখেছিল, নতুন যুগের প্রবর্তনে তা ভঙ্গুর হয়ে এল। তার পর এল প্রথম ও দ্বিতীয় পঞ্চবার্ষিকী পরিকল্পনা যা এই নড়বড়ে সমাজের অর্থনৈতিক ও সাংস্কৃতিক ভিত্তিকে কঠিন জমিনের ওপর স্থাপন করল। শিল্প ও কৃষি গড়ে ওঠার সঙ্গে সঙ্গে দরকার হয়ে পড়ল নতুন কর্মীর। মেয়েদের সামনে কর্মজগতের দ্বার উদ্ঘাটিত হল বিরাট প্রতিশ্রুতি নিয়ে। বিভিন্ন কলকারখানায় যে সব শ্রমজীবীরা অংশ গ্রহণ করল তার মধ্যে কোথাও শতকরা প্রায় পঁচিশ ভাগ, কোথাও ত্রিশ ভাগ হল মেয়ে-শ্রমিক। কয়েক বছর আগে পর্যন্ত এদের স্থান ছিল হারেমে... মেসপালন ও জীর্ণ কৃষিকর্ম ছিল এদের সমাজের রূপ। আমীর, খান, বে, মোল্লা, ইমাম, সুফি.....মধ্য এশিয়ার বুক থেকে এদের কলঙ্কময় শোষণের দাপট নিশ্চিহ্ন হয়ে গেল ধীরে ধীরে। এক সামাজিক বিপ্লব সমস্ত সমাজকে নতুনভাবে ঢেলে তৈরী করতে অগ্রসর হল।

আগেই উল্লেখ করা হয়েছে যে জারের যুগে রাশিয়ার অশিক্ষিতের সংখ্যা ছিল শতকরা সত্তর ভাগ কিন্তু এই সব নির্যাতিত জাতিগুলির মধ্যে অশিক্ষার প্রভাব ছিল আরও অনেক বেশী যেমন তাতারদের মধ্যে শতকরা প্রায় ৮২ জন, শাদা রুশদের মধ্যে প্রায় ৮৯ জন, চুভাসদের মধ্যে ৯৪½ জন, কাবারডিনোদের মধ্যে ৯৬½ জন। মেয়েদের মধ্যে শিক্ষা ছিল আরও কম.....প্রায় ছিল না বললেই চলে। কোথাও একশো ভাগের এক ভাগের এক-তৃতীয়াংশ, কোথাও বা এক-পঞ্চমাংশ—এই ছিল স্ত্রী শিক্ষার প্রসার।

আজ আর সেদিন নেই। শিক্ষার আলোয় আলোকিত হয়ে উঠেছে সমস্ত জাতীয় রিপাবলিকগুলি। খুব ছোট ছোট জাতি যেমন ইন্গুসটিয়া, চুভাস, আদিজিয়া যাদের মধ্যে শিক্ষা ছিল না এতোটুকু তারা আজ পুরোপুরি শিক্ষিত, সভ্য, সংস্কৃত। মেয়েদের মধ্যে সবাই লিখতে পড়তে

শিখেছে...কয়েক বছর আগে পর্যন্ত যারা শিক্ষার প্রয়োজন অনুভব করত না।

তুর্কমেনিস্তান, কাজাকিস্তান, উজবেকিস্তান, তাজিকিস্তান, খিরগিজিয়া—মধ্য এশিয়ার এই সব জাতীয় রিপাব্লিকগুলি যেমন ভাবে দ্রুতগতিতে সমৃদ্ধ হয়ে উঠেছে তেমনিভাবে উন্নত, স্বাবলম্বী ও সুসভ্য হয়ে উঠেছে সে সব দেশের লোকগুলি। সে সব দেশে কলকারখানা বসেছে, হাজার হাজার বোথ খামার গড়ে উঠেছে, বৈদ্যুতিক স্টেশন, যানবাহন, রেল-লাইন, এরোপ্লেন, সভ্য সমাজের সব রকম সুখ সুবিধা সমস্ত দেশ-বাসীর জীবনে এক নতুন সভ্যতার ভিত গাঁথছে। এই নতুন সভ্যতার স্পর্শ থেকে মেয়েরা বাদ যায় নি। যাদের মতন এই রূপান্তরের সঙ্গে সঙ্গে তারাও নিজেদেরকে নতুন সমাজের মুখোমুখি দাঁড় করিয়েছে।

সোভিয়েট মধ্য এশিয়া তুলোর জন্মে বিখ্যাত। ওদেশের অপরিাপ্ত তুলোর ফসলকে লোকেরা বলে ‘শাদা সোনা’। আগের দিনে এই তুলোর ফসলের সমস্তটাই জার সরকার নিয়ে যেত নিজের দেশে এবং রাশিয়ার হতো কলে কাপড় তৈরী হতো এই তুলো দিয়ে। কিন্তু আজ সোভিয়েট এশিয়াতেই রেশম ফ্যাক্টরী, হতো কল, কার্পাস কর্মশালা (cotton ginnery) গড়ে উঠেছে...গড়ে উঠেছে সাধারণ ভোজনাগার, শিক্ষালয়, ডাক্তারখানা, ফ্যাক্টরী ক্লাব। তাই আর ঘরের কোণে আলাদা হয়ে বসে থাকতে পারে নি মেয়েরা; সমাজের কর্মমুখর জীবনে এসে নিজেদের দায়িত্ব ভাগ করে নিয়েছে। কলকারখানায় এক মাস, দেড় মাস কাজ করে তাদের সমাজ-সচেতন মন এক অভিনব আনন্দ পেয়েছে..... সবাই মিলে বৃহত্তর সমাজের জন্মে শিল্প উৎপাদনের এক অভিনব আনন্দ...যে আনন্দ তাদেরকে উত্তরোত্তর আরও কর্মনিষ্ঠ আরও সমাজমুখী করে তুলেছে। বাড়ীর অভিভাবক বা স্বামী চাইতো না যে

তার বোন, মেয়ে বা স্ত্রী কলকারখানায় কাজ করুক বা ঘন ঘন বাইরে
অবাধ ভ্রমণ করুক কিন্তু সে সব লোক পর্যন্ত বুঝতে পেরেছে যে তার সন্দেহ
ভিত্তিহীন...কোনো মেয়েই ভুল পথে যাচ্ছে না, বরং অর্থ রোজগার করে
নিয়ে আসছে, পরিবারে অর্থ বৃদ্ধি করছে; দৈনন্দিন জীবনে বিকাশ
লাভ করছে সুখ ও সমৃদ্ধি।

আধা-বর্ষের মানুষ এমনি করে অর্থনৈতিক, সামাজিক ও সাংস্কৃতিক
পরিবর্তনের মধ্যে দিয়ে নতুন সভ্যতার অধিকারী হল। আটত্রিশটি ছোট
ছোট জাতি যাদের কোনো বর্ণমালা ছিল না, সোভিয়েট শাসনে তাদের
প্রত্যেকের জন্মে বর্ণমালা তৈরী হল। আজ সেই আটত্রিশটি জাতি তাদের
নিজেদের বর্ণমালায় তাদের সমাজকে ব্যক্ত করে, প্রতিফলিত করে।

মধ্য যুগের অশিক্ষিত মানুষদের কাছে সংস্কৃতি নিয়ে এল এক বিস্ময়।
বইয়ের পাতায় পাতায় অক্ষরের সমুদ্রের মধ্যে তারা এক নতুন কোতুক,
নতুন দীপ্তি খুঁজে পেল, যা এতোদিন চাপা পড়েছিল নিতান্ত ববর
জীবনযাত্রার আড়ালে। কারখানার ক্লাবে ক্লাবে, গ্রামের কুঁড়েঘরের
চালায় চালায় পাঠাগার বসল...মানুষ জমলো দলে দলে...ছেঁড়া নোংরা
কাপড় পরা দাড়ীওয়া মুসলমান চাষী, কারখানা ও সমবায় ভাণ্ডারের
মুসলমান মজুর ...তাদের চোখে মুখে অপরিমেয় কোতুহল, হাল-বদলে-
যাওয়া ছনিয়ার দিকে তাকাবার কেমন একটা অপ্রতিরোধ্য উলঙ্গ দৃষ্টি।
পারাজা-ঢাকা এবং পারাজা-খোলা মেয়েরাও এসে জটলা করল
পাঠাগারের চার পাশে। গ্রামের কুঁড়েঘরে এমনি আলোর বিস্ফোরণ!
মেয়েদের দু চোখে শাণিত বিস্ময়!

শুধুমাত্র বিপ্লবের পরই নয়, আজও গ্রামে গ্রামে চাষীর কুটীরে পাঠাগার
শিক্ষার পীঠস্থান হিসাবে বিরাজ করছে। কি ভাবে সমৃদ্ধ হয়েছে এই
পাঠাগারের সংখ্যা তা ভাবতে গেলে অবাক লাগে।

| | ১৯২৮-২৯ | ১৯৩৩-৩৪ |
|----------------|---------|---------|
| ট্রান্স-ককেশাস | ৮০১ | ১,৪০৭ |
| উজবেকিস্তান | ৫৮৪ | ৩,৪৭১ |
| তুর্কমেনিস্তান | ৭৭ | ২৪৮ |
| তাকিজিস্তান | ২১ | ৩১৭ |

এই সংখ্যাগুলি সম্বন্ধে কিছু বলা নিশ্চয়োজন। কারণ ক্রম-সমৃদ্ধিশালী সংস্কৃতি কি পরিমাণ এগিয়ে চলেছে তা আপনা থেকেই বোঝা যায়। বোঝা যায় কয়েক বছর আগে যে জাতির বর্ণমালা ছিল না সে জাতির কাছে এই মর্যাদা কত গভীর, কত ব্যাপক।

নতুন সভ্যতার সংস্পর্শে এসে মেয়েরা বর্তমান যুগের বিলাসদ্রব্যের ব্যবহার সম্বন্ধে সচেতন হল। সাবান ব্যবহার করতে শিখল তারা, কাপড়ের নীচে অন্তর্দাস পরার প্রয়োজন অনুভব করল, বিছানা ও আসবাবপত্র তাদের দৈনন্দিন প্রয়োজনের মধ্যে গণ্য হল...বিজলী বাতি পেল তারা তাদের হাতের নাগালে। সঙ্গে সঙ্গে পেল বিবাহ-বিচ্ছেদ ও স্বামী নির্বাচনের অধিকার।

অর্থাৎ মধ্যযুগীয় সমাজ থেকে এক লাফে তারা চলে এল বিংশ শতাব্দীর সোভিয়েট সমাজের আওতায়। বারো বছর বয়স হলেই পারাঞ্জার আড়ালে ঢাকা পড়ত যাদের জীবন, পরিবারের প্রত্যেকটি পুরুষ মানুষের পা ধোয়াই ছিল যাদের জীবনের ব্রত, বাড়ীর খদ-কুঁড়ো দিয়ে ক্ষুণ্ণবৃত্তি করতে হতো যাদের...তারা আজ স্বামীর পাশাপাশি বসে বিশ্ববিদ্যালয়ে পড়ে...তারই পাশে হয়ত পড়ে আরেকটি মেয়ে যার মা হয়তো সারা জীবন কাটিয়েছে মাটির ওপর শুয়ে, কোনো দিন সমাজের ভয়ে স্বামীর নাম পর্যন্ত মুখে আনতে পারে নি।

মধ্য এশিয়ার কলঙ্কময় অতীত বর্তমানের উজ্জলতায় মুছে গেছে...

মুছে গেছে জার, আমীর, খান, বে ও মোল্লাদের কালো শাসনের কাহিনী। একজন উজবেক মেয়ে আজ তার মার মুখের দিকে তাকিয়ে জিজ্ঞেস করে “পারাজা কাকে বলে বলতে পারো মা?” মা অতীতের দিকে তাকায়, তারপর থেমে থেমে নতুন আগ্রহ নিয়ে পারাজার গল্প বলে মেয়েকে... যেন সাত সমুদ্রের তের নদী পারের রূপকথার কাহিনী বলছে সে।

সোভিয়েটের নারীমুক্তির কাহিনী এমনি কৌতূহলজনক, এমনি রোমাঞ্চকর। পর পর আটটি অধ্যায়ে সোভিয়েটের মেয়েদের কৃতিত্ব সম্বন্ধে যে সংক্ষিপ্ত ও ধারাবাহিক বিবরণ লিপিবদ্ধ করা হয়েছে তা থেকেই তার দূরপ্রসারী বিস্তৃতি সম্বন্ধে একটা উজ্জ্বল পরিচয় মেলে।

অনেক দেশেই স্বাধীনতা বর্তমান যুগের সঙ্গে ভাল রেখে অগ্রসর হতে চেষ্টা করেছে... বিশেষ করে শহরে মেয়েদের মধ্যে স্বাধীনতার ছদ্মবেশে প্রবেশ করেছে উগ্র আধুনিকতা কিন্তু তাতে করে নারী সাধারণের সামগ্রিক স্বাধীনতা আসে নি। পাশ্চাত্যে স্বাধীনতা বলে যা পরিচিত তা হল অর্থশালী বণিক ও তার অনুবর্তী শ্রেণীর (বুর্জোয়া ও পেটি-বুর্জোয়া) সামাজিক ব্যাধি—উগ্র আধুনিকতার নামে নারী জাতিকে শোষণের বৃত্তের মধ্যে আটক করে রাখার নতুন কায়দা। ভারতবর্ষের মত ঔপনিবেশিক দেশকে না হয় বাদ দেয়া গেল, কিন্তু অত্যাণ্ড বড় বড় দেশ থেকে কোনো অনুপ্রেরণা মেলে কি? সেখানেও মেয়েদের ওপর সেই সামাজিক শোষণ, পুরুষদের অপ্রতিহত অধিকার, অর্থনৈতিক পরনির্ভরশীলতা (যেটুকু অর্থনৈতিক স্বাধীনতা আছে জনসংখ্যার তুলনায় সে আর কতটুকু!), রাষ্ট্রিক ক্ষেত্রে নিদারুণ অবজ্ঞা; ব্যক্তিগত জীবনে সেই হতাশা, লাঞ্ছনা, সংগ্রাম ও দারিদ্র। কারণ পুরুষ কিংবা নারী কারো চোখেই সমাজ, অর্থনীতি বা রাষ্ট্রের সংজ্ঞা ও রূপ


এতটুকু পালটায় নি। বিত্তশালী ও বিত্তহীনের সেই সংগ্রাম বর্তমান, দেশের পঁচানব্বুই ভাগ জনসাধারণ সর্বহারা শ্রমিক ও নিঃস্ব কৃষকের ওপর সমাজের পাঁচভাগ শোষকের নির্যাতন; অসমান ধনবন্টনপ্রণালী, পাশাপাশি প্রাচুর্য ও দুর্ভিক্ষের অবস্থান..... এ সমাজে নারীমুক্তির কথা কল্পনা করা হাস্যকর। পাশ্চাত্য-মার্কী মুক্তি মিলবে কিন্ত সোভিয়েট সমাজ যে দূরপ্রসারী সামগ্রিক মুক্তির কথা প্রচার করে সেই মুক্তি বর্তমান সমাজকে জিইয়ে রেখে পাওয়া অসম্ভব।

সুতরাং সোভিয়েটের মেয়েদের স্বাধীনতার কথা পুরে'পুরি বুঝতে হলে, আমাদেরকে সমস্ত সোভিয়েট সমাজকে বুঝতে হবে কারণ যে ভিত্তির ওপর সেখানকার মেয়েরা তাদের এমনি সুখী ও সম্পৎশালী জীবন গড়ে তুলেছে, সে ভিত্তি অনেক মজবুত, অনেক গভীর আর অনেক ব্যাপক।

স্বীকৃতি

“সোভিয়েটের মেয়েরা” বইখানি লেখবার সময়ে যে সব বইয়ের সাহায্য পেয়েছি সেগুলির নাম নীচে উল্লেখ করলাম :

The Position of Women in the U.S.S.R.
Soviet Communism
Russia in Peace and War
U.S.S.R. Speaks for Itself
Socialist Sixth of the World
Dawn over Samarkand
A to Z of the Soviet Union
Legal Rights of the Soviet Family
Education in the U.S.S.R.
Soviet Union News



উল্লেখযোগ্য ছাপার ভুল

| পৃষ্ঠা | পঙ্ক্তি | অশুদ্ধ | শুদ্ধ |
|--------|---------|-------------|---------------|
| ৬ | ১ | আকাঙ্ক্ষা | আকাঙ্ক্ষা |
| ১৫ | ৭ | পঞ্চ- | পঞ্চ-বাসিন্দী |
| ২২ | ৩ | শিল্পশিক্ষা | শিল্প-শিক্ষা |
| ২৩ | ২ | আকাঙ্ক্ষা | আকাঙ্ক্ষা |
| ৪৮ | ১৬ | চাষী | চাষী |
| ৫৭ | ৫ | তাদেরকে | তাদেরকে |
| ৫৯ | ১২ | জনসাধারণকে | জনসাধারণকে |
| ৬৪ | ১৮ | উপস্থিতি | উপস্থিত |
| ৭৭ | ৭ | উৎকর্ষতা | উৎকর্ষ |
| ৮০ | ২০ | উৎকর্ষতার | উৎকর্ষের |

